

2

# QUÆSTIO QUODLIBETICA DE ATTRITIONE.

S E V,  
*QUÆ FVERIT MENS CONCILII TRIDENTINI  
DE SUFFICIENTIA  
ATTRITIONIS SERVILIS  
IN SACRAMENTO POENITENTIÆ?*

Habita Lovanij in Schola Artium Die 19.  
Decembris Anni 1665.

PER F. FRANCISCUM FARVACQUES  
I N S U L E N S E M,  
ORDINIS EREMITARVM S. AVGVSTINI  
S. THEOL. DOCTOREM LOVANIENSEM,  
Et in Ducali Abbatia S. Gertrudis Professore.



L O V A N I I,  
Typis Viduz BERNARDINI MASSI sub viridi  
Cruce, Anno 1666.

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

THE UNIVERSITY OF CHICAGO  
LIBRARY

REVERENDISSIMO, PERILLVSTRI, AC  
AMPLISSIMO DOMINO,

D O M I N O

MAXIMILIANO  
VAN LEEFDAEL,

EX BARONIBUS DE LEEFDAEL,  
PERANTIQUE, PRÆNOBILIS ET CELEBERRIMÆ  
DUCALIS APUD GRUDIOS

ABBATIE D. GERTRUDIS  
PRÆSVLI MERITISSIMO,

Canonicorum Regularium S. Augustini Congregatio-  
nis Windesemensis per inferiorem Germaniam,  
authoritate Apostolicâ & Regiâ

CONSERVATORI PERPETUO,  
BRABANTIE STATVVM ASSESSORI,  
JUDICI SYNODALI, ETC.

REVERENDISSIME PRÆSVL



*Tiam hoc Opusculum Theologicum. seu Quæstio, ut  
vocat, Quodlibetica. sub Amplissimi Vestri nomi-  
nis splendore lucem publicam videre desiderat, &  
quem aliàs habuit benignum Auditorem, gestit nunc*

habere benignum Lectorem, imò & Protectorem. Nec ambigit se gratam fore, non quidem suo, vel Authoris merito, sed scriptiois argumento. Vindicat enim Divinum illum, quem Filius hominis in terras venit mittere, ignem amoris, & ferreas servilis timoris catenas, cum aureis & homine ingenuo dignis Charitatis vinculis commutare docet. Quod argumenti genus non potest nobilissimo & ingenuo tuo pectori non esse gratissimum. Siquidem nobilis ac ingenui pectoris est ad virtutem currere virtutis & iustitiæ amore: servorum & mancipiorum, ad bonum compelli formidine pœnæ. Nam teste Anselmo lib. de casu Diaboli cap. 23. Non satis est honestum solo odio pœnæ non peccare; & ad non peccandum inutile est odium pœnæ, ubi solus amor iustitiæ sufficit.

Et sanè, omnem vitæ tuæ rationem hætenus ita instituisti, ut in omnibus moribus & motibus tuis amor iustitiæ principem sibi locum vindicaret, mallens Deo servire liberrimâ charitate, quàm cogente servilis timoris necessitate.

Quò fit etiam, ut nunc in Amplissima Dignitatis fastigio constitutus summa cum laude præsis & prosis, non existimans te potestate dominante, sed charitate serviente felicem, omnia factus omnibus, ut omnibus prodesse possis, & tibi commissum monasterium, Charitatis alii tectum, supremo Pastori Christo sartum tectum representare.

Ex quo Charitatis uberrimo fonte promanant pulcherrimæ illæ animi tui dotes, & eximia virtutum omnium ornamenta, pietas, prudentia, mansuetudo, candor, comitas, & stupenda in tanta dignitate animi demissio ac modestia.

Quocirca jure meritissimo quis dixerit, quod Divina illa, quæ te accendit Charitas EMITTAT FONTES, omnigenæ virtutis in CONVALLIBUS synceræ humilitatis. Convallis enim designat virtutem

tem humilitatis teste *Augustino in Psalmum 103*. Videamus, inquit, si convalles sunt, ut emittantur fontes in convallibus. Audi Prophetam: super quem requiescit spiritus meus, nisi super humilem, & quietum, & tementem verba mea? Quid est, super quem requiescit spiritus meus? super HUMILEM & quietum. QUIS HABEBIT FONTEM MEUM? CONVALLIS.

*In hanc convallem humilitatis emittit fontes omnis gratiae & virtutis, Deus ipse, qui est Charitas, ut propterea cum M. P. Augustino sermone 27. de verbis Dom. cap. 2. rursum possim dicere: Confluit aqua gratiae ad HUMILITATEM CONVALLIS, denatat de tumoribus collis.*

*Quodq; mireris hac humilitas extollit, omnis enim qui se humiliat exaltabitur, estque prodigio simile, quod hac convalis in montem extollitur. Ut enim bene iterum Augustinus in Psalm. 103. Noli contemnere humilitates, indè fluunt fontes. Emittit fontes in convallibus. Audi montem. Dicit Apostolus: Plus illis omnibus laboravi. Magnitudo quædam commendatur: statim tamen ut profluant aquæ, CONVALLIEM se fecit. Non ego autem, sed gratia Dei mecum. Non repugnat, ut qui sunt montes, sint & convalles. Sicut enim MONTES dicuntur propter spiritalem magnitudinem, ita & CONVALLIEM propter sui spiritus HUMILITATEM.*

*Sed odiosus sum, qui illam ipsam, quæ deprædicari refugit, deprædico humilitatis virtutem: mavult illa Deo, quam hominibus probari: mavult conscientiae, quam hominum testimonium: satius ducit in præcordijs delitescere, quam in hominum laudibus versari. Qua-*

re

re (quod plerique solent in epistolis nuncupativis) non attexam longa  
virtutum tuarum elogia : non gradus honorum in medium proferam,  
nec commemorabo illustres & conspicui inter Belgas generis tui nobi-  
litate, aut tuorum merita Parentum. Ista canant alij mihi mode-  
stia tuae memori: constitutum est silentio potius, quàm scripto fontes  
meritorum in valle humilitatis tuae exuberantes venerari. Quare  
in hoc silentio ex animo precor, ut hoc litterarum munusculum, levi-  
dense quidem, ex animo tamen offerentis summum pro more & amore  
tuo benigne suscipias, velut aeternum observantiae meae testimonium.  
Et quidni feceris, cum à puero sapientiam in sponsam tibi elegeris:  
studia, studiorumque cultores, operâ ac sollicitudine tuâ, judare ac  
promovere, perpetuò, etiamnum in Abbatiâli dignitate constitutus,  
studueris? Quod me tacente loquitur Bibliotheca, quam novâ facie  
donasti, & propemodum novam fecisti, comparatis undequaque do-  
ctissimorum virorum monumentis. Sed imprudens sum, qui præter  
animi mei propositum in laudes tuas relabor. Sileo. Maneo in æter-  
num & ultra.

REVERENDISSIMÆ, PERILL. AC AMPL.  
DOM. VESTRÆ

Observantissimus Famulus

F. FRANCISCVS FARVACQUES

Ord. Erem. S. Augustini S.Th. Professor

In vestra Abbatia S. GERTRUDIS.

# C E N S U R A

Admodum Reverendi, Amplissimi, atque Eximij Viri,  
*D. Jacobi Pontani. S. Theol. Doctoris ac Professoris,*  
*Insignis ad sanctum Petrum Collegiatæ Ecclesiæ*  
*Decani, Privilegiorum Academiæ Lovaniensis*  
*Conservatoris Apostolici, nec non Regij*  
*Librorum Censoris, &c.*

**H**Æc *Dissertatio. de Attritione servili* doctrinam sanam continet: & quæ fuerit mens *Concilij Tridentini de sufficientia illius in Sacramento Pœnitentiæ*, clarè & solidis argumentis ostendit. Quam eâpropter prælo & publicâ luce dignam censeo. Datum Lovanij Die 12. Julij 1666.

JACOBUS PONTANUS *S. Theol. Doctor*  
& *Professor, ac Librorum Censor.*

APPRO-

# A P P R O B A T I O

Reverendi Adm ac Eximij Patris *Athanasij Maigretij*  
S. Theol. Doctoris, Ord. Erem. S. Augustini,  
studij Theologici Regentis, & Provinciæ  
Belgiæ Diffinitoris.

**Q**uestionis hujus Quodlibeticæ, (*qua fuerit mens Concilij Tridentini de sufficientia Attritionis servilii in Sacramento Pœnitentiæ?*) Lovanij coram Academicis propositæ resolutionem, ex commissione R. Adm P. Magistri Provincialis nostri perlegi, quam prædicto Concilio consentaneam, totius rationibus confirmatam, & Pœnitentium salutis per-utilem inveni, ut proinde publicâ luce digna censeatur. Datum Lovanij in Conventu nostro Ord. Eremit. S. P. Augustini, hac 6. Julij 1666.

**E. ATHANASIVS MAIGRETIUS**  
*S. Th. Lovanij Doctor & Professor.*

---

# F A C U L T A S

R. Adm. P. Prioris Provincialis Ord. Erem.  
S. Augustini.

**V**isâ Approbatione Eximij P. M. Athanasij Maigretij S. Theol. Doctoris, & Studij Lovaniensis Regentis, consentio, ut *Questio Quodlibetica* (*qua fuerit mens Concilij Tridentini de sufficientia Attritionis servilii in Sacramento Pœnitentiæ?*) Composita ab Eximio P. M. FRANCISCO FARVACQUES S. Theol. Doctore & Professore lucem videat. Datum Insulis 10. Julij 1666.

**FR. JOANNES BAPTISTA DE PERNES** Provincialis  
Provinciæ Belgiæ Ord. Erem. S. Augustini.



# QUÆSTIO QUODLIBETICA:

*Quæ fuerit mens Concilij Tridentini de sufficientia Attritionis servilis in Sacramento Pœnitentiæ?*

Mabita Lovanij in Schola Artium die 19. Decembris Anni 1665.

§. I. Respondetur proposita quæstioni.



Quæstionem mihi proposuisti, Erud. me D. Praes., examine dignissimam, toti quæ Auditorio, uti confido, tractatu nec inutilem, nec injucundam. *Puto enim Fratres, cum Augustino, quia omnis homo sollicitus est pro anima sua, cujus perennis salus, & felix, aut infelix æternitas ab idoneo peccatorum dolore* Tract. 5 in Epist. Jo. aa.

& Attritione subinde pendet.

Et quidem optandum foret, ut, quàm fieri posset, plurimi, etiam Attritionis servilis ope ac beneficio, pervenirent ad illa bona, *quæ præparavit Deus his, qui diligunt illum*: verùm, ut optinè Hieronymo rescribit Augustinus: *Nemo optando efficit, ut verum sit, quod verum non est*. 1. Cor. 2. v. 9. Epist. 28. Unde si verum non est, Attritionem servilem esse dispositionem obtinendæ in Sacramento reconciliationi sufficientem, nemo votis suis obtinebit, ut reverà sit sufficiens.

Neque hîc juvare poterit ab Authorum multitudine, vel sententiæ probabilitate petitem patrociniû: quia non mille Authores, imò nec millia millium, & decies millies centena millia Authorum suffragijs suis efficient, ut obtinendæ in Sacramento reconciliationi sufficiat dispositio, quæ ex Christi institutione non sufficit, *nec opitulabitur testimonium falsum, ante Iudicem verum*, ut in simili Augustinus. L. 3. contra Jul. c. 3. Ut igitur solâ rei veritate inspectâ candidè exponam non tam quod opto, quàm quod sentio, quæstioni mihi proposiæ paucis respondeo, quod Tridentinum nequaquam docuerit Attritionem servilem obtinendæ in Sacramento reconciliationi præparationem sufficientem esse.

Quinimò confidenter assero, Tridentinum accuratè pervolutanti plurima occurrere argumenta, quæ homini non præoccupato, optimo jure persuadere possint contrariam Tridentini Patribus placuisse sententiam.

Merito autem totum hujus quaestionis negotium ad Tridentini tribunal revocatur: quandoquidem in solius Tridentini auctoritate nitantur, qui à nobis dissentiunt Theologi. Unde antè celebratum Concilium Tridentinum nullus è Schola Theologorum Scholasticorum prodijt, qui doceret Attritionem servilem, saltem poenitenti cognitam, sufficere obtinendæ in Sacramento reconciliationi. Quod si fortè neges: ceddò, vel unius Authoris profer testimonium, & magnam pro præstato beneficio referes gratiam: hæc enim solertissimè quaesivi, & non inveni.

Absoluto autem Concilio Tridentino, quidam Theologi aucti fuerunt docere, quod Attritio servilis etiam cognita in Sacramento obtinendæ remissioni peccatorum sufficeret, sed non nisi occasione accepta ex verbis Tridentini perperam intellectis.

Unde initio nascens istius doctrinæ, & nonnisi cum timore & verecundia publico sese sistens circa Annum 1583, Ludovicus Lopez prælucente sibi, ut putabat, face Tridentini, contra eam, quam dicit *opinionem Antiquorum*, ita scribit: *AUDEO & hanc statuere conclusionem: PROBABILE EST, & non parùm veritati & CONCILIO TRIDENTINO consona opinio affirmativa, scilicet, quod ad Iustitiam & remissionem peccatorum in Sacramento Poenitentia satis est Attritio cognita, etiamsi poenitens non existimet probabiliter eam esse Contritionem.*

Quare cum solius Tridentini auctoritate nitatur doctrina Ludovici Lopez, aliorumque sequacium & ipso longè audaciorum, jure meritissimo ad ipsum Tridentinum appellamus. Priusquam autem argumenta proferam, quæ mihi Tridentinum accuratè pervolverint occurrerunt, operæ pretium duxi nonnulla præmittere, quæ omnem calumniandi ansam & occasionem præriperent.

#### §. II. *Quadam observatione digna præmittuntur.*

Disquisit.  
Theol. de  
pec. dab.  
c. 8. §. 4.

**P**Ræmoneo primò, me impræsentiarum non agere nisi de Attritione servili, id est, quæ ex puro puto timore poenæ nascitur sine ullo affectu benevolentiae erga Deum propter se dilectum, de qua aliàs. Interim lubens, volensque fateor dari aliquam Attritionem charitate non perfectam, quæ possit hominem Deo reconciliare cum Sacramento, nequaquam tamen sine Sacramento.

Præmoneo secundò, quod vox *Charitas* subinde generalem, subinde specialem obtineat significationem.

Charitas generali significatione, idem est quod amor, dilectio seu bona voluntas, quâ summum bonum propter se diligitur: & hoc sen-

sensu loquitur frequenter S. Augustinus de charitate, ut lib. 14. de civit. c. 7. homil. 8. inter 50. & de gratia Christi. c. 21. sicut & B. Cæsarius homil. 2. de eleemosyna: *Clamatur tibi ab Angelis pax hominibus bonæ voluntatis. Quia bona voluntas, ipsa est charitas.* Et B. Chrysologus sermone 135. qui est de B. Laurentio: *Sed tamen non desit charitas, si non desit voluntas: ipsa enim ardens voluntas, ducitur charitas.*

Charitas speciali significatione amicitia quadam est hominis ad Deum, juxta Angelicum Doctorem 2. 2. q. 23. art. 1. Est ergo talis dilectio, qualem solet amicus ad amicum habere, sumiturque vel pro ipso habitu amicitiae cum Deo, vel pro actu, qui à tali habitu provenit. Et in hac significatione plurimi Theologi hujus temporis loquuntur. Unde Franciscus Suarez: *In charitate primum & precipuum est ipsa ratio amicitiae Divina & hinc dicta fuit charitas.* Videri potest doctissimus Lensæus de charitate libro 7. cap. 3. ubi dicit in hac postrema significatione intelligendum, quod passim traditur charitatem sine reconciliatione cum Deo non esse. Porro in sequentibus utimur voce charitas in significatione illa generali, nequaquam tamen in speciali: quia certum est, quod Attritio salutaris non debeat provenire ex ob-  
tenta jam amicitia Divina.

Disp. 1. de  
spe. sect. 3.  
p. 37x.

Præmoneo tertio, me non eo consilio in medium proferre Melchiorum Canum, ejusque affectas, quod existimem illos sententiae nostrae subscribere: siquidem non ignoro eos toto, quod aiunt, caelo à nobis discrepare: scio eos clarissime tradere, quod Attritio servilis in Sacramento sufficiat: ac proinde in eorum autoritate nullum statuo præsidium, sed in rationibus & fundamentis, quæ oportet convelli. Quare nihil moror, quid Authores illi docuerint, sed quid consequenter ad ea, quæ aliud agentes, jecerant fundamenta, docere debuerint.

His præmissis pergamus ad proponenda argumenta à Tridentino petita, eodem, quo legenti occurrent ordine, & efficiamus, (quod de sancto Cypriano dicit S. P. Augustinus) *ut intelligant omnes, qui non*

L. 1. de  
bap. c. x.

## ARGUMENTUM PRIMUM.

Trident.  
sess. 6. c. 6.

*Ad Pœnitentiam, quam agi oportet à baptizandis, requiritur, ut DEUM TAMQUAM OMNIS JUSTITIÆ FONTEM DILIGERE INCIPIANT: ergo illud ipsum requiritur in Sacramento Pœnitentiæ, cum in confesso sit, non minorem animi præparationem desiderari in Sacramento Pœnitentiæ, quàm Baptismi.*



Uic argumento, vulgato quidem, sed efficacissimo, duplex adfertur responsio. Prima, est Tridentinum non loqui de amore solius benevolentiae, sed etiam concupiscentiae. Altera est, quod Tridentinum non agat de dispositione necessaria ad reconciliationem cum Deo, sed tantum de ordinaria, perfectiori & magis consentanea. Sed utraque hæc responsio nullo negotio refelli potest.

§. I. *Refutatur prima responsio ex P. Tannero, Suarez, Catechismo Romano, Concilio Moguntino, & Tridentino.*

Tom 4.  
disp. 6 q. 1.  
dub 4. a.  
742. 1430.

**P** R I M O. Quia teste Tannero communis mens & sententia Doctorum est, quod Tridentinum non agat de amore concupiscentiae. SECUNDO. Ut argumentatur idem, constat sanctum Thomam cuius vestigia sequi voluit Tridentinum de hoc amore (charitatis) locutum. Porro locus ille D. Thomæ habetur 3. p. q. 85. a. 6. ubi inter ceteros actus Pœnitentiæ enumerat quarto loco motum spei, & quinto loco motum charitatis, quo alicui peccatum displicet secundum seipsum & non iam propter supplicia.

TERTIO. Amor concupiscentiae erga Deum naturæ suæ prior est spei, non posterior: qui proinde à spe non oritur, sed spem antecedit, inquit Tannerus iterum.

Pag. 98.

Quam doctrinam Tannerus videtur hausisse ex P. Suarez in 3. parte disp. 4. sect. 8. sic discurrente: Diligere Deum, ut omnium Iustitiæ fontem, non est diligere amore concupiscentiae, sed est diligere Deum ut auctorem gratiæ & omnium supernaturalium bonorum, quomodo charitas diligit ipsum, etiam si propter seipsum maxime diligit; sicut naturalis amor, diligit Deum ut Creatorem, vel (ut nunc dicamus, ut totius naturæ fontem, quod

quod non est amare illum amore concupiscentia, sed naturali benevolentia propter excellentem bonitatem quam Deus habet, ut auctor est supernaturalium bonorum; nec verò dicit Concilium hunc amorem pertinere ad spem, sed potius supponere spem, & post conceptam spem, per eam erigi hominem, & quasi sublevari ad diligendum Deum, utique propter seipsum, nam amor concupiscentia non sequitur proprie ex spe, sed ad illam potius supponitur.

QUARTO. Catechismus Romanus Tridentinum utique respiciens, dum agit de gradibus quibus pervenitur ad reconciliationem cum Deo, non qualemcumque dilectionem, sed charitatem spei accedere disertissime docet. Postquam enim iisdem pœnē quibus Tridentinum verbis tradidisset modum justificationis, subiungit: Huc denique accedit spes impetranda à Deo misericordia, quæ erecti vitam & motus emendare constituitur. Postremo CHARITATE corda nostra accenduntur, ex qua liberalis ille timor probi & ingenui filii dignus oritur: hisce igitur quasi gradibus ad hanc prastantissimam Pœnitentia virtutem pervenitur.

Parte 5. de  
Sacram.  
Pœnit. n. 7.

QUINTO. Concilium Moguntinum anno 1549. celebratum continet quoddam Synopsin sessionis sextæ Tridentini. Inter cætera autem quando agit de modo præparationis ad justificationem, manifestè insinuat Tridentinum intelligendum esse de amore benevolentia his verbis: Homo peccatorum suorum admonitus, & à Deo iusto iudicio constitutus peccati supplicia metuens, mox excitatus, & adiutus Dei gratiâ à timore peccati ad Dei misericordiam cogitatione, desecit, & cum alia omnia in Scripturis revelata, tum hoc præcipue firmâ fide capis, Deum peccatoribus propter Christum misereri velle, quâ subnixus fiducia spem concipit, & timorem animo eiecit, ac Deum, quem ad miserendum proclivem sibi, iam propitium credit, DILIGERE, & peccata, quæ ipsum à Deo separabant edisse incipit &c. Quod enim Concilium agat de dilectione benevolentia, evidenter colligitur ex illis verbis: Timorem animo eiecit.

Cap. 7.

SEXTO. Tridentinum eadem sessione sexta Canone tertio sic habet: Si quis dixerit sine præveniente Spiritus S. inspiratione atque eius adiutorio hominem credere, sperare, DILIGERE, aut pœnitere posse sicut oportet, ut ei iustificationis gratia conferatur, anathema sit. In quem locum Suarez, Interrogo, inquit, an in hac definitione loquatur Concilium de dilectione charitatis? Existimo certe neminem negaturum, alioqui ex vi huius definitionis non esset de fide ad dilectionem charitatis esse necessarium auxilium excitans, & adiuvans, neque in illa tota doctrina sermo Concilij fuisset de illo actu, cum tamen sit omnium præcipuum, & de illo maxime sit curata illa doctrina; nam quod ad dilectionem imperfectam sine absolute necessaria illa auxilia, non est ita certum. Si autem loquitur ibi Concilium de dilectione perfecta charitatis, signum est de eadem fuisse loquutum in ca-

Supra.

p̄te sexto, nam hic Canon illi capis respondet & doctrinam ibi traditam in summam redigit & definit.

Adfert deindē testimoniū sacræ Scripturæ à Tridentino allegata, quale est illud 1. Reg. 7. *Præparate corda vestra Domino, & Zachariæ 1. Joëlis 2. Convertimini ad me & ego convertar ad vos.* Quæ non posse intelligi de præparatione & conversione per amorem concupiscentiæ merito contendit. Unicum displicet in illo auctore (quod etiam ple-rosque aliōs fallit) quod omnem actum quo diligitur Deus amore benevolentiae putet esse charitatis perfectæ & justificantis: qua in re fateor me ab illo dissentire, eas tamen rationes adfert, quæ multo efficacius concludant Tridentinum per dilectionem, quā Deus dili-gitur tamquam fons omnis Justitiæ, intelligere amorem distinctum ab amore concupiscentiæ, qui quidem sit benevolentiae, non tamen necessariō charitatis perfectæ & justificantis. Et ita Tridentinum intellexisse videtur Joannes Malderus per dilectionem de qua agi-tur intelligens *quandam Dei dilectionem, & CHARITATAM INCHOA-TAM, qua est dispositio quadam mediā, & necessariō reperitur in illo qui odit iniquitatem, quamvis cum reatu culpa consistat, sicut & illud ipsum odium.*

§. II. Idem probatur ex scopo Tridentini, & Hæreticorum doctrina.

**S** EPTIMÒ. Illud ipsum planè requirit scopus, quem sibi propo-nit Tridentinum sessione 6. cap. 6. vult enim condemnare so-lemnem tum temporis hæreticorum doctrinam, qui negabant, quòd ante reconciliationem posset præcedere aliqua Dei dilectio, seu cha-ritas.

Controv 9.

*Affirmatis, inquit Albertus Pighius, Impossibile esse homini diligere Deum, nisi prius peccata sibi remissa certā fide apprehendat. Itā enim & hic dicitur, & dixisti supra in assertionē iustificantis illius fidei: nec prius DILECTIO adest, quā fide RECONCILIATIO facta sit. Quæ postre-ma verba sunt Philippi Melancthonis, in sua Apologia, ubi etiam suæ propositionis hanc rationem dederat: Nec potest eum diligere, quem iratum vides, & præcipitare velle in gehennam.*

Quam doctrinam Melancthon hausit ex ipso Luthero, qui licet initio docuisset solo amore concipi poenitentiam, prout constat ex Joanne Rossensi, qui ad articulum sextum eidem objicit: *Solo vis amore Contritionem a peccatoribus queri*: postmodum tamen negavit quòd amor, seu charitas debeat præcedere reconciliationem. Constat hoc ex varijs Lutheri posterioribus Scriptis, nam alicubi scribit: *Fides enī ante spem & charitatem, sola accipit remissionem peccatorum, prop-*

ter

x.a. quest.  
113. a. 5.  
sect. 3. p.  
580.

per solum Christum, facitq; per eundem personam gratam, ante & absque charitatis merito.

disp. de di-  
cto ad He-  
bræ. c. 13.

Sic etiam de libertate Christiana: Ecce, inquit, sic FLUIT ex fide justificante CHARITAS & gaudium in Domino. Et in cap. 2. ad Galatas. Ex his satis intelligi potest, hic nihil oportere agi, quam audire ista sic gesta esse & indubitata fide apprehendere. Ea est verè formata fides. Postea Christo sic fide apprehenso --- facio bona opera, DILIGO DEUM, ago gratias, exerceo charitatem erga proximum, sed illa charitas vel sequentia opera, nec informant meam fidem, nec ornant, sed fides mea informat, & ornatur charitatem. Ex his aliisque verbis constat Lutherum docuisse, quod charitas seu dilectio non posset præcedere justificationem factam per fidem.

Consequens igitur est, quod Tridentinum istiusmodi monstra errorum volens debellare, cap. 6. sessionis 6. statuerit dilectionem Dei tamquam fontis Justitiæ præcedere justificationem: quodque per dilectionem non intellexerit amorem concupiscentiæ, de quo non egerant hæretici, sed benevolentiam, prout magis constabit ex ratione quam subiungimus.

OCTAVO. Ipsi hæretici contra quos agebat Tridentinum verba Tridentini intellexerunt de amore benevolentiam, non negantibus, sed illud ipsum Catholicis ultro admittentibus. Constat hoc ex verbis Lutherani Kemnitij apud Judocum Ravensteyn, Quartum, inquit, vitium in Decreto Tridentino est, quod officium proprium fidei, quod est apprehendere Christum ad iustitiam & salutem, tribuunt Patres Tridentini nostra CHARITATI, non fidei. Unde quintum, inquit, vitium est, quod fingunt DILECTIONEM DEI in nobis debere præcedere reconciliationem cum Deo.

Quid ad hæc Catholicis? An impium illum Kemnitium Patribus Tridentinis imponere? An de amore concupiscentiæ loqui Concilium? Nequaquam, sed inanem esse calumniam, quod ordinem in Scriptura monstratum in descriptione præparationis ante justificationem invertat Synodus Tridentina, dum docet dilectionem aliquam Dei (quam Kemnitius antea charitatem nuncupaverat) præcedere iustificationem. Cum Scriptura manifestè insinuet neminem salubriter ad Deum confugere pro impetranda reconciliatione, nisi qui aliquâ dilectione Dei, & amore iustitia sit affectus. Ita respondet doctissimus vir Judocus Ravensteyn: præmiserat autem doctrinæ à se traditæ probationem his verbis: Extat quoque manifesta definitio in Synodo Arausicana Canone ultimo: hoc enim salubriter profitemur quod Deus nobis nullus præcedentibus meritis & fidem & amorem sui prius inspirat, ut & Baptismi Sacramentum fideliter

Parte 1.  
pag. 158.

*requiramus & post Baptismum cum ipsum adinitorio ea qua sibi sunt placita implere possimus.*

L. 5. de in-  
hærente  
iust. prolog  
1. p. 120.

Tridentini doctrinam eo, quo Kemnitius, sensu intellexisse & impugnasse videtur Philippus Melancthon, aliique protestantes, prout satis insinuant hæc verba Stapletoni. *An verò hac dilectio (de qua Tridentinum sess. 6. cap. 6.) disponens ad Iustitiam sit dilectio Dei super omnia, inter Scholasticos disputatur. Tamen quia COMMUNEM Scholasticorum SENTENTIAM, qua illud affirmat vellicant Protestantes, breviter eorum argumenta diluimus --- sic argumentatur Melancthon & c. Constat ergo Melancthonem & alios protestantes sic intellexisse, & impugnasse Tridentinum: Catholicos verò hypothesim non negasse, sed sensum illum Tridentini tamquam verum & legitimum propugnasse.*

Neque mirum cuiquam videatur, quod Melancthoni, aliisque Protestantibus Tridentini doctrina sic intellecta plurimum displicuerit, Ponebat enim Melancthon IN TIMORE SERVILI & in detestatione peccati plenam & perfectam Contritionem, ut testatur ibidem Stapletonus. Undè Alphonsus Virvesius Canariensis Episcopus in suis Philippicis adversù Lutherana dogmata per Philippum Melancthonem detecta: *Vestra, inquit, confessio Augustana, & Philippi Melancthonis Apologia Contritionem & timorem, tamen mutato in terrore nomine, exigit ad Pœnitentiam. CHARITATEM verò ab ea prorsus excludit. Rejicit enim & inter hæreticos adnumeratis eos, qui docent remissionem peccatorum contingere propter nostram dilectionem, aut crasse nimis obliti, aut impiè damnantes, quod Christus ait Lucæ 7. dimissa sunt ei peccata multa, quoniam dilexit multum. Ex quibus verbis manifesta fit ratio cur Protestantibus in timore servili & detestatione peccati Contritionem & remissionem peccatorum ponentibus, ita displicuerit Tridentinum sess. 6. cap. 6. de requisito ad justificationem benevolentiz amore intellectum.*

§. III. Quid sit DILIGERE DEUM TAMQUAM OMNIS JUSTITIÆ FONTEM? Qua causa fuerit Tridentino, usurpandi huiusmodi locutionem?

**Q**uid sit diligere Deum tamquam fontem omnis Iustitiæ plerique nimis persensoriè expendunt. Dico itaque nequidquam esse aliud, quàm diligere Deum, non propter rivos beneficiorum ab ipso Deo tamquam fonte promanantes, sed Deum propter ipsum Deum diligere, & fontem propter ipsum fontem, propriamq; bonitatem. Videns quippe peccator Deum esse fontem bonorum omnium, incipit Deum diligere, non tantùm propter bona, quæ ab ipso accipit, vel expectat, sed etiam



etiam propter fontem, id est propter ipsum Deum, quem non dubitat bonis à se promanantibus infinitis præstantiorem.

Declarari potest exemplo viatoris, qui in eremo sitiens, compertis rivis, quibus reficitur, ipsum fontem diligit, non quidem propter fontem, sed propter rivos ex ipso promanantes: quod si postmodum fontem ipsum reperiat, eumque videat rivis suis infinitis præstantiorem, incipit ipsum fontem diligere, non amplius propter rivos ex ipso promanantes, sed propter ipsum fontem, propriamque præstantiam.

Sic agitur cum homine peccatore, qui in eremo hujus vitæ constitutus, primò quidem Deum diligit propter rivos beneficiorum, quos credendo & sperando accipit: postmodum tamen progrediendo ad ipsum fontem, incipit ipsum fontem propter fontem diligere, id est, Deum propter Deum, qui est *FONS vitæ, & inscruptibilis fons*, juxta Augustinum, & juxta Concilium Arausicanum cap. 22. qui est *FONS quem debemus SITIRE in hac eremo, ut ex eo quasi gustis quibusdam irrorati non deficiamus in via.* Quæ verba sunt petita ex Augustino tractatu 5. in Joannem, qui etiam explicans, quæ sit illa sitis de qua egerat, *Si sitimus*, inquit, *veniamus & non pedibus, sed affectibus, nec migrando, sed AMANDO veniamus.* Hæc ergo ratione diligitur Deus tamquam fons omnis Justitiæ, seu bonorum nostrorum. De quo fonte iterum Augustinus: *Ipse enim Deus FONS nostræ beatitudinis, ipse omnis appetitionis est finis --- ad eum DILECTIONE tendimus, ut perveniendo quiescamus, ideo beati, quia illo fine perfecti, bonum enim nostrum, de cuius fine sine inter Philosophos magna contentio est, nullum est aliud, quàm illi coherere: cuius unius anima intellectualis incorporeo, si dici potest, amplexu, verus impletur, fecundaturque, virtutibus.* Hoc enim bonum DILIGERE IN TOTO CORDE, in tota anima, & in tota virtute, precipimur.

In Psal. 42.

Tract. 32.  
in Joan.

L. 10. de  
civ. c. 4.

Et tractatu 13. in Joannem: *Aperiantur fauces cordis ut bibant FONTEM. Quod bibis, hoc vides, hoc audis. Totum tibi fit Deus: quia bonum, quæ diligis totum tibi est.* Ex quibus omnibus consequens fit, quod diligere Deum tamquam fontem omnis Justitiæ, sit Deum propter seipsum fontem diligere, non amore concupiscentiæ, sed veræ benevolentiæ.

Quæret aliquis, quæ causa movere potuerit Patres Concilij Tridentini, ut usurparent modum illum loquendi: *diligere Deum tamquam omnis Justitiæ fontem?*

Respondeo, quantum mihi conijcere licet, hanc fuisse rationem. Hæretici in Apologia confessionis Augustanæ (quæ recentè ante annum 1545. conscripta fuerat, teste Alberto Pighio controversiâ 9.

ac per consequens ante sessionem 6. Tridentini, quæ celebrata est sub initium Anni 1547 ) docuerant, quod *non potest prius adesse dilectio, quam fide sit facta reconciliatio, nec potest eum diligere, quem iratum videt, & precipitare velle in gehennam.* Contra hunc errorem Tridentinum verbis illis, *Deum tamquam omnium Iustitia fontem diligere incipiunt*, tacite insinuat, quomodo possimus affectu etiam benevolentiae, Deum, quem videmus iratum diligere, quia scilicet Deum, etiam iratum, consideramus esse fontem omnis nostrae Iustitiae, per fidem & spem inchoatæ, & sub isto motivo, potest prius adesse dilectio, quam sit facta reconciliatio.

Tridentinum itaque paucis illis verbis: *tamquam omnis Iustitia fontem*, complectitur ratiocinationem, quæ antea usus fuerat Albertus Pighius ad eandem doctrinam confutandam, his verbis: *Quid prohibet quod minus illum possimus diligere, quem omnis nobis boni auctorem cerit credimus, à quo nos conditos cum nihil essemus, ut sua beatitudinis in æternum participes & consortes faceret? Quem etiam post nostram erga se de his omnibus ingratisimam & omni damnatione meritis plectendam ingratitude, inobedientiam, contumaciam, intelligimus nihilominus & credimus nos revocare ad Pœnitentiam &c? Hunc talem, ita à nobis apprehensum, in hoc ipso actu, in hoc ipso ad illum reditu, quamvis peccatis nostris adhuc meritis OFFENSUM NOS DILIGERE impossibile est?*

Quare in Tridentino consideremus hanc contineri ratiocinationem: *Hunc Deum, ita à nobis tamquam fontem fidei, spei, & omnium Iustitia nostra apprehensum, quamvis peccatis nostris adhuc meritis offensum & iratum, nos diligere impossibile est? Atque ita latebit in prædictis verbis magna energia, statimque apparebit configi dogma Philippi Melancthonis negantis, quod dilectio possit adesse, priusquam facta sit reconciliatio.* Videri potest Matthias Bredembachius in caput 3. Matthæi, ubi similem habes argumentationem.

Serm. 66. Atque hæc sufficiant de dilectione fontis Iustitiæ, de quo cum Mellifluo Bernardo *bibere potius, quam scribere desidero.*

§. IV. Rescribitur alia responsio, & ex P. Vasquez, alijs, evidenter probatur, quod particula *oportet*, in Tridentino NECESSITATEM DENOTET PRÆCEPTI.

**A**liorum responsio est, quod particula *oportet* in Tridentino, significet id quod conveniens, & perfectius est, quamvis necessarium non sit.

Sed

Sed nihilo melior est hæc responsio : cui enim persuadebitur unquam , quod Tridentinum in re tanti momenti, in instructione totius orbis, particulam oportet, pro eo quod conveniens & perfectius est, usurpaverit? Tridentinum duabus post lineis adfert illa verba Apostoli ad Hebræos 11. *accedentem ad Deum oportet credere* &c. ubi particula oportet nemine reclamante, non tantum illud denotat, quod conveniens & perfectius est, verum etiam, quod absolute necessarium est: & quis credat, quod pauculis antea lineis eandem vocem oportet in alia prorsus significatione usurpaverit? Inspice itaque hunc textum: *hoc est per eam Pœnitentiam, quam ante Baptismum agi oportet: denique dum proponunt suscipere Baptismum, inchoare novam vitam, & servare Divina Mandata. De hac dispositione scriptum est: accedentem ad Deum oportet* &c. Audis bis vocem oportet: & quâ verisimilitudine affirmabis diversissimâ significatione intelligi?

Ap Hebr.  
11.

Testantur Jurisconsulti, quod particula oportet in ordinationibus publici juris, significet necessitatem, adeoque immutabilem: quinimò & in ipsis contractibus: quanto magis eadem particula designat necessitatem præcepti in illa publica totius Ecclesiæ declaratione, ubi non de valore contractus civilis, sed de animarum salute, & peccatorum remissione, quid sentiendum sit, præscribitur?

Proinde jure merito P. Vasquez 1. 2. disp. 203 c. 9. n. 92. tamquam rem indubitatam asserit, quod verbum oportet in Tridentino necessitatem denotat præcepti. Ubi essati sui aliam tradit, eamque non contemnendam rationem: *quamvis, inquit, teste Cicerone de Oratore, OPORTERE perfectionem declaret officij, tamen eam denotat perfectionem, quâ omnibus, & semper utendum est. Et sanè si hoc loco verbum illud non denotaret idem, quod necessarium, significare profectò deberet idem, quod melius, decens & consentaneum* &c. quam significationem tamquam frivolam rejicit, utpote per quam significaretur, quod agere pœnitentiam ante Baptismum non esset nisi decens, consentaneum & melius. Deinde, quorsum, inquit, diceret Concilium agere hanc Pœnitentiam ante Baptismum melius, aut decens, aut consentaneum esse, cum etiam tam ante Baptismum, quàm postea decens & consentaneum sit? Vide plura apud eundem authorem.

Pag. 666.

Addo quod hæretici ipsi Tridentinum sic intellexerint, ut per particulam oportet significaretur, quod necessarium est, & non tantum consentaneum: prout constare potest ex verbis Kemnitij supra citatis: cæterum Catholici hanc interpretationem non improbarunt, sed tamquam verissimam admiserunt, ut patet ex responso Ravensteyn supra citato.

§. 2.

Aliter fortè respondebitur, quod Tridentinum agat de justificatione sine Sacramento, ad quam fatebuntur quidem requiri aliquam dilectionem Dei propter se: nequaquam tamen ad justificationem cum Sacramento.

Sup.n.97. Sed huiusmodi responsio caret omni probabilitate, eamque doctè confutat P. Vasquez, & meritò, quia, ut idem observat, cum describitur ordo dispositionum, quibus homo paulatim disponitur, numeratur ultimo loco *Pœnitentia, quam agere oportet ANTE BAPTISMUM, & cap. 7. cum recensentur causa justificationis, instrumentalis dicitur esse BAPTISMUS.* Ergo agitur de justificatione cum Baptismo, ac per consequens cum Sacramento.

§. V. *Praoccupatur quadam obiectio.*

**A**DVERSUS prædicta unicum moveri solet argumentum examine dignum. Hoc nimirum: verbum *oportet* non tantum refertur ad dilectionem Dei tamquam fontis omnis Justitiæ: sed etiam ad *divinam Iustitiam* timorem, quo utiliter concutiuntur peccatores: atqui falsum est, quod particula *oportet* significet timorem Divinæ Justitiæ ad justificationem esse necessarium, quid enim vetat quempiam nullo prævio timore solius fidei, spei & charitatis subsidio justificari? Ergo iridem falsum est, quod particula *oportet* significet dilectionem Dei esse necessariam.

Sed quæro, quo revelante didicerint particulam *oportet* ad omnia præcedentia referendam? Cur non ad proximè præcedentia? Certè Canon tertius ejusdem sessionis, qui correspondet huic capiti sexto, timoris non meminit, sed solius fidei, spei, dilectionis, ac demùm pœnitentiæ, hoc ipso satis insinuans solam fidem, spem & dilectionem esse dispositiones ad justificationem necessarias.

Et verò, particula *oportet* referenda est ad illud *propterea*, quod præcedit, particula autem *propterea* ad solam dilectionem Dei refertur: si enim referretur ad omnia præcedentia, jam foret hic sensus: *moventur adversus peccata per odium aliquod & detestationem, propterea quod credunt vera esse, quæ divinitus revelata & promissa sunt*, qui sensus minùs congruit, non enim necessariò propterea detestamur peccata, quia vera sunt, quæ divinitus revelata & promissa sunt, sed ob alia motiva.

Imò, nisi me fallit conjectura, vox *propterea* singularem Emphasim continet ratione cujus ad timorem referri nullatenus possit. Si enim agentè legatur Tridentinum apparebit, quod vox *propterea* significet

im-

impium per fidem, timorem, & spem nondum moveri adversus peccata, sed adversus pœnas: sed tùm demùm moveri adversus peccata ipsa, quando ex affectu benevolentiae incipit Deum offensum diligere, motu illo, quo *alicui peccatum displicet secundum se ipsum & non iam propter supplicia*, ut loquitur D. Thomas.

3.p.q.85.  
art. 5.

Quare particula causalis *propterea* non leviter expendenda est, reddit enim causam cur baptizandus moveatur adversus peccata secundum se, & non adversus pœnas & propria incommoda. Quod maximè apparebit, si cogitemus hanc esse legitimam paraphrasim verborum Tridentini: peccatores timore pœnarum concussi, & spe præmiorum erecti, tandem Deum *tamquam omnis iustitia fontem diligere incipiunt*, & quia jam incipiunt non tantum Deum timere, sed etiam diligere, *propterea*, vel si malis *idecirco* moventur non amplius adversus pœnas, sed adversus ipsamet peccata per odium aliquod & detestationem, non pœnarum, sed ipsorummet peccatorum, hoc est per eam Penitentiam, quam ante Baptismum agi oportet.

Datâ hâc paraphrasi, quæ textui congruentissima est, quis eâdem operâ non videt particulam *propterea* & oportet ad timorem nullatenus posse referri? Siquidem particula *propterea* non reddit simpliciter causam cur peccatores moveantur, sed cur moveantur adversus peccata, cùm antedilectionem Dei tamquam fontis omnis iustitiæ nondum moverentur adversus peccata, sed adversus pœnas & propria incommoda.

Illustrari potest hæc responsio similitudine quâ utitur Enchiridion colonienſe, scilicet filiorum, qui *graviter in Parentes deliquerunt*. Primum enim metu pœna, seu plagarum, peccatum oderunt, deindè paternæ pietatis memoriâ jubente, ubi fiduciam reditus in gratiam acceperint, etiam ex amore præterita commissa detestantur, sic, ut etsi nullus deinceps imminet pœna novæ, tamen sciens rursus admittere nolint, quod Parentes illorum offendit. Videntur enim Tridentinum similem progressum in justificatione descripsisse, nimirum, ut ex metu servili transcuratur ad amorem, & peccatorum secundum se detestationem.

Prætermitto aliam responsionem, scilicet falsum esse, quod impius possit justificari absque ullo prævio timore, nam juxta Augustinum de catechizandis rudibus cap. 5. *Rarissimè accidit, imò verè nunquam, ut quisquam veniat volens fieri Christianus, qui non sit aliquo Dei timore percussus*: vulgatum est illud ejusdem tractatu 9. in Joannem: *Si nullus timor, non est quâ intret charitas, sicut v. denique per se iam &c.* videri potest Estius in 3. dist. 34. §. 7. & recenter Ex. P. M. Lupus c. 8. dissertationis dogmaticæ de Contritione, ubi doctè & eleganter id probat.

r. 2. disp.  
203. n. 97.  
p. 667.

Illud tantum observandum ex Patre Vasquez, quod Tridentinum non agat de quacumque justificatione, sed de justificatione hominis impij, id est hominis infidelis & idolorum cultoris, qui dum convertitur ad fidem & audit destinata peccatoribus aeterna supplicia, non potest non esse aliquo Dei vindicis timore percutsus.

## ARGUMENTUM SECUNDUM.

Trident.  
sess. 6. c. 7.

FIDES NISI ADEAM SPES ACCEDAT ET CHARITAS, *saltem initialis* NEQUE UNIT PERFECTE CUM CHRISTO, NEQUE CORPORIS EUS VIVUM MEMBRUM EFFICIT, *quâ ratione verisimè dicitur, fidem sine* OPERIBUS *mortuam & otiosam esse: & in Christo Iesu neque Circumcisionem aliquid valere, neque praputium, sed fidem, qua per* CHARITATEM *operatur.* Ergo si Attritio destituatur omni motu charitatis, saltem initialis, neque uniet perfecte hominem cum Christo, neque corporis ejus vivum membrum efficiet.

## ARGUMENTUM TERTIUM.

Ibidem.

FIDES SINE SPE ET CHARITATE VITAM AETERNAM PRÆSTARE NON POTEST: ergo nec Attritio servilis.

**P**Rior propositio utriusque argumenti constat verbis Tridentini, consequentia autem videtur evidens, maxime apud eos qui docent, quod Attritio servilis sit actus spei, quæ sine charitate, saltem initiali, neque unionem cum Christo, neque vitam aeternam præstare potest.

§. I. *Ostenditur Tridentinum verbis allegatis non agere de habitu charitatis, sed de actu.*

**I**N promptu quibusdam erit responsio, quod Tridentino non sit sermo nisi de habitu charitatis, qui in justificatione infunditur cum habitu fidei & spei: ac proinde nihil probari de actu charitatis.

Ast ego asseveranter contendo Tridentino sermonem potissimum esse de actu charitatis, quæ de re non dubitabit, qui Tridentinum non oscitanter legerit.

PRIMÒ. Quia Tridentinum, ut probet, quod fides non uniat perfecte cum Christo, nisi ad eam spes accedat & charitas: adfert illa verba Apostoli dicentis, *fidem sine operibus mortuam & otiosam esse.* Item, *in Christo Iesu neque circumcisionem aliquid valere, neque prap-*  
pu-

*putium, sed fidem, qua per charitatem operatur.* Quæ verba ad solum habitum charitatis non nisi ineptè referri possunt.

Quod ut evidenter constet, quæro, sitne illa Tridentino digna consequentia: *Verissimè dicitur fidem sine operibus mortuam & otiosam esse: ergo fides nisi ad eam spes habitualis accedat, & charitas habitualis, non unit perfectè cum Christo &c.* Item: *In Christo Iesu, neque circumcisio aliquid valet, neque præputium, sed fides, qua per charitatem operatur:* ergo fides sine habitu spei & charitatis non efficit vivum corporis Christi membrum? Quis non palpat, quàm indigna sit Tridentinis Patribus tam futilis consecutio?

SECUNDÒ. Cùm Tridentinum dixisset, quod *sine spe & charitate fides vitam æternam præstare non potest*, addit: *undè & Catechumeni statim verbum Christi audiunt: Si vis ad vitam ingredi serva mandata.* Porro servare mandata potiùs ad actus, quàm ad habitus pertinet. Ergo sermo erat de actu charitatis, quo mandata Divina servantur, non de habitu.

Verùm, ut luce meridianâ clariùs appareat, Tridentinò præcipuum sermonem esse de actu charitatis, lubet investigare quò referenda sint illa verba Tridentini: *Hanc fidem autè Baptismi Sacramentum ex Apostolorum traditione Catechumeni ab Ecclesia petunt, cùm petunt fidem vitam æternam præstantem, quam sine spe & charitate fides præstare non potest, undè & statim verbum Christi audiunt: Si vis ad vitam ingredi, serva mandata.* Quæritur, inquam, quò illa fidei petitio, & verbi Christi auditio referenda sit?

Et quidem minimè dubius sum, quin illis verbis designetur ritus & ceremonia Baptismo præmitti solita, quam nobis sic exhibet Rituale Romanum: *Sacerdos initio interrogat Catechumenum, quid petat ab Ecclesia? Respondet, fidem. Quid tibi præstat? Respondet, vitam æternam: Sacerdos, si vis habere vitam æternam serva mandata, diliges Dominum Deum tuum &c.* Ubi manifestum est describi ceremoniam à Tridentino suprâ expressam, cùm sint eadem ipsissima verba.

Ex quibus firmum hoc ducitur argumentum. Charitas sine qua fides vitam æternam præstare non potest, est illa quæ continetur his verbis: *Diliges Dominum Deum tuum &c.* atqui verbis illis: *Diliges Dominum Deum tuum &c.* nemo Catholicus ambigit sermonem fieri de charitatis actu. Ergo charitas sine qua fides vitam æternam præstare non potest, est charitas actus.

TERTIÒ. Capite septimo Tridentini, in quo versamur, *reijcitur* L. 1. de ju.  
*sententia Lutheri de sola fide, ut author est Bellarminus. Doccebat ass-* Rific. c. 2.  
tem

tem Lutherus solam fidem iustificare, nec requiri bona opera spei, aut charitatis, prout constat ex ejus verbis apud Bellarminum: *Ego dico quia angusta est via, oportet se fieri tenuem, si vis per eam venire. Ceterum, qui operibus onerati sunt, sicut conchiliarius omnes videmus Iacobi peregrinos, non poterunt intrare, & infra: Si venieris cum magnis sacculis operum plenus, deponere oportebit, alioqui non poteris penetrare.*

Sed clarius hoc expressit idem Lutherus in cap. 2. Epistolae ad Galatas: *Hoc, inquit, Sophista caeci non intelligunt, id. o somnians fidem non iustificare nisi faciat OPERA CHARITATIS. Hoc modo fides, qua creditur in Christum fit otiosa & irrita, quia ei detrahatur vis iustificandi, nisi formata sit charitate. Tu vero sepones iam legem & CHARITATEM in alium locum &c. Noluerunt tamen seponere Catholici, ac propterea in Tridentino decreverunt, quod fides nisi ad eam spes accedat & charitas, neque unius perfectè cum Christo, neque corpori eius vivum membrum efficit.*

Huc etiam spectat, quod scribit Lutherus in cap. 4. ejusdem Epistolae: *Error & impietas est asserere, fidem infusam non iustificare nisi ornata sit OPERIBUS CHARITATIS.*

Et in caput 13. Epistolae ad Hebraeos: *Solâ enim fide in Christum --- tota Ecclesia ab initio mundi, usque in finem iustificatur. Sic solâ fide, ut neque ratio, neque lex neque plenitudo ipsa Legu, qua dicitur CHARITAS. Fides enim ante spem & charitatem sola accipit remissionem peccatorum, propter solum Christum, facitq; per eundem personam gratiam ante, & absq; charitatis merito.*

Adversus hunc errorem decernit Tridentinum, quod ad fidem accedere debeant opera spei & charitatis, quod sola fides sine operibus non efficiat vivum corporis Christi membrum: quod non præstet vitam æternam, quia fides sine operibus mortua & otiosa est, quia requiritur fides, quæ per charitatem operatur.

Atque hic mihi videtur legitimus verborum Tridentini sensus, neque percipio, quid attinuerit ad Tridentinum verbis illis tractare de solo habitu spei, vel charitatis.

#### §. II. Praoccupantur quedam adversus prædicta obiectiones..

**E**ximendus duplex ex animo Lectoris scrupulus, ne in via plana perperam hæreat.

Primus est. Tridentinum docet, quod in iustificatione, *hac omnia simul INFUSA accipit homo per Iesum Christum cui inseritur, fidem, spem, & charitatem.* Ubi vox infusa habitum denotat, propterea quod actus vitales, non bene dicantur infundi.

Verum



Verum, merus est scrupulus: constat enim ex publicis Ecclesie precibus non solummodo habitum, sed etiam vitalem actum & affectum charitatis cordibus nostris infundi. Quid enim manifestius, quam quod recitat Ecclesia Dominicâ quintâ post Pentecosten: *Deus, qui diligentibus se invisibilia bona praparasisti, INFUNDE cordibus nostris tui amoris affectum?* Et illud in hymno de S. Spiritu: *infunde amorem cordibus?* Sic etiam Arausicanum capite ultimo agens de opere bono, dicit, quod Deus nobis nulla precedentibus bonis meritis fidem & amorem suum prius inspirat. Videri potest Suarez tom. 2. de gratia, ubi docet etiam primum actum dilectionis infundi. Fufissimè P. Vasquez L. 8 c. 13. n. 1. 2. disp. 203. n. 115. pag. 671. qui etiam n. 116. fatetur verba 4 p. 144. Tridentini, cui inseritur per fidem, spem & charitatem, de actibus ipsis posse intelligi.

Alter scrupulus est, quod Tridentinum dicat fidem, spem, & charitatem simul infundi: certum autem est actus fidei, spei, & charitatis non infundi simul, sed successivè.

Verum, hunc offensionis scrupulum exemerunt illi ipsi, qui à nobis dissentiunt, Theologi: fatentur enim prius etiam infundi habitum fidei, & spei, quam habitum charitatis, prout videri potest apud Patrem Coninck de actibus supernaturalibus, ubi in hujus doctrinæ patrocinium profert Medinam, Suarem, Vasquez, Valentiam, Turrianum, Lorcam &c. Quare illis peræquè explicandum est, quo sensu Tridentinum asseruerit, fidem, spem, & charitatem simul infundi. Disp. 6. dub. 4 n. 52 p. 96.

Arridet autem maximè, quod respondet P. Vasquez, sensum Tridentini esse, in tota serie significationis hac tria infundi homini, quamvis fidem & spem, prius tempore, quam charitatem accipiat is qui iustificatur. 1. 2. disp. 203. n. 118. pag. 672. Particula enim simul accipitur pro eo quod est pariter, prout usurpatur in cap. firmiter de summa Trinitate, & Ecclesiastici 18. Qui vivit in æternum creavit omnia simul. Vide eundem 1. p. disp. 124. c. 2. & 4.

Quod autem particula simul non designet in Tridentino simultaneam, ut loquuntur, temporis, satis indicat idem Concilium, quando dicit quod ad fidem accedere debeat spes & charitas: quomodo enim sibi invicem accederent, si eodem temporis momento cor poenitentis occuparent?

Sensus ergo Tridentini est, quod in totali hominis conversione & justificatione, peccatori non infundatur solus actus fidei (prout docebant hæretici) sed etiam actus spei & charitatis, ità ut omnes illi tres actus simul, seu similiter, & ex æquali necessitate infundantur:

## ARGUMENTUM QUARTUM.

Trident.  
sess. 14 c. i.

*Pœnitentia univērsis hominibus, qui se mortali aliquo peccato inquinassent, quovis tempore ad gratiam & iustitiam assequendam fuit necessaria, illis etiam, qui Baptismi Sacramento ablui petivissent: sed Pœnitentia nunquam est sine actu charitatis, saltem initialis. Ergo talis actus est necessarius &c.*

**V**T percipiatur vis argumenti propositi, juvabit nonnulla præmittere, & tum demum efficaciter concludere.

§. I. *Quod detur duplex Pœnitentia, quarum una ad amicitiam resarciendam aspirat, alia solam proprii damni fugam spectat.*

**O**bservo duplicis generis esse pœnitentiam: una est, quæ ad reconciliationem animorum, cordium consociationem, & amicitiam resarciendam tota dirigitur, eamque fuisse læsam vehementer affligitur. Talis est pœnitentia conjugum, si fortè post dissidium, affectu verè conjugali reconciliantur: talis est pœnitentia filiorum ad pristinum læsæ paternæ amicitiae favorem animo filiali redire cupientium. Et hæc pœnitentia, cum ad reconciliationem tota dirigatur, non de nihilo vocari poterit pœnitentia reconciliandorum.

Alia est pœnitentia, quæ solam facti præteriti, auctori suo noxii, qualem qualem retractationem contemplatur, nullâ ante oculos sibi propositâ amicitiae resarciendæ, aut animorum reconciliandorum curâ aut sollicitudine. Talis est pœnitentia servorum, quos facti pœnitent, non quod amicitiae iura violaverint, sed quod jumento suo malum accersiverint, unde de comparanda Heri amicitia nihilum, de vitandis flagris, unicè solliciti sunt.

§. II. *Ostenditur quod Pœnitentia Christiana ad amicitia reconciliationem dirigatur.*

**P**erspiciuè hoc colligitur ex Canone primo sessionis præsentis, ubi infligitur anathema, si quis dixerit POENITENTIAM non esse verè & propriè Sacramentum pro fidelibus quoties post Baptismum in peccata labuntur, ipsi Deo RECONCILIANDIS, à Christo Domino nostro institutum.

Item ex capite tertio, ubi dicitur, quod res & effectus Sacramenti

Pæ-

Pœnitentiæ, quantum ad eius vim & efficaciam pertinet, RECONCILIATIO est cum Deo.

Item ex capite quarto, in quo Contritio dicitur aliquando hominem Deo RECONCILIARE, ipsam nihilominus RECONCILIATIONEM ipsi Contritioni sine Sacramenti voto, quod in illa includitur non esse adscribendam. Ex quibus satis apparet, quod totum hoc forum pœnitentiæ ad reconciliationem, & refarciendam cum Deo amicitiam ordinetur. Sic etiam D. Thomas in Pœnitentia, inquit, non queritur 3 p. q. 90. art. 2. c.  
sola redintegratio aequalitatis iustitia (sicut in iustitia vindicativa) sed magis RECONCILIATIO AMICITIÆ.

Quid? Quod hoc Sacramentum à reconciliatione nomen acciperit, & reconciliationis Sacramentum passim appelleretur?

§. III. Pœnitentia, quæ ad reconciliationem dirigitur, debet ex aliquo benevolo in personam offensam affectu provenire.

**V**eritas hæc non aliundè, quam sanctissimis ipsius naturæ & amicitia legibus confirmanda est. Quis enim, obsecro, vult ferio amicitiam refarcire, qui ne minimam quidem amicitia scintillam in offensum amicum vult excitare? Quâ fronte benevolentiam expectat, qui benevolentiam pendere recusat? Aut quomodò te pœnitent amicitia iura violasse, qui aspernaris læsum amicum, vel exiguo amicitia vinculo, tibi devincire?

Fingamus animo nescio quid dissidij subortum inter conjuges ardentissimo suâ invicem amore prius flagrantes. Demus uxorem suâ culpâ tali dissidio causam dedisse, & quia plurima ex illo dissidio persentiscit incommoda, velle ab offenso marito priorem conjugalem benevolentiam obtinere, Maritumque affari his verbis: *Pœnitet me, mi marite, quod amicitia iura perperam violaverim, usu enim cognosco quantum inde damni & incommodi tui mea acceperis: & quamvis te nullo benevolentia complectar affectu, cupio tamen ad pristinum benevolentia & amicitia tue favorem admitti, eundemque in scrinio cordis, & sinu amoris tui locum possidere.*

Lectoris fidem hîc obtestor, sitne illa futura reconciliandæ cum marito uxoris, & ad pristinam amicitiam impetrandam idonea, & sicut oportet, pœnitentiæ? Rogo, an non jure merito reponet Maritus: *quid molestia es uxor? quid inutiliter amicitia reconciliationem exigui, quæ destituta es omni dilectione amicitia? Quid à me benevolentiam flagitas, quæ nullâ me dignaris benevolentia? Quid locum in scrinio cordis, & sinu amoris ab eo postulas, qui nullum in scrinio cordis, & sinu amoris tui locum possi-*

*posideri? Vix amari uxor? Ama. Vis benevolentiam mariti? Marito bene velis uxor. Amor amorem parit, benevolentia benevolentiam. Si tuâ, non meâ causâ, facti, te pœnitet, tecum amicitiam habe, mibiq; me relinque.*

Hæc iustè à marito responderi, quis non fateatur? Quis igitur non videat, pœnitentiam illam, quæ nullâ benevolentiae in personam læsam flammâ accenditur, & ex solo proprii commodi amore nascitur, nequaquam esse pœnitentiam reconciliandorum, & amicitiae reintegrationi accommodatam?

§. IV. *Idem probatur auctoritate Tridentini.*

**N**E quis verò existimet nos solâ ratione pugnare, placet auctoritate doctrinam nostram confirmare. Ac imprimis Tridentinum satis innuit, quod pœnitentia Christiana debeat ex aliquo benevolenti in Deum amore provenire, quando sess. 6. Can. 3. fidei, spei & dilectioni subjungit pœnitentiam ex illis veluti fontibus promanantem.

2. ad Cor.  
7. v. 10.

Et cap. 14. ibidem docet Tridentinum, Christiani hominis pœnitentiam contineri his verbis Apostoli: *Quæ secundum Deum tristitia est, pœnitentiam in salutem stabilem operatur*, per tristitiam autem secundum Deum intelligitur ab Interpretibus illa, quæ ex charitate, saltem initiali oritur. Undè Cornelius à Lapide ex Chrysostomo & Cassiano refert, quod tristitia, quæ pœnitentiam in salutem stabilem operatur, sit tristitia *ex Dei charitate descendens*. Quid? Quod Melchior Canus putat hanc propositionem definitam in Tridentino: *Primum actus pœnitentia nunquam est sine actu charitativum*? Eandemque propositionem asserit esse Magistri, Gratiani, D. Thomæ, Dur. Ca-preoli &c.

De pœni-  
tentia re-  
lect. 1.

Utor autem libenter testimonio Melchioris Cani, partim quia Tridentino interfuit, partim quia teste Morino primus docuit Attritionem servilem pœnitenti cognitam sufficere cum Sacramento Pœnitentiae.

§. V. *Explicatur argumentum suprâ positum.*

**E**X dictis apparet vis & pondus argumenti suprâ positi, quod in hunc modum formari potest.

Pœnitentia, quam universis lapsis necessariam esse declarat Tridentinum, est pœnitentia reconciliandorum, ut dictum est §. 2. Atqui pœnitentia reconciliandorum debet provenire ex aliquo benevolenti affectu in personam offensam, ut jam dictum est, quam in presenti Deum esse nemo dubitat. Ergo pœnitentia, quam universis lapsis neces-

necessariam esse declarat Tridentinum, debet provenire ex aliquo benevolo in Deum affectu.

Huic argumento fortè satisfiet dicendo casum Attritionis excipi à præcepto & necessitate pœnitentiæ. Ab hac responsione & *expeditâ & commodissimâ* solutione non videtur abhorreere quidam Recentior scribens: *quod autem Attritio in aliquibus casibus sufficit ad iustificationem, ut iam dictum est, id non est quia per illam præcepto de pœnitentia propriè satisfiat, sed quia casus illi sunt excepti à lege ordinaria de necessitate pœnitentia ad iustificationem.*

Valent. t. 4.  
disp. 7 q. 8.  
puncto 3.  
col. 161.

Verùm nullius momenti est & ab ipso Tridentino exclusa istiusmodi exceptio: ne quis enim existimaret pœnitentiam nonnisi extra Sacramentum esse necessariam, disertis verbis ait, *pœnitentia UNIVERSIS &c. QUOVIS TEMPORE ad gratiam & iustitiam assequendam suis necessaria*, atque ut præsentiam exceptionem præveniret, addidit: *etiam illi, qui BAPTISMI SACRAMENTO ablui petivissent.* Quibus verbis nihil clariùs à me ipso posse dici fateor.

Deindè Tridentinum sess. 6. cap. 6. disertè dicit: *POENITENTIAM ante Baptismum agi OPORTET*, & sess. 14. cap. 6. dicit, de absolutione Sacerdotis, *nec enim sine POENITENTIA remissionem ullam peccatorum præstaret.* Quid manifestius?

## ARGUMENTUM QUINTUM.

*Pœnitentia salutaris debet aliquo modo aversari peccatum, ut est OFFENSA DEI: sed in odio peccati, ut est Dei offensa intrinsecè & inseparabiliter includitur amor Dei, idq. non concupiscentia tantùm, verùm etiam benevolentia.* Ergo pœnitentia salutaris intrinsecè & inseparabiliter includit amorem Dei. Trident. sess. 14. c. 1.

### §. 1. Quadam præmittuntur.

**O**bservandum ex Ruaro Tappero, quod nomine *offense*, non intelligitur ira Dei, vel voluntas vindicandi, sed indignatio, quæ opponitur amorì, quo nos quasi filios, & amicos specialiter diligit ad paternam suam hereditatem. Quod ex D. Thoma & Capreolo probat. Pag. 190.

Porrò indignatio illa oritur ex quadam læsione, offendere enim idem est quod lædere, etsi enim offendere ex primaria significatione idem significet quod in aliquid incidere, tamen quoniam qui incidunt in aliquid, se lædere sæpè solent in eo in quod incidunt, factum est, ut offendere pro lædere usurpetur, inquit Ambrosius Calepinus, hinc etiam in iure offensus id est, læsus à Iudice ad offensorem accusandum cogi potest juxta Bartholum in l. in eum ff. de accusat.

Ex quo consequitur 1. quod quando quaeritur an poenitens doleat propter Dei offensam, sensus sit, utrum poenitens doleat propter Dei læsionem, seu quia Deum opt. max. quantum in se est, læsit?

Consequitur 2. quod si velimus propriè loqui, fur qui dolet de peccato commisso propter solum metum supplicij, non doleat, quod Judicem offenderit, seu læserit, sed potiùs quod seipsum offenderit. His præmissi non erit operosum argumenti propositi vim percipere.

§. II. *Ostenditur quod poenitentia salutaris debeat aliquo modo adversari peccatum, ut est offensa Dei.*

**P**ostquam Tridentinum dixisset poenitentiam quovis tempore fuisse necessariam, illis etiam, qui Baptismi sacramento ablui petivissent, declarat cujusmodi debeat esse illa poenitentia, nimirum, ut perversitate abiectâ & emendatâ, tantam Dei OFFENSIONEM cum peccati odio & pio animi dolore deestarentur. Quibus verbis perspicuè significat, quod poenitentia salutaris, debeat averfari peccatum, ut est offensa Dei. Quid enim aliud denotant illa expressissima verba: *tanquam Dei offensionem*? Quo prætextu, vel colore, aliud hîc intellexeris, quàm proprium, de quo agitur, poenitentiae motivum?

L. 6 c. 30.  
pag. 109.

Atque ita Tridentinum interpretatus fuisse videtur Alphonsus Vega sic loquens: *Qui Deum agnoscunt nostris peccatis offendi, nunquam certe ad ipsum gratiam perveniunt, nisi & de ipsis doleant, quatenus OFFENSÆ illius fuerunt, & amore in ipsum redeant, à quo se malè per ea avertunt.*

L. 3. c. 4.

Ita etiam Tridentinum intellexisse videntur plerique Scholastici, dum ad salutarem poenitentiam exigunt detestationem peccati prout est offensa Dei. Inter quos Cardinalis Franciscus Toletus, cùm recensuisset varias species Attritionis, prima quidem Attritio, inquit, est talis, ut cognoscat poenitens se non detestari peccatum, ut est Dei OFFENSA, sed tantum ut est alicuius mali causa & POENÆ INFERNI, quamvis bonus actus iste sit, tamen non sufficit ad Sacramentum, imò, qui sic accederet, peccaret denud & non impleteret præceptum, sed esset repetendum Sacramentum. Monet Proinde Confessarios, ut considerent, qualiter poenitentes admittant ad confessionem: non enim sunt admittendi, nisi qui peccata detestantur, ut OFFENSA Dei sunt.

Pag. 187.

Item Ruardus Tapperus ad articulum 5. dicens, quod *ne homo quidem iustus placaretur, cùm is qui læsit nullam ipsius in dolore habet rationem, nec ab eo in amicitiam reciperetur, qui iacturam propriam sentit & dolet, non amici OFFENSIONEM.*

Item

Item Reginaldus, qui agens de Contritione sufficiente ad absolutionem sacramentalem dicit, quod Confessarius proponere poterit pœnitenti ad Confessionem fructuosam requiri, ut ipse illa sua peccata tamquam OFFENSAS Dei ita detestetur, ut generaliter in quodcumque malum incurrisse malit, quam in peccatum per quod Deum summum omnium bonum à se alienavit, cumq; sibi de Patre amantissimo fecit inimicum, & supra quam dici potest reddidit: itatum.

De prud.  
Confess. c.  
§. lect. 1.  
P. 103.

Item Tannerus dum ita argumentatur: Pœnitentia destruit peccatum, ut est OFFENSA Dei boni supernaturalis. Ergo DEBET aliquo modo averfari peccatum ut est talis OFFENSA. Et insinuat: Propterea iuxta S. Thomam q. 86. a. 1. ad 1. Pœnitentia Antiochi non erat fructuosa 1. Machab. 9. quia dolebat de culpa præterita non propter OFFENSAM DEI, sed propter infirmitatem corporalem, quam patiebatur.

Disp. 6. q. 6.  
dub. 4. n. 88  
P. 155.

Item Stapletonus Antidoti Evangelici tomo 2. in caput primum Marci, simul declarans quod semper peccati præteriti odium, & propter OFFENSUM Deum tristitiam ac dolorem Scriptura à pœnitentibus flagitat.

Pag. 453.

Item Valentia scribens: Obiectum pœnitentia est peccatum quatenus destrui & aboleri debet, ut fuit OFFENSA Dei. Qui etiam addit postea, quod neque Lutherus ipse, qui dixit Pœnitentiam nihil aliud esse, quam propositum melioris vite, negasset in hoc ipso melioris vite proposito contineri quamdam veluti detestationem atque destructionem præteriti peccati, ut fuit OFFENSA DEI.

3. p. disp. 7.  
q. 2 p. 150a  
Pag. 1499.

Item Ludovicus Carbo de Præceptis Ecclesiæ: Nulla Attritio, qua non dolet de peccato, aliquo pacto ut est OFFENSA DEI, sed tantum ob aliam causam, habet vim iustificandi cum Sacramento coniuncta. Quoniam & Divina litera & sancti Patres planè docent dolorem debere esse de peccato, ut est OFFENSA DEI. Neque enim par est, ut peccatum remittatur, nisi habeatur ratio eius, qui offensus est.

C. 13. P. 55.

§. III. Eadem doctrina ex D. Thoma, Enchiridio Coloniensi, imò & ipsâ lege natura comprobatur.

**N**equè mirum, quod Tridentinum ad salutarem pœnitentiam requisiverit dolorem de peccato, ut est offensa Dei, quandoquidem eandem doctrinam ante Tridentinum plerique Theologi, & specialiter D. Thomas tradiderint.

Quid enim manifestius, quam quod scribit 3. parte q. 84. art. 5. ad 2. Ex quo aliquis peccatum incurrit, charitas, fides, & misericordia non liberant hominem à peccato sine Pœnitentia. Requirit enim charitas, quod homo doleat de OFFENSA in amicum commissa.

Item

Item quæst. 85. art. 1. ad 3. *Dolor* (Pœnitentis) est displicentia, seu reprobatio facti prateriti cum intentione removendi sequelam ipsum scilicet OFFENSAM DEI, & reatum pœna.

Item articulo 2. *Manifestum est quod in Pœnitentia invenitur specialis ratio actus laudabilis, scilicet operari ad destructionem peccati prateriti, in quantum est DEI OFFENSA.*

Et iterum articulo 3. *Pœnitentia non habet, quod sit virtus specialis, ex hoc solo, quod dolet de malo perpetrato (ad hoc enim sufficeret charitas) sed ex eo, quod pœnitens dolet de peccato commisso, in quantum est OFFENSA DEI &c.*

Ejusdem sententiæ est Enchiridion Colonienſe dicens: Neque tamen putandum est hunc timorem servilem, qui ex metu supplicij ducit originem, & horrorem incutit peccatorum, Pœnitentiam totam absolvere. Quid igitur ultra? *Ut timorem servilem comitetur timor filio dignus, cui commissa displicent, non iam quod pertrahant in gehennam, sed quod Patrem optimum, ac sic de nobis meritum OFFENDUNT.*

Et Academia Lovanienſis in ſua Confessione Catholica de articulis controversis, facta Anno 1544 tamquam rem certissimam tradit articulo 4. quod Contritio ad salutem necessaria, sit *dolor de peccatis propter DEI OFFENSAM susceptum.*

Omitto veteres omnes Scholasticos, quorum unanimis & concors fuit sententia, quod pœnitens debeat detestari peccatum, ut est *offensa Dei*: omitto Augustinum in Psalmum 118. scribere, quod timor non sit castus, nisi, *quo timetur OFFENDI, qui amatur*, omitto, quod aliis retuli ex D. Antonino, quemdam Scholarem Parisiensem declarasse se damnatum, eo quod de peccatis doluisset propter timorem inferni, & *non ex amore Dei, & principaliter propter DEI OFFENSAM*: Unicum illud assero, quod ipsa naturæ & amicitiae lex nos doceat, non esse amico dignam peccati pœnitentiam, quæ non ex amici offensione, sed ex solius proprii incommodi consideratione nascitur.

Pulchrè id exponit Albertus Pighius controversiâ 9. Si quis, inquit, homini, quem offendit, si servus domino diceret, & verè diceret: *doleo equidem vehementer, quod te offenderim, non tamen propter te, sed propter me doleo, quia ob tuam offensam, merito cædor, vinculum constringer, bonis, quibus tibi obsequentes suavius perscruntur, ego miser careo.* Numquid hic talis Pœnitentia offensæ istiusmodi, à Domino impetraret veniam? Deo ita dicit, *quisquis ita dolet, quod ipsum offenderit, cum eius oculos nihil lateat, sed nostra omnia, qualia sunt, talia illi se produnt, atque esse loquuntur. Non fallitur, non irridetur. Debes sanè dolor offensæ impetrativum venia, esse de pecca-*

Disquisit.  
Theol. de  
pec. dub.  
c. 8 §. 4.  
num. 19.



peccato, quia OFFENSA illius est, quem offendimus, & non tantum quia nobis damnosa & incommoda.

Quæ Alberti Pighij ratiocinatio fecit, ut Ruardus Tapperus opinionem, quæ docet, quod Attritio ex solo timore pœnarum supernaturalium proveniens, sit idonea dispositio, ad Sacramentorum Baptismi & Pœnitentie gratiam percipiendam, postea vocaret consolatoriam & incertam. Nam, inquit, ne homo quidem iustus placaretur, cum is, qui læsit, nullam ipsius in dolore habet rationem, nec ab eo in amicitiam reciperetur, qui iacturam propriam sentit, & dolet, non amici offensionem.

Pag. 185.

Pag. 186.

Pag. 18. col. 2.

Sed & Jacobus Latomus, ad articulum 3. affirmat, quod pœnitentia, & dolere de offensa Dei, est iurius natura, suppositâ fide, habentiu vim obligandi peccatorem, pro statulegius natura, legi Moysei, & legi Evangelica.

Non ignoro, quod P. Vasquez excipiat statum legis Evangelicæ. Sic enim scribit: cum verò dicitur Pœnitentia, in omni statu, & lege necessaria ad iustificationem, quia nunquam sine illa obtineri potuit sub ulla lege: de statu naturalis, & Mosaica legi intelligendum est. At verò in lege Evangelica, ita intelligitur, ut non intelligamus semper esse necessariam Pœnitentiam, quàm Contritionem, quæ est dolor peccati, ut est OFFENSA DEI, appellamus.

3.p.q.86. art. 1. dub. 1. n. 10.

Sed in eo fallitur, ut patet ex dictis, & constabit ex dicendis in argumento septimo, ubi ostendemus, quod verus Contritionis motus, etiam in statu legis Evangelicæ, sit ad iustificationem cum Sacramento necessarius.

§. IV. Declaratur, quod in odio peccati, ut est DEI OFFENSA, intrinsecè & inseparabiliter includatur amor benevolentia erga Deum offensum.

**H**Æc propositio nequaquam à me excogitata est, sed à R. P. Vasquez solidè demonstrata. Quare paucis absolvam: plura, qui desiderat, ipsum fontem adeat.

3.p.q. 85 a. 2. n. 41. 42. 43.

PRIMò itaque probatur, ex D. Thoma 3. parte, q. 85. art. 5. ad 1. Peccatum primò incipit displicere, maxime peccatori, propter supplicia, quæ respicit timor servili, quàm propter DEI OFFENSAM, vel peccati turpitudinem, quod pertinet ad CHARITATEM.

Item 2. 2. quæst. 19. art. 2. Si ergo aliquis convertitur ad Deum, & ei inbareat propter timorem pœna, erit timor servili: si autem propter timorem culpa, erit timor filialis. Nam filiorum est timere OFFENSAM Patris. Cæterum timor filialis non destituitur omni flammâ charitatis.

Supra nu-  
mer. 18.

SECUNDÒ. Teste Patre Vasquez OMNES FATENTUR, prater Alex-  
andrum, quod impossibile sit, ut actus odij peccati, prout est offensa  
Dei, sit alterius virtutis, quàm charitatis. Rationem accipe: Cùm eius-  
dem virtutis sit diligere bonum proprium, & odio habere malum ei contra-  
rium; sic charitatis erit diligere Deum & velle illi bonum, aut de bono illius  
gaudere propter ipsum, hoc est, quia est illius bonum, & tristiari de peccato,  
ut est illius offensa.

Num 43.

Et infrà: Sicut in actu delectationis de bono Deo, necessariò est amor  
ipsius Dei, sic in odio peccati, ut est DEI OFFENSA, INTRINSECE ET  
INSEPARABILITER INCLUDITUR AMOR IPSIUS DEI: est enim dete-  
ctatio de bono alicuius, ut illius est &c.

Disp. 5.

sect. 4. p.

497-498.

Quam argumentationem imitatus Mœratius: Gaudere de bono Dei,  
quia bonum ipsius est, est actus charitatis, ergo dolere de malo, quia malum  
eiusdem est, seu offensa, est actus charitatis: cùm eiusdem sit ferri amore &  
gaudio in bonum sibi proprium, & odio ac dolore in malum illi bono con-  
trarium.

C. 30. q. 3.

pag. 746.

TERTIÒ. Illud ipsum ità declarat Martinus Becanus: Odium  
abominationis est amor personæ, & odium rei. Sic ergo detestatio peccati,  
quatenus est OFFENSA DEI, est odium abominationis, quo displicet pec-  
catum, & placet Deus, quem offendimus: undè est odium peccati, & amor  
Dei: Amor autem Dei propter ipsum est actus Charitatis. Ergo & odium  
peccati, quatenus est contra Deum, est actus charitatis.

QUARTÒ, & in idem ferè recidit. Dolere propter Dei offensionem,  
nihil est aliud, quàm dolere propterea, quod Deum, ejusque amici-  
tiam læserimus, ut ostensum est §. 1. Qui autem tantum dolet prop-  
ter pœnas inferni, non dolet quod Deum læserit, sed quod seipsum  
læserit, seu offenderit, sibi que ipsi detrimentum & nocumentum intu-  
lerit, non autem Deo. Ergo talis non dolet propter Dei offensionem, sed  
potius propter propriam læsionem, & nocumentum.

QUINTÒ. In ejusdem doctrinæ confirmationem, profero doctissi-  
mam disputationem Alberti Pighij, quem ob præstantem in omni  
genere doctrinam, scholasticæque in primis Theologiæ peritiam Ro-  
mani Pontifices, omnibus propè Germaniæ colloquijs contra nascentem  
Lutheri hæresim coactis interesse voluerunt. Is itaque libro contro-  
vertiarum præcipuarum in controversijs Ratisponensibus ità scri-  
bit: Contritio ergo quam Deus in nobis respicit, est dolor Divinæ OFFEN-  
SAE, non nostri tamen, imò illius præcipue causa, quem offendimus. Cuius-  
modi ut sit necessariò Dei amorem ex quo procedat, prærequirit. Id quod  
evidens curque esse potest, qui amoris & odij in se attendit naturam & or-  
dinem. Nihil enim primò, & per se odisse, aut detestari possumus, sed  
ne-

neceſſe eſt, ut omne odium ex alicuius amore procedat. Eſt enim odium, aut deſteſtatio, voluntatis velut fuga quedam ab eo quod apprehenditur diſconveniens, inimicum, aut contrarium alicui cuius amore aſſicimur. Ex amore ergo aliquo, ut procedat in nobis odium ac deſteſtatio peccatorum neceſſe eſt. Is igitur aut noſtri tantum amor eſt, aut tantum Dei, aut utriuſque & noſtri & Dei. Si noſtri tantum amor ſit ex quo procedit peccatorum in nobis deſteſtatio, ut quia & hic nos ſtagellari ab illo pertimeſcimus, & adhuc peiora expectamus, & demum damnationem & cruciatuſ infernales, quos ob illa ipſa nos manere non dubitamus perpetuos, nondum eſt ea deſteſtatio, aut diſplicitia peccatorum noſtrorum, vera Contritio, digna quam Deus reſpiciat, nec veniam ea offeſſa impetrat &c.

Cumque hoc probaſſet verbis Gregorij, ita proſequitur: Si verò ex Dei tantum amore procedat eiſmodi peccatorum deſteſtatio, ac diſplicitia, ea vera eſt, qua facit cor contritum, & humile, quod Deus non deſpicit, ſed benigne reſpicit.

Quod ſi ex noſtri & Dei ſimul amore (ut plerumque ſit) illa ipſa procedat peccatorum deſteſtatio, ac diſplicitia, ita tamen ut Dei amor primas teneat, & amor noſtro praponderet, & ea quoque pœnitudo & Contritio ſalutaris eſt. Quoniam ea ita deſteſtamur Divinam OFFENSAM, ut ob rem nullam velimus offendiſſe amplius.

Quibus verbis nihil potuit efficacius adferri, probant enim ex ipſa odij peccatorum natura, quod odium peccati, ut eſt offeſſa Dei debeat provenire ex amore iplius Dei, per peccatum offeſſi, ac per conſequens, cum §. 2. probatum fuerit, quod pœnitens debeat deſteſtari peccatum, ut eſt offeſſa Dei, rectè inferitur, quod pœnitentia ſalutaris debeat ex aliquo Dei propter ſe amore provenire.

## ARGUMENTUM SEXTUM.

Ad ſalutem Pœnitentiam requiritur vera cordis ad Deum converſio, de qua Ezechielus 18. CONVERTIMINI AD ME &c. atqui vera cordis ad Deum converſio non poteſt obtineri niſi per amorem benevolentia. Ergo.

Trid. ſeſſ.  
14 cap. I.

§. I. Probatur prima propoſitio ex ipſo Tridentino, & communi ſententia Catholicorum.

**M**anifeſtè hoc colligitur ex Tridentino, quando ſeſſione 14. cap. 1. probat pœnitentiam univerſis hominibus, qui ſe mortali aliquo peccato inquinaveſſent quovis tempore ad gratiam & iuſtitiam aſſequendam fuiſſe neceſſariam, ex illis verbis Ezechielis 18. Conver-

18. Conver-  
ſimi-imi

*simini & agite Pœnitentiam ab omnibus iniquitatibus vestris.* Collectio enim Tridentini nullius erit ponderis, si ad salutem pœnitentiam non requiratur vera cordis conversio.

L. 5. de  
contr. c. 3.  
n. 1. p. 204.

Et ita videtur intellexisse Tridentinum Reginaldus, quando ex verbis Ezechielis 18. probat Contritionem esse necessariam, neque liceat aliter sentire propter Concilij Tridentini definitionem sectione 14. c. 1. hoc est propter illum ipsum locum Tridentini in quo versatur.

Pag. 137.  
Pag. 140.

Cæterum, quod ad salutem pœnitentiam requiratur cordis in Deum conversio non solius Tridentini doctrina est, sed communis Catholicorum, quam propterea Joannes à Daventria ad articulum 12. confessionis Augustanæ, simpliciter vocat *Catholicam sententiam.*

Et inferius sese explicans, tradunt Catholici, inquit, non sufficere ad peccati remissionem, si peccator tantum timeat, & peccatorum remissionem speret, sed quod oporteat eum ex toto corde dolere, & CONVERTI ad Deum, ita ut non tantum timeat, sed diligat Deum.

Undè Alphonsus Vega libro 13. cap. 6. docet, quod ex communi sententia Doctorum in justificatione requiratur *aversio à culpa, & conversio ad Deum.*

Et meritò, quia, sicut per peccatum cor hominis avertitur à Deo, ita per pœnitentiam debet ad Deum converti. Undè illud Gregorij Magni: *Tria in unoquoque considerata sunt veraciter Pœnitente: videlicet conversio mentis, confessio oris, & vindicta peccati. Nam qui corde non CONVERTITUR, quid prodest ei, si peccata confiteatur?*

§. II. *Quod vera cordis in Deum conversio, non possit destitui omni affectu benevolentia in Deum.*

**P**rimò id probatur ex verbis illis Ezechielis 18. *Convertimini ad me &c.* quibus Tridentinum utitur, ad probandum homini lapsò necessariam esse pœnitentiam, non dubitant enim generaliter Interpretes verbis illis significari, conversionem, quæ fiat per amorem benevolentia, quo solo certum est potuisse converti Judæos, quos Ezechiel alloquitur.

Undè Petrus à Soto, exquisiti vir judicij & doctrinæ, quique Tridentino interfuit, scribens adversus articulos Confessionis nomine Illustrissimi Ducis Wittembergensis oblata per Legatos ejus Concilio Tridentino 24. Jan. an. 1552. tractans locum illum Ezechielis 18. *Convertimini ad me &c.* hic locum, inquit, si rectè pensetur & dolorem, & mutationem cordis oppositam peccato, & CHARITATEM Dei docet.

Et Confirmatur: nam peccator, cum delinquit, se avertit à Deo, ut ab

*ab ultimo siue : ergo ut tollatur hac aversio, per se necessaria est formalis conversio in ultimum finem, iuxta illud: convertimini ad me, & ego conver-* Suarez 3.p.  
*sat ad vos : HÆC AUTEM CONVERSIO NON FIT NISI PER AMOREM.* q 85 disp.  
 4. lect. 1.

Præterea Scholasticos propemouum omnes, qui verba Ezechielis intelligunt de conversione in Deum per affectum charitatis, quamquam hoc in illis minùs placeat, quod de sola conversione per charitatem perfectam plerique verba Ezechielis interpretentur.

SECUNDÒ. Quod conversio cordis in Deum debeat provenire ex benevolento in Deum affectu perspicuè docet charitatis igne flagrans Bernardus epistolâ 11. ad Chartusienses, ubi explicans illa verba Psalmi 48. CONFITEBITUR TIBI CUM BENEFECERIS EI. Est, inquit, qui confiteatur Domino quoniam potens est: & est, qui confiteatur quoniam sibi bonus est, & item, qui confiteatur, quoniam simpliciter bonus est. Prius servus est, & timet sibi, secundum mercenarium est & cupit sibi, tertius filius, & deservit Patri. Itaque, & qui timet, & qui cupit, uterque pro se agunt: sola, qua in filio est charitas, non quatit, qua sua sunt. Quamobrem puto de illa d. Deum: lex Domini immaculata CONVERTENS animas, qua sola videlicet fit, qua ab amore sui & mundi avertere possit animum. Nec timor quippe, nec amor privatus CONVERTIT animam -- Charitas verò CONVERTIT animas, quas facit & voluntarias.

TERTIÒ. Juxta Authorem libri de vera & falsa pœnitentia, ver- C. 7. tomo  
*tur à peccato, qui iam vult dimittere peccatum: CONVERTITUR, qui iam* 4. Aug. p.  
*totum & omnino vertitur, qui iam non tantum poenitas non timet, sed ad* 516.  
*bonum Deum contendere festinat. Ex quo loco antiqui Scholastici pas-*  
*sim colligunt, quod ad conversionem cordis ad Deum, requiratur*  
*affectus alicujus charitatis in Deum.*

§. III. Vera ratio præmissa doctrina ex eo petita, quod in amore concupiscentia, homo potius seipsum habeat pro scopo, quam Deum, ac proinde potius convertatur ad seipsum, quam ad Deum.

QUARTÒ. Qui non diligit Deum amore benevolentiz, non convertitur ad Deum, sed ad seipsum. Quæro enim in quo affectus doloris ultimò conquiescat? Si in Deo, quomodo nisi per affectum benevolentiz? Est enim dilectio Dei propter se & non propter aliud: si in creatura ultimò conquiescat, ergo jam non convertitur ad Deum, sed ad creaturam: ad illud enim convertitur in quo ultimò conquiescit, sicut sagitta ad illam partem convertitur, in qua conquiescit, & ad quam ultimò reflectitur. Pro quo

Nota, quod in amore concupiscentie, hominis affectus ad seipsum velut

L 3.c.6.  
pag. 5.6.

quemdam scopum reflectatur & quodammodò relabatur. Piè & eleganter id explicat Joannes Rusbrochius: *Quicumque*, inquit, *tam inordinato suis detinentur amore, ut Deo servire nolint, nisi privati lucri sui, aut propria mercedis causâ, isti omnes à Deo se disiungunt ac separant, seipsos minime liberos, & in quadam proprietate retinent: quippe, qui sese in cunctis suis actionibus spectant & PRO SCOPO habent.* Enim verò cunctis precibus & bonis actibus suis vel temporalia, vel aeterna aucupantur bona, quasui dumtaxat boni & utilitatis gratiâ expetunt. Huius generis homines ad seipsos REFLECTUNTUR & afficiuntur. Sicq; fit ut semper sibi ipsis soli mancant. Desicit namque eis vera charitas, qua eos tum Deo, tum omnibus amicis & charis eius coniungeret ac uniret. Et quamvis videantur legem servare, ac Praecepta Dei & Ecclesia, charitatis tamen legem non observant, quandoquidem quidquid agunt solâ faciant necessitate adacti, non amore permoti.

Similia scribit pius Author Rodericus ad illa verba S. Ignatii, omnes RECTAM HABERE INTENTIONEM studeant, non solum circa vita sua statum, verum etiam circa res particulares, omnes id semper in eis syncre spectantes, ut serviant, & placeant Divina bonitati PROPTER SE IPSAM, & propter CHARITATEM & eximia beneficia, quibus praevenit nos potius, quàm ob timorem poenarum, vel spei praemiorum. Quibus verbis subiicit Rodericus: Hic verus est amor charitatis: alia verò omnia aliud non sunt quàm quærere & amare nos ipsos. Probatq; ulterius, quod amare solo amore concupiscentiæ, non tam est amicum amare, quàm te ipsum & proprium emolumentum & utilitatem. Sicut panem & vinum amore concupiscentia amare se dicimus, quia non tam ea amas propter ipsa, quàm propter te & in rem tuam. Atque hoc est amare te ipsum. Hoc modo porro Deum amant, & serviunt, qui illi aut timore poenarum, aut spe praemij dandi serviunt.

Ex quibus colligitur vera ratio cur amor quo Deum diligimus amore solius concupiscentiæ, non sit vera cordis ad Deum conversio, sed potius ad nos ipsos, quia in amore concupiscentiæ, homo seipsum spectat, & pro scopo habet, ad seipsum reflectitur, non servit Divinae bonitati propter seipsam, quærit & amat seipsum, nec tam ad Deum convertitur, quàm ad seipsum, propriumq; emolumentum & utilitatem.

Cumq; §. 1. probatum fuerit, quod ad salutarem poenitentiam requiratur vera conversio cordis ad Deum, rectè inferitur, quod ad salutarem poenitentiam requiratur verus amor in Deum benevolentia, ac propterea quod Attritio servilis non sufficiat.

## ARGUMENTUM SEPTIMUM.

Fuit QUOVIS TEMPORE ad impetrandam veniam peccatorum Contritionis motus necessarius: sed motus Contritionis aliquam Dei propter se dilectionem requirit. Ergo.

Trid. sess.  
14 c. 4.

§. 1. Probatur quod vera & realis Contritio requiratur etiam cum susceptione Sacramenti.

Quidam apertè negant, quod ad impetrandam veniam peccatorum cum Sacramento necessaria sit vera & realis Contritio: quæ solutio non displicet Melchiori Cano, nam respondetur, inquit, quod Contritio ponitur pars Sacramenti, quia est certa & indubitata materia. Quod autem Attritio sufficiat, quamvis verum sit, non est tamen, ad eò certum & indubitatum, & idè Concilium Florentinum, communisq; sententia tenens certum, relinquens incertum, ponit Contritionem partem esse huius Sacramenti.

Relect. 5.  
de pœnit.  
pag. 80.

Sed contrà PRIMÒ: Concilium Tridentinum non tantùm dicit Contritionem esse partem Sacramenti, sed insuper, quod Contritionis motus quovis tempore fuerit necessarius: quod falsum erit si detur casus in quo Contritionis motus non sit necessarius.

Neque dici potest, quod agat de necessitate Contritionis sine Sacramento, quia expressè agit de suscipiendo Sacramento, subiicit enim: Et in homine post Baptismum lapsò ità demùm praparat ad remissionem peccatorum, si cum fiducia Divina misericordiæ & voto præstandi reliqua coniunctus sit, qua ad ritè suscipiendum HOC SACRAMENTUM requiruntur.

Et infra dicit quod Contritio aliquando charitate perfecta sit, hominemq; Deo reconciliet priusquam SACRAMENTUM actu suscipiatur. Ergo agit etiam de Contritione cum qua Sacramentū actu suscipitur.

SECUNDÒ. Tridentinum cap. 3. dicit, quod Contritio, Confessio, & satisfactio in Pœnitente ad INTEGRITATEM SACRAMENTI, ad plenam & perfectam peccatorum remissionem ex Dei INSTITUTIONE REQUIRUNTUR. Ergo Tridentinum non tantùm vult Contritionem esse partem certam & indubitatam, sed etiam ex Dei institutione requisitam.

TERTIÒ. Tridentinum Canone 4. dicit Anathema, si quis negaverit ad integram & perfectam peccatorum remissionem REQUIRI tres actus Pœnitentiæ, videlicet CONTRITIONEM, Confessionem, & satisfactionem. Ergo &c.

QUAR-

QUARTO. Tridentinum sess. 6. cap. 14. docet Christiani hominis poenitentia contineri *cor contritum*. Ergo cordis Contritio necessario requiritur ad Christiani hominis poenitentiam.

Ad art 12.  
Conf. Augu-  
stian.

QUINTO. Ecclesiastici Scriptores unanimi consensu tradunt tres esse Poenitentiae partes, Contritionem, Confessionem & Satisfactionem, quibus corde, ore, & opere nobis ad Deum redeundum est, sicut corde, ore, & opere per peccatum à Deo deflectimus. *Qua equidem res adeò evidens, & clara, totq; testimonijs ab alijs comprobata, ut mirum sit aliquem hominem potuisse inveniri, qui tanta luci suas tenebras offundere sit ausus*, inquit Andreas Fabricius Leodius, Pij V. per septennium Orator, Ill. Principum Alberti & Ernesti ejus filij, Comitum Palatinorum Rheni, ac utriusque Bavariae Ducum, Consiliarius, ab iisdem donatus amplissima Praepositura Veteris Oetinge, cum antea Philosoph. & Theologiam Lovanii ad S. GERTRUDEM docuisset, Teste Miræo.

Addit idem Fabricius, quod Confessionis Augustinae architectus, coactus fuerit, vel invitus, quod prius evomuerat, resorbere, propriaq; manu eodem anno, quo suas blasphemias Statibus Imperij obtulit, consignare, tres esse Poenitentiae partes, Contritionem, Confessionem & satisfactionem.

§. II. Ex ipso Tridentino probatur, quod Contritio, de qua agitur debeat oriri ex affectu benevolentiae in Deum.

Quod autem Contritio de qua agit Tridentinum debeat oriri ex aliquo benevolentiae in Deum affectu, saltem charitatis initialis, ex ipso Tridentino probari potest.

1. 2. q. 113.  
art. 5. ad 2.

PRIMO. Contritio, de qua Tridentinum, est animi dolor & detestatio de peccato commisso. Quae quidem detestatio, ut ibidem postea habetur debet esse ingens: sed dolor & detestatio de peccato commisso est actus amoris benevolentiae, seu charitatis initialis, nam juxta D. Thomam ad eandem virtutem pertinet prosequi unum oppositorum, & refugere aliud: & ideo sicut ad CHARITATEM pertinet diligere Deum, ita etiam DETESTARI peccata per qua anima separatur à Deo.

Et articulo 7. ad 2. Propter hoc homo DETESTATUR peccatum, quia est contra Deum cui vult INHAERERE (utique per amorem) & ideo liberum arbitrium in iustificatione impij, simul detestatur peccatum, & convertit se ad Deum, sicut etiam corpus simul recedendo ab uno loco, accedit ad alium.

Ratio autem hujus doctrinae est, quod ille, qui dolet propter penas inferni, propriè loquendo non doleat de ipso peccato, saltem prout peccatum est, sed de effectu peccati: sicut fur quando dolet de pec-



peccato propter patibulum, propriè loquendo non dolet de furto, prout est peccatum contra legem Reipublicæ, sed de effectu furti, scilicet suspendio.

SECUNDÒ. Contritio de qua Tridentinum, debet esse *cum proposito non peccandi de cætero*: atqui *propositum* non peccandi de cætero, seu *vitanda peccata*, propriè actus est *charitativus* (saltem initialis) prout agnoscit & concedit Vegæ Bellarminus. Ergo.

L. 2 de pœnit. c. 7.

TERTIÒ. Contritio continet *odium vitæ veteris*, seu ut infrà subiungitur: *Vehemens quoddam antea vitæ odium*, vel ut habetur scilicet. 6. cap. 6. *odium aliquod adversus peccata*, sed odium peccatorum pertinet ad aliquam saltem initialem charitatem, juxta quod scribit Angelicus Doctor: *Pœnitentia est cum fide Pasionis Christi: per quam iustificamur à peccatis, & cum spe veniæ & cum odio vitiorum, quod pertinet ad CHARITATEM*. Ergo.

3. p. q. 85. a. 3. ad 4.

Eandem doctrinam approbare videtur P. Vasquez ita scribens: *Placet ego mihi cum Caietano in hoc articulo asserere, odium peccati, quod in expiatione illius intervenit non esse alterius virtutis, quàm Charitativæ, & sic consideratur, ut est contra Deum, qui summè placet. Et infrà: Hanc sententiam Caietani quoad dolorem, quod sit charitativus actus sequitur Scotus in 4. d. 14. quæst. 2. §. primus articulus --- & Gabriel in eadem Dist. q. 1. a. 3. Ubi vides non solius Patris Vasquez, sed etiam Cajetani, Scoti, & Gabrielis autoritate eandem doctrinam fulciri.*

Quæst 85. art. 2 n. 38. p. 56.

QUARTÒ. Tridentinum probat motum Contritionis necessarium esse, ijs Scripturæ locis, quæ non possunt nisi cum aliquo benevolo in Deum affectu veritatem obtinere.

Talis est hic locus Ezechielis: *Projicite à vobis omnes iniquitates vestras, in quibus pravaricati estis, & facite vobis cor novum & Spiritum novum*. Quis enim dixerit, quod ille, qui solo timore pœnæ à peccato abstinere, projiciat à se omnes iniquitates suas, sibi que faciat cor novum & Spiritum novum?

Quod ut magis constet: Rogo, an Judæi, qui solo timore pœnæ à peccato abstinere, iniquitates suas à se projicerent? Rogo, an haberent cor novum & Spiritum novum? Rogo, an in novitate vitæ, an in vetustate literæ ambulant?

Et verò, quid est aliud habere cor novum & Spiritum novum, quàm pertinere ad legem novi Testamenti? Pertinere autem ad legem novi Testamenti, quid est aliud, quàm habere ignem amoris, quem venit in terras mittere Author novi Testamenti? Est enim inter utrumque Testamentum ea differentia, quod vetus sit timoris, & novum amoris. Hinc D. Thomas ad cap. 4. Matthæi: *Doctrina Christi*

*adicitur novum Testamentum --- quia vetus lex simul cum promissione habebat comminationem. Et hoc idem est, quia vetus erat lex timoris: nova vero amoris. Augustinus Brevis differentia, TIMOR & AMOR.*

Et 2. 2. q. 108. art. 1. ad 3. *Lex enim Evangelij lex amoris est, idem illi, qui ex amore bonum operantur (qui soli proprie ad Evangelium pertinent) non est timor incutendus per poenas, sed solum illi, qui ex amore non moventur ad bonum, qui etsi numero sint de Ecclesia, non tamen de merito.*

Et 1. 2. quaest. 107. art. 1. ad 2. *Lex vetus dicitur cohibere manum, non animum, quia, qui timore poenae ab aliquo peccato abstinere, non simpliciter eum voluntas à peccato recedit, sicut recedit voluntas eum, qui amore iustitiae abstinere à peccato, & propter hoc lex NOVA, quae est lex AMORIS, dicitur animum cohibere.*

Deinde, ut ad Tridentinum revertar, quod Contritio debeat procedere ex benevolo in Deum affectu, satis insinuant Sanctorum clamores, de quibus Tridentinum: *Tibi soli peccavi & malum coram te feci. Laboravi in gemitu meo; lavabo per singulas noctes lectum meum: recogitabo tibi omnes annos meos in amaritudine animae &c.* Siquidem nemini persuadebitur, quod illi Sanctorum clamores ex solius poenae timore originem duxerint, & non potius ex aliquo benevolo in Deum affectu.

## ARGUMENTUM OCTAVUM.

Trid. sess.  
14. c. 4.

*Attritio illa demum sufficit cum Sacramento Poenitentiae, SI VOLUNTATEM PECCANDI EXCLUDAT: sed Attritio servili voluntatem peccandi non excludit. Ergo non sufficit cum Sacramento Poenitentiae.*

**H**Actenus sine ullo offendiculo progressi sumus in Tridentino, & argumenta, nō fallor, efficacia ex eodē depromptimus: nunc verò pervenimus ad illum locum Tridentini, in quo crucem praetensae amoris Divini necessitati fixam esse nonnullis videri posset: spero tamen eodē amore, cuius necessitatem & causam propugnamus, adjuvante, crucem illam in palmam & laurum convertendam, sicut conversa fuit illa, in qua pependit fons omnis amoris JESUS. Quod priusquam fiat, nonnulla erunt praemittenda.

§. I. *Ostenditur quod Tridentinum verbum illis: SI VOLUNTATEM PECCANDI EXCLUDAT: non loquatur de exclusione merè negativa, sed positiva.*

Pag. 171.

**P**Robat hoc eleganter P. Franciscus Suarez in 3. p. disput. 20. sect. 2. *Concilium Tridentinum, inquit, expresse requirit Attritionem, qua*

qua voluntatem peccandi excludat, non NEGATIVE tantum per solam cessationem à tali voluntate, hoc enim modo qualibet cogitatio alterius rei voluntatem peccandi excludit: sed POSITIVE, per formalem, aut virtutalem repugnantiam, veramq; mutationem voluntatù dissentientiù peccato, & consentientiù gratia Dei.

Doctrinam Patris Suarez approbat Reginaldus de prudentia Confessarij sectione 2. capite 4. dicens: Iuxta Concilium Tridentinum sessione 14. cap. 4. ad validitatem (Sacramenti Pœnitentiæ) requiritur saltem attritio, qua voluntatem peccandi excludit per propositum scilicet non peccandi de cætero, quod eidem voluntati repugnet positive. non autem per nudam cessationem ab ipsa voluntate peccandi NEGATIVE tantum ei repugnantem, neque sufficientem ad eliminationem peccati mortali ab anima, in qua ipsum cum tali cessatione perseverare nihil obstat.

Cujus doctrinæ ratio ulterior in promptu est, quod excludere aliquid negative, non sit verè excludere: hinc hostis non dicitur exclusus mœnibus, qui non intrat mœnia, & non nisi negative mœnibus excluditur, si possit mœnia accedere, quamvis actu & de facto mœnia non accedat.

#### §. II. Quid sit, excludere positive voluntatem peccandi?

**N**on potest commodius res illa declarari, quam exemplo jam allegato. Quid enim est hostem positive mœnibus excludere? Hoc nimirum; hostem arceri & prohiberi à mœnium accessu, ita ut repugnet hostem ad mœnia penetrare: quod si enim vel minima rima patefaciat hosti ad mœnia ingressum, nemo dixerit hostem à mœnibus exclusum, esto coniugat hostem per illam rimam ad mœnia non penetrare.

Quapropter eodem pacto dicimus, voluntatem peccandi, quæ est hostis animæ nostræ, tum demum ab anima excludi, quando arceatur & prohibetur ab accessu animæ, ita ut repugnet voluntatem peccandi stante præsenri animæ constitutione, ad animam usque pervenire: quod si enim voluntati peccandi, vel minimus ad animam pateat accessus, dici non poterit voluntatem peccandi ab anima excludi, esto voluntas peccandi per patentem accessum ad animam non transeat.

Debet ergo reperiri positiva repugnantia & incompatibilitas cum voluntate peccandi, ut voluntas peccandi positive dicatur excludi, id est, ut bene explicat Tannerus: *Cum quo voluntas peccandi simul esse non possit.* Disp 6. q. 6. dub. 4 n. 84

Hinc etiam P. Suarez docet, quod Attritio non tantum voluntatem

3.p.disp.20  
sect.4p.  
276.

includat, sed etiam *absolutam voluntatem non peccandi de cetero*, quia velleitas potest esse simul cum voluntate peccandi: Sumitur, inquit, ex eodem loco Concilij Tridentini dicentis *talem esse necessarium dolorem, qui VOLUNTATEM PECCANDI EXCLUDAT, id est, CUM QUO VOLUNTAS PECCANDI SIMUL ESSE REPUGNET: alioquin, quamvis contingat hominem habere dolorem, & non habere actualem voluntatem peccandi, si tamen dolor talis non est, ut ex se non repugnet simul esse cum tali voluntate reverà non est dolor, qui excludit illam voluntatem, sed aliunde contingit illà carere. At verò quories displicentia de peccato talis est, ut ex se habeat adiunctam solam velleitatem non peccandi, quantum est ex se non excludit voluntatem peccandi, quia voluntas peccandi & velleitas non peccandi, optimè possunt esse simul: ergo &c.*

Ex quibus verbis constat non esse firmam probationem illorum, qui sic disputant: *Attritio servilis potest esse sine voluntate peccandi, ergo excludit voluntatem peccandi.* Quidquid enim sit de veritate antecedentis propositionis, de qua in presenti nihil disputo, certum est nullam esse consequentiam, sicut in exemplo allegato non rectè inferitur: *Velleitas non peccandi potest esse sine voluntate peccandi, ergo excludit voluntatem peccandi:* quia voluntas peccandi, & velleitas non peccandi (idem dic de Attritione servili) optimè possunt esse simul.

Quod ipsum innumeris exemplis declarari potest: siquidem peccatum veniale potest esse sine charitate, nec tamen propterea excludit charitatem. Item: fides potest esse sine spe, nec tamen propterea spem excludit. Item albedo potest esse in hærte sine dulcedine, nec tamen propterea dulcedinem excludit. Quorum omnium ratio est, quod se mutuo in eodem subiecto tolerant, possintque simul esse, peccatum veniale cum charitate, fides cum spe, & albedo cum dulcedine.

E contrariò: peccatum mortale excludit charitatem, fides infidelitatem, spes desperationem, albedo nigredinem, quia se mutuo in eodem subiecto non tolerant, neque possunt simul esse peccatum mortale cum charitate, fides cum infidelitate, spes cum desperatione, & albedo cum nigredine.

### §. III. Explicatur argumentum supra positum.

EX dictis lubet ab ipso Adversariorum Achille arma mutuari & ita argumentari: Attritio salutaris debet positivè excludere voluntatem peccandi, saltem mortaliter, de qua voluntate hic agimus: sed Attritio servilis, quæ ex solo timore poenæ nascitur, non excludit positivè voluntatem peccandi. Ergo.

Pri-

Primam propositionem §. 1. confirmavimus, superest, ut & alteram propositionem hanc comprobemus.

PRIMÒ itaque probatur. Quod excludit positivè voluntatem peccandi, debet esse tale cum quo voluntas peccandi simul esse non possit, prout §. 2. ex Patre Tannero & Suarez didicimus, sed cum Attritione servili simul esse potest voluntas peccandi: quid enim vetat aliquem serviliter atteri, & nihilominus velle peccare?

Quod ut meliùs intelligas, demus (quod plerisque arridet hoc tempo e) Attritionem servilem esse actum spei Theologicæ, pto quid repugnet voluntatem peccandi eodem corde morari, cum actu spei? Quid vetat aliquem sperare, & nihilominus mortaliter delinquere? Fides infidelitatem, temperantia intemperantiâ, castitas luxuriam, humilitas superbiam, liberalitas avaritiam &c. eodem corde morari non patitur: verùm potest quis simul esse fidelis & intemperans: castus & superbus: humilis & avarus: nulla est illarum virtutum particularium, quæ omnia vitia pervagetur, & à consortio suo excludat. Quin igitur idem asserimus de spe Theologica, quod illa quidem secum in eodem corde morari non patiatur desperationem & præsumptionem, nequaquam tamen à consortio suo excludat intemperantiam, aliæque vitia prorsus disparata?

Et confirmatur 1. quia si actus spei Theologicæ positivè excluderet voluntatem peccandi, nunquam posset esse cum voluntate peccandi: Jam verò certissimum est, quod actus spei, possit esse cum voluntate peccandi, etiam mortaliter: aliàs enim sequeretur in peccatore non manere spem, quod jure meritissimo censet *errorem* P. Franciscus Suarez.

Disp. 1. de  
spe, sect. 3.

Adferri etiam potest, quod scribit Franciscus Amicus: *Spem quoad actum posse à peccatore elici, & cum quovis peccato stare, præterquam cum opposito desperationis & hæresis definit in eodem Tridentino sess. 6. c. 6. & 7. ubi inter actus, quibus peccator ad iustificationem se disponit connumerat spem.* Certè si actus spei cum quovis peccato stare potest, ergo non excludit positivè quodvis peccatum mortale, de quo est sermo.

Disp. 21. de  
spe sect. 2.  
n. 18.

Confirmatur 2. actus fidei, etiam intensissimus, non excludit positivè voluntatem peccandi, ergo nec actus solius spei.

SECUNDÒ. Amor suus ipsius, quo quis proprium diligit commodum, non excludit positivè voluntatem peccandi, quandoquidem amor suus planè disparatè sese habeat ad odium Dei, & possit: aliquis intensissimè seipsum diligere, & nihilominus odio Deum habere, ac per consequens mortaliter peccare: ergo Attritio servilis, quæ ex

amore

amore proprii commodi nascitur, non excludit positivè voluntatem peccandi: neq; enim potest magis peccatum excludere, quàm causa ex qua nascitur & cujus motivo igitur, & naturam & indolem refert.

TERTIÒ. Quæritur, quid repugnet, simul cum amore sui ipsius in eadem anima conciliari odium Legislatoris? Proclive enim est de proprio damno satagenti, illum odisse, à quo damnum pateris.

Undè illud vulgare: *quem metuit, quisque perire cupit.*

QUARTÒ. Quamvis timor gehennæ sit bonus & utilis, tamen non excludit positivè voluntatem peccandi. Notum est illud Augustini: *Desiderium peccandi non EXTINGUITUR, nisi contrario desiderio rectè faciendi, ubi fides per dilectionem operatur.*

L. 2. cont.  
A. vers. le-  
gis c. 7.

Cap. 27.

Consonat Ambrosius libro 8. in Lucam: *Infirmus enim custos diuturnitatis est timor: pudor autem bonus Magister officij. Qui enim metuit, reprimitur, NON EMENDATUR.*

Et Gregorius Magnus in cap. 27. Job. *Sancta, inquit, Ecclesia simplicitatis suæ & rectitudinis vias timore inchoat, sed charitate consummat, cui tunc est FUNDITUS A MALO RECEDERE, cum ex amore Dei ceperit iam nolle peccare. Cum verò adhuc timore bona agit à malo PENITUS non recepit.*

2 2 q. 19  
art. 9.

Præterea innumera alia, quæ hæc congerere possem, sanctorum Patrum testimonia: tamen Angelici Doctoris testimonium ad rem præsentem explicandam accommodatissimum præterire non possum. *Timor servilis, inquit, non est numerandus inter septem dona Spiritus sancti, licet sit à Spiritu sancto. Quia, ut Augustinus dicit in libro de natura & gratia POTEST HABERE ANNEXAM VOLUNTATEM PECCANDI.*

In 3. d. 34.  
q. 1. n. 65.

Notanda illa verba: *Potest habere annexam voluntatem peccandi.* Quidquid enim sit de veritate doctrinæ, quæ tradit timori servili & per annexam esse voluntatem peccandi, nobis tamen in præsentem sufficit, quod possit habere annexam voluntatem peccandi. Quo sensu intelligo, quod scribit D. Bonaventura, in illo, qui per timorem servilem à peccatorum perpetratione cessat *voluntatem peccandi manere IN HABITU ET RADICE*, quia nihil habet, quod contrarietur & resistat voluntati peccandi.

C. 2. tract.  
4. parte 7.

Simile est, quod habet Driedo de captivitate: *Qui solo metu gehennæ ignis coercet se ab opere malo, Præceptum odit secundum amorem quemdam HABITUALEM, seu RADICEM intus latentem, nondum renovatus spiritu amoris Iustitiæ.* Dicitur enim talis habitualiter odisse præceptum, quia, quamdiu amore Dei destituitur nihil habet, quod contrarietur, & repugnet odio Dei præcipientis.

Ex quibus manifestum esse existimo timorem servilem secum pati

voluntatem peccandi, ac proinde illam non excludere, cūque Attritio servilis eodem pede metienda sit, consequens est, quod Attritio servilis non excludat voluntatem peccandi.

§. IV. Proponitur quædam circa prædicta difficultas.

**N**onnulli magis ex ingenio, quàm ex vero difficultatem nobis cient, sic argutantes:

*Actus proprius spei est intentio, seu voluntas efficax beatitudinis: sed talis intentio positive excludit voluntatem peccandi mortaliter: nam, qui efficaciter intendit beatitudinem non potest illud velle committere per quod scit se beatitudinem amissurum. Ergo.*

Similis notæ est hoc argumentum: *Impossibile est pœnas efficaciter fugientem amare peccatum ob quod se novit illas incurrere. Ergo impossibile est, quod voluntas peccandi consistat cum timore & Attritione servili, quæ est efficax fuga pœnæ.*

Utrumque hoc argumentum ludit in æquivocatione vocis *efficax*, quâ patefactâ apparebit, quàm sit nullum & inefficax.

Quæro enim, quo sensu spes dicatur efficax intentio beatitudinis, & timor, efficax fuga pœnæ? An fortè, quia spes efficaciter beatitudinem obtinet, & timor gehennam declinat? Hoc si dixeris, quid superest, nisi ut omnes qui sperant beatitudinem, & timent gehennam, etiam sine Sacramento beatitudinem obtineant, & declinent gehennam? Quid? Quod Judæi hâc ratione solius spei & timoris præsidio beatitudinem obtinere, & gehennam declinare potuerint? Quæ omnia perabsurda sunt. Quare non est dubitandum, quin hęc lateat aliqua æquivocationis nebula, quæ ut tollatur, sit,

§. V. Quotuplex sit voluntas efficax?

**V**oluntas aliqua potest varijs modis dici efficax: & quidem voluntas illa ordinariè dicitur efficax, quæ efficiat illud, quod per modum finis intendit, eò quod assumat media ex se omninò efficacia: potestque dici voluntas *efficax quoad effectum*. Talis est voluntas Divina, per quam Deus omnia quacumque voluit fecit.

Et in hac significatione falsissimum est, quod actus proprius spei sit intentio, seu voluntas efficax beatitudinis (& idem dic de timore) plurimi enim sperant in quibus spes beatitudinem non efficit, uti constat experienciâ. Undè hoc sensu sola illa spes dicatur voluntas efficax beatitudinis, de qua scriptum est ad Romanos 5. *Spes autem*

NON

*non confundit, quia Charitas Dei diffusa est in cordibus nostris, per Spiritum sanctum, qui datus est nobis.*

Alio sensu voluntas aliqua dicitur efficax, quia non est simplex rei complacentia, seu velleitas, sed insuper est quædam inclinatio potentiae ad conatum, seu executionem faciendam circa consecutionem rei volitæ.

Declaratur. Infirmus, qui nullam prorsus habet spem sanitatis, habet simplicem complacentiam in sanitate, quia complacentia illa non inclinat ipsum, ut conetur obtinere sanitatem.

At verò infirmus, qui putat sanitatem sibi possibilem habet voluntatem efficacem sanitatis, quia in vim istius voluntatis conatur sanitatem consequi, & executioni mandare.

In hac postrema significatione omnis illa voluntas dicitur efficax, quæ non est simplex rei complacentia, sive assequatur id quod desiderat, sive non, potestque dici voluntas efficax quoad conatum: quia etsi rem intentam non efficiat, saltem conatur (quamvis subinde nimis languidè) & cogitat rem illam efficere, & executioni mandare.

1. 2. disp.  
42 c. 3 p.  
346.

Hæc acceptio vocis, voluntas efficax, traditur eleganter à P. Gabriele Vasquez his verbis: *Observandum est duplicem esse affectum voluntatis, unus est qui tendit in rem non tantum secundum se, sed prout acquiritur & executioni mandandam, & hic affectus dicitur EFFICAX VOLUNTAS, id quod feratur in rem efficiendam & effectu ipso consequendam: quod si quis interdum non exequatur id quod desiderat, satis est ad id CONARI ex parte sua, ut dicatur id desiderare. Alius affectus voluntatis est cuiusdam solius complacentia de re cogitata secundum se, & hic dicitur inefficax voluntas: neque enim omnia, quæ nobis secundum se considerata placent opere ipso exequi desideramus & contendimus. Dicitur etiam hæc voluntas solius complacentia, simplex affectus, quia fertur in rem simpliciter, hoc est secundum se, non in executione consideratam.*

Et infra: *Nam voluntas simplex est, quæ nascitur ex re absque ulla cogitatione faciendi illam, vel consequendi: efficax verò illa est, quæ ex consideratione ita tendit in rem, ut opere velit exequi: debet etiam censei EFFICAX illa, quæ reverà tendit in rem cum affectu, etiamsi ratione alicuius periculi, aut circumstantia ab ea RETRAHATUR.*

Disp. 111.  
c. 3. n. 12.  
p. 370.

Hunc modum distinguendi inter voluntatem efficacem & inefficacem plerique Interpretes D. Thomæ ad articulum 5. quæstionis 13. in prima secundæ postea secuti sunt, inter quos Puteanus noster, Ailius ille, inquit, dicitur inefficax, qui elicitur à potentia tendendo in obiectum, non cogitando de affectione huiusmodi obiecti: efficax verò qui cogitat de obiecto consequendo.



## §. VI. Respondetur difficultati proposita.

**N**on erit difficile, beneficio ac luce distinctionis jam explicatz, argumento proposito respondere. Quando enim dicitur, quod *actus proprius Spei sit voluntas efficax beatitudinis*, distinguendum est: vel enim sermo est de voluntate efficaci quoad effectum: & negandum est (plurimi enim sperant, qui non assumunt media, ad beatitudinem efficiendam omninò efficacia) vel sermo est de voluntate efficaci quoad aliquem conatum, seu, ut loquitur D. Thomas quoad aliquem *motum* in beatitudinem: & concedendum est. Verùm constanter negari debet indè consequens esse, quod ille qui hoc sensu vult efficaciter beatitudinem, non possit ex infirmitate, vel conatu non satis pleno velle illud committere, quo scit se beatitudinem amittere.

2. 2. q. 17.  
2. 3.

Me silente veritatem illam loquuntur peccatores, qui non simplici nec merè otiosà velleitate per actum spei moventur in beatitudinem, quamvis versentur in affectu peccati mortalis.

Juvenit hac de re Patrem Coninck audire, qui in suo tractatu de virtute Spei pulchrè ostendit, non esse necessarium ad Spem, ut *voluntas modo INFALLIBILI prosequatur finem, assumendo ad hunc obtinendum MEDIA EX SE OMNINÒ EFFICACIA, ipsiq; modo infallibili de facto utendo*. Quod ità declarat: Nam multi Catholici incidunt in gravia peccata & in ijs quandoque vitam finiunt, qui tamen usque ad extremum retinent veram spem, saltem habitualement, & sapè eliciunt ACTUALEM, quia SPERANT per gratiam Dei, qua ijs non deest, à peccatu converti, & ità beatitudinem obtinere, per media ad hoc ordinata, & quidem cum VERO sapè ac SERIO PROPOSITO amplectendi ea media: sed cuius effectus propter mutabilitatem voluntatis, exurgentes tentationes, ac secularia desideria impeditur, atque ità medijs ad salutem necessarijs malè utuntur, eaq; ex parte omninò negligunt.

Disp. 19.  
dub. 7. n. 96

Constat ergo ex hoc discursu, quod actus Spei, non dicatur voluntas efficax, quod excludat peccatum mortale, per quod beatitudo amittitur: sed longè diverso sensu, quia continet verum conatum & sapè verum ac serium propositum amplectendi media ad beatitudinem obtinendam efficacia, quamvis non semper amplectatur.

At numquid subindè saltem amplectitur istiusmodi media? Fateor, sed tùm denicùm, quando peccator non tantùm ad considerandam Dei misericordiam in spem erigitur, sed insuper Deum tamquam omnis Jüstitiæ fontem benevolo affectu diligere incipit. Cùm enim inter

F

me

media ad beatitudinem obtinendam efficacia, si ipsa Dei propter se dilectio, quandoque contingit, ut Spes medium illud assumat, & voluntatem peccandi hâc ratione excludat. Verùm nunquam probabitur, quod Spes non accersito benevolæ dilectionis subsidio possit se solâ præexistentem peccandi voluntatem excludere.

At inquires & ad ravim usque repetes: quomodo ergo Spes dicitur voluntas efficax?

Disp. 1. de  
Spe sect. 3.

Respondeo ex R. P. Francisco Suarez, quia non habet se per modum actus imperfecti, sive per modum velleitatis & simplicis complacentiæ. In hoc enim desiderium differt à Spe, quod *desiderium dicitur omni appetitus boni absentis, sive sit per modum actus perfecti & efficaci, sive IMPERFECTI per modum VELLEITATIS --- Spes verò imprimis significat actum perfectum per modum voluntatis efficax. Quare vocabulum efficax non excludit nisi simplicem & otiosam velleitatem, quæ nullum conatum vel motum in beatitudinem continet.*

Quæ autem dicta sunt de Spe, ejusque efficacia, debent etiam cum proportionem intelligi de timore servili, qui dicitur efficax detestatio gehennæ, quoad conatum, non tamen quoad effectum, ita ut tantum excludatur simplex displicentia gehennæ, quæ destituitur omni conatu vitandi gehennam, nullumque adhibet motum ad executionem mediorum.

Erit tamen, qui nondum acquiescat, sed dicat: actus Spei, ut fateamur, movet ad executionem mediorum; ergo poterit impetrare, ut voluntas absteineat ab omni peccato, quia hoc medium est necessarium ad consecutionem finis, scilicet beatitudinis.

In 3. dist.  
26.

Respondeo: esto, imperet, si tamen nullus accedat benevolus in Deum affectus, nego quod voluntas parebit. Rationem petimus ex D. Bonaventura, qui observat, quod tendentia spei informis, est tantum *semiplena*. Unde si destituatur omni auxilio extrinseco non plenè exequitur, quod non plenè imperat.

Adverte itaque, quod animus frequenter sibi ipsi imperet, sed non ex toto, seu plenè, propterea quod non imperet ex affectu plenè & positivè contrario malæ voluntati in anima existenti: undè animâ sibi ipsi resistente non excluditur mala voluntas peccandi.

Pulcherrimè hoc describit in seipso Augustinus lib. 8. conf. cap. 9. *Imperat animus, inquit, corpori & patet statim, imperat animus sibi & resistitur. Imperat animus, ut moveatur manus; & tanta est facilitas, ut vix à servitio discernatur imperium: & animus, animus est, manus autem corpus est. Imperat animus, ut velit animus, nec aliter est, nec facit tamen. Unde hoc monstrum, & quare istud? Imperat, inquam, ut velit, qui non*  
im-

*imperaret nisi veller, & non fit quod imperat. Sed non ex toto vult, non ergo ex toto imperat. Nam in tantum imperat, in quantum vult, & in tantum non fit, quod imperat, in quantum non vult. Quoniam voluntas imperat, ut fit voluntas, nec alia, sed ipsa. Non utique plena imperat, idèd non est, quod imperat.*

Dico ergo, quod ille, qui solius amoris concupiscentiæ intuitu sibi ipsi imperat à peccatis abstinentiam, non plenè imperet, & idèd non fiat quod imperat: sicuti contingit illi, qui ex solius naturalis amoris intuitu sibi ipsi imperat abstinentiam ab omni peccato, quam tamen sine gratiæ auxilio non potest obtinere. Cuius rei ratio est, quod non imperet ex motivo quod habeat positivam cum peccato contrarietatem.

Simile quid ostendi potest in ægroto præ melancholia oppresso, imò jam, nisi restiterit, morituro, qui vult efficaciter quoad conatum pel- lere ex animo tristitiam, sibi què ipsi imperat, ut à tristitiæ malo ab- stineat: nunquam tamen hoc à seipso impetrabit, nisi imperet ex contrario motivo, gaudij & lætitiæ.

Quod si dicas actum unius virtutis, v. g. spei, posse imperare actum alterius virtutis v. g. charitatis, & per consequens posse præcipere abstinentiam à peccato, quamvis non accedat actus alterius virtutis.

Respondebo quod voluntas non possit imperare actum alterius virtutis, nisi in executione accedat motivum alterius virtutis, ità etiam non potest imperare abstinentiam à peccato virtuti opposito, nisi accedat motivum alicujus virtutis, peccato contrariæ: ejusdem enim naturæ est recessus à malo, & accessus ad bonum oppositum.

Sicut ergo in ægroto jam memorato, non potest amor vitæ plenè imperare actum gaudij nisi accedat motivum gaudij, nec abstinentiam à tristitia, nisi accedat contrarium motivum istius abstinentiæ: ità in præsentī non potest amor concupiscentiæ plenè imperare actum cha- ritatis sine motivo charitatis, neque abstinentiam à peccatis sine mo- tivo peccatis contrario.

Neque refert quod peccator videat se non esse consecuturum bea- titudinem nisi abstineat ab omni peccato, quia similiter æger videt se non obtenturum sanitatem, nisi abstineat à tristitia, & tamen si non accesserit motivum gaudij nunquam abstinebit à tristitia. Sic etiam peccator videt lumine naturali se non esse consecuturum beatitudi- nem, nisi abstineat à peccato, & tamen solius naturalis luminis auxi- lio nunquam excludet positivè voluntatem peccandi. Quare in si- milibus veritatem obtinet, quod dicit Poëta: *Viduo meliora, probòq, Detriora sequor.*

§. VII. *Alia quadam responsio.*

**A**Liter dici potest, quod spes dicatur esse voluntas efficax, non ratione sui præcisè, sed quia innititur meritis per auxilium habendis, in quibus si perseverantes fuerimus efficaciter perducemur ad beatitudinem. Ità ferè explicat Gabriel in 3. d. 26. post diffinitionem spei.

Quando e-go quaeritur, quomodo voluntas beatitudinis sit efficax, si homo committat illud per quod excidit à beatitudine? In promptu responsio est, quod efficacia illa non sit nisi conditionata, si homo perseveret in merito: & quia homo non perseverat in merito, hinc committit illud per quod excidit à beatitudine.

Atque hæc de sensu verborum Tridentini circa exclusionem peccati, quæ fusiùs deduximus propterea, quod res ea non satis à quibusdam examinetur.

Unum tamen addo, quod plerique antiqui Scholastici Tridentino viciniore existimaverint, quod verba illa Tridentini *ad Dei gratiam in Sacramento Pœnitentiæ impetrandam disponit*, non deberent intelligi nisi de dispositione remota, ità ut Tridentinum isto modo loquendi nihil aliud voluerit, quàm, quod ante Tridentinum docuerat Academia Lovanienfis in sua Confessione Catholica Anno 1542. articulo 4. his verbis: *Contritio est dolor de peccatis propter Dei offensam susceptus, cum proposito confitendi & satisfaciendi: non autem (ut quidam hoc sæculo perniciosè docent) terror conscientia propter apprehensum gehenna supplicium peccatis debitum. PRAEPARAT tamen hic terror, & gehenna metus ad veram animi Contritionem.* Multi ergo existimarunt, quod Attritio dicatur in Tridentino ad gratiam Dei impetrandam disponere, quia præparat ad gratiam veræ Contritionis in Sacramento impetrandam.

Ità Tridentinum explicat Alfonso Vivaldus: *Notandum, inquit, quod Concilium non dixit, quod ille sic attritus cum Sacramento gratiam ACQUIRET, vel IMPETRABIT, sed dicit: & quamvis sine Sacramento pœnitentiæ per se ad iustificationem perducere peccatorem nequeat: tamen eum ad Dei gratiam in Sacramento Pœnitentiæ IMPETRANDAM DISPONIT.* Quod mihi videtur clarè dicere, quod in ipsa Confessione præparabitur ad susceptionem Sacramenti d. gnè. Hoc est ut ipse postea explicat: *Quum ex timore per fiduciam misericordiæ ad timorem gradum fecerit.*

Cæterùm, quia nobis nihil necesse est eò recurrere, responsionem illam missam facimus: ne quid tamen desideraretur, volumus illam, Lectori curioso subindicare.

ARGU-

## ARGUMENTUM NONUM.

*Attritio Salutaris debet concipi ex illo timore, Quo UTILITER CONCUSST  
NINIVITÆ PLenam TERRORIBUS POENITENTIAM EGERUNT;  
ET MISERICORDIAM A DOMINO IMPETRARUNT: atqui timor ille  
Ninivitarum non fuit defictum omni benevolo in Deum affectu. Ergo.*

Trident.  
fess. 14. c. 4.

**A** B alijs tractatum est hoc ipsum argumentum, neque scio ali-  
quid responsum esse hactenus, quod Lectori curioso vel appa-  
renter satisfaceret. Nam neque ipsi illi, qui à nobis dissen-  
tiunt Theologi, audēbunt asserere Ninivitas solius timoris servilis  
beneficio poenitentiam egisse, & misericordiam à Domino impetra-  
sse. Quare cum non videam quænam propositio in præsentis argumen-  
to vocari possit in controversiam, non est quod pluribus huic argu-  
mento comprobando insistam. Tantum moneo ut prudens Lector  
maturè expendat in Tridentino particulam *enim*, quæ causam reddit  
doctrinæ præcedentis de Attritione.

*Argumenta quadam ex Tridentino conglobata.*

**Q**UO attentius Tridentinum revolvō, eò magis confirmor in tra-  
dita hactenus doctrina. Quare, quæ ulterius occurrunt, sum-  
matim accipe.

Sessio 6. capite 6. & sessione 14. capite 1. inter præparationes  
ad justificationem requisitas Tridentinum illam recenset, quæ conti-  
netur verbis D. Petri Act. 2. *Pœnitentiam agite & baptizetur unus-  
quisque vestrum in nomine JESU CHRISTI &c.* atqui verbis D. Petri  
non continetur sola præparatio per motum timoris, nam ut benè ob-  
servat D. Nicolaus du Boys in hunc locum Actuum, Israëlitar, quos  
Petrus alloquitur, erant compuncti spiritu timoris, proposito sibi  
v. 20. *Die Domini magno & manifesto*, & nihilominus D. Petrus  
requirit ab illis poenitentiam ab illo spiritu timoris diversam:  
*Pœnitentiam agite* inquit. Et ne quis fortè diceret sermonem esse de  
poenitentia extra Sacramentum, subjungit: & *BAPTIZETUR unus-  
quisque vestrum &c.* & *accipietis donum Spiritus sancti*. Undè etiam ex  
hoc loco Actuum fatetur prædictus Author ad justificationem cum  
Sacramento requiri saltem initialem Christi amorem.

Item ex sessione 6. cap. 7. cum Sacramento requiritur *fides, qua  
per charitatem seu dilectionem operatur* ad Galatas 5. Atqui fides, quæ  
per charitatem operatur, requirit aliquam Dei propter se dilectio-  
nem:

nem: quomodo enim potest per charitatem operari, quod destituitur omni charitate? Apparebit autem magis vis hujus argumenti si cum Eustio, alijque verba Apostoli passim exponamus, ut sensus sit: *Fides per charitatem animata, acta, mota, incitata ad opus*. Non enim potest fieri, ut sine charitate fides per charitatem animetur, agatur, moveatur, & incitetur ad opus.

Item capite 10. *Iustitia incrementum petis sancta Ecclesia, cum oras: Da nobis fides, spes, & CHARITATIS augmentum*. Ergo in homine justificato praecessit non tantum fides & spes, verum etiam charitas, utique actualis, quia Tridentinum agit de operibus, praemisera enim ex D. Jacobo capite 2. *Videtur quoniam ex OPERIBUS iustificatur homo, & non ex fide tantum*.

Item capite 11. *Qui sunt filij Dei, Christum diligunt: sed qui suscipit Sacramentum Pœnitentiæ fit filius Dei*. Ergo Christum diligit.

Item ibidem: qui operando mercedem intuentur æternam, illud debent spectare, ut imprimis glorificetur Deus. Ergo etiam, qui fugiunt gehennam illud debent spectare ut in primis glorificetur Deus: atqui non spectat, ut in primis glorificetur Deus, qui Deum propter Deum non diligit, sed tantum spectat proprium commodum, & utitè dicam glorificationem propriam. Ergo.

Item Canone 8. *Si quis dixeris gehenna metum PER QUEM quod misericordiam Dei de peccatis dolendo confugimus, vel à peccando abstinemus peccatum esse, aut peccatores salvos facere, anathema sit*. Ubi Tridentinum nominatim dicit per quem, non propter quem, ut significet gehennæ metum esse quidem principium extrinsecum de peccatis dolendi &c. non tamen causam finalem. Nam particula propter in rigore dicit causam finalem, particula autem per plura comprehendit, prout observat P. Suarez.

Et licet prædictus Pater aliquid ampliùs requirat, tamen non video quo fundamento, cum Tridentinum non plus requirat.

Et sanè Angelicus Doctor disertè docet, quod timor servilium est sicut principium EXTRA disponens ad sapientiam, & Seraphicus Doctor in 3. dist. 34. n. 58. *Servilium timor habet rationem principij EXTRA*, scilicet respectu sapientiæ.

Item sessione 14. cap. 2. *Ad effectum pœnitentiæ salutaris pervenire nequaquam possumus sine magnis nostris fletibus, ut meritis pœnitentiæ, laboriosus quidam Baptismus à sanctis Patribus dictus fuerit*. Quid autem opus magnis illis fletibus, si sufficit dolor ex timore gehennæ proveniens? Siquidem ut benè Augustinus tractatu 43. in Joannem: *Non est magnum timere pœnam*. Quis enim fur, quis latro non timet?

Ex

3.p.q. 85.  
dist. 5. 2.2.  
n. 5.p. 66.

2.2.q. 19.  
2.7.

Ex quibus omnibus manifestum esse existimo, quod Tridentinum passim supponat penitentiam salutarem non posse destitui omni benevolo in Deum offensum affectu.

## S C R U P U L U S.

*Adversus ea qua hactenus dicta sunt moveri potest scrupulus, quod ea quam tradidimus doctrinam, recidat in doctrinam Lutheri. Item, quod commissaeantur & confundantur omnia: Contritio cum Attritione, novum Testamentum cum veteri, dum charitatem generatim requirimus ad iustificationem cum Sacramento.*

## R E S P O N S I O.

§. I. *Declaratur, quod non omnia, qua ab haereticis traduntur, sine condemnanda.*

**N**on est novum, Erud. me D. Praeses, quod ad effugiendam vim veritatis, obijciatur nomen haeretici. Ita Pelagiani obijciebant Augustino, quod Manichaeis consentiret. Putant, inquit, haeretici novi Manichaeorum nomine obiecto vim subterfugere veritatis, sed non subterfugunt. L. V. Bo-  
nif. c. 9.

Sic etiam Cyrillus Alexandrinus in commentario scripto ad Eulogium Presbyterum Constantinopoli agentem scribit, quod ab Orientalibus omnibus accusaretur Apollinarij opiniones sequi, sentireq; naturatum confusionem factam esse: imò, ut constat ex eodem commonitorio, accusatus fuit à nonnullis, quod cum Nestorio Antagonista suo sentiret. Quibus ita respondet: *Is qui hoc nomine nos accusant, respondendum est, non omnia, qua haeretici dicunt statim fugienda ac REPU- DIANDA esse. Multa enim consentunt ex ijs, qua nos quoque asserimus. Exempli causa cum Arianus Deum Patrem omnium ac Dominum esse dicunt, num ideo consequens est, ut eiusmodi confessiones aversemur?* Sic etiam respondet Augustinus: *Numquid propterea dicere non debemus, quod bonus Deus fecerit mundum, quia hoc etiam dicit Manichaeus?* L. 5. op.  
post. cent.  
Jul. c. 10.

Sic ergo possemus respondere: numquid propterea dicere non debemus, quod ad iustificationem, etiam cum Sacramento, Deus dilectionem sui requisiverit, quia hoc etiam dicit Lutherus?

Et senè, ut observat S. Cyrillus scribens ad Valerianum Episcopum, haeretici sunt humanorum corporum Medicum non absimiles: si enim phar-

*pharmacū in suavis mel immiscere solent, ut dulcedinē qualitatē eorum fallant perceptionem, quā suapte naturā tristitiam, nauseamq; inducunt.*

Et in sacrosyllabo Concilij Francofordienſis legimus, quod *mos est hæreticū tristia laetū, dulcia permiscere amariū, veneni poculum mellis sapore temperare.* Quare D. Hieronymus Epistolā ad Ctesiphontem applicat hæreticis verba illa Lucretij.

*Ac veluti puerū absinthia tetra, medentes  
Cū dare conamur, prius oras pocula circum  
Contingunt, dulci mellis, flavoq; liquore.*

Quia nimirū hæretici, solent noxijs suis dogmatibus, quædam admiscere verissima, ut hæresis venenum incauti & simplices cum securitate sorbeant.

Propius autem veniendo ad propositum nostrum Joannes Eckius libro 3. de pœnitentia cap. 12. multis probat, & ostendit, quod hæretici, & nominatim Lutherus, multa bona permiscuerit malis, applicatq; Luthero illud Plautini Euclionis: *Unā manu fert lapidem, alia panem ostendit.* Hinc subjungit: *Non patiatut simplex se decipi sub charitatis specie, sub illice aliquando bona doctrina intermixta: Semper enim latet anguis in herba.*

Et Cochleus in vita Lutheri alicubi testatur, quod multa bona, tum exponendo scripturas, tum adhortando & corripiendo homines pessimis machinationibus suis admiscebat: aded, ut plerique etiam magna auctoritatis viri crederent illum vero agi zelo virtutis, & spiritu Dei.

Quamvis ergo Lutherus eandem nobiscum Dei dilectionem ad salutarem pœnitentiam requisivisset, non tamen idcirco credendum foret doctrinam illam esse damnatam: quid si enim sit ex illis bonis dogmatibus, quæ suis pessimis machinationibus admiscuit?

L.6.c.15.

Quare non deberemus propterea ab illa doctrina abstinere, quia ut bene Origenes apud Eusebium: *Non idcirco deberet veritas partes suas omittere, quia eas sibi praveniens falsitas vendicasset.* Verū non est opus istiusmodi responsione, prout ex sequentibus clarissime patebit.

§ II. exponitur differentia inter nostram & Lutheri sententiam. Quod Lutherus docuerit timorem gehenna in substantia esse malum, quem nos bonum, & utilem esse profiteamur.

Quò non mortalia pectora cogit præconceptam sententiam propugnandi ardens libido? Quidam Professor (aliàs doctus) ut Attritionem suam servilem efficaciter stabiliret, negavit Lutherum do-



docuisse, quod timor gehennæ sit in substantia sua malus, sperans hæc ratione nos, vel invitos, in eandem cum Luthero navim pertrahere. Voluit ergo Lutherum ab errore excusare, ut ejusdem communionis Catholicos posset erroris accusare.

Similem excusationem Lutheri videre est apud Bellarminum libro 1. de pœnit. c. 6. ubi Kemnitius contendit, quod nequidem Lutherus docuerit Attritionem facere hominem hypocritam, & magis peccatorem. Sed eum Bellarminus efficaciter convincit ex ipso Luthero.

In præfenti autem, quod Lutherus (saltem initio suæ hæresis) docuerit timorem servilem in substantia sua malum esse.

PRIMÒ probatur. Quia Lutherus timorem servilem vocat *consuetudinem desperandi, & odiendi Deum*. Ergo ex ejus mente timor, docuerit timorem servilem in substantia sua malum esse.

Antecedens constat ex censura Parisiensi in causa Lutheri cum Eckio. Siquidem Lutherus ad illa verba Augustini, *bonum est timor &c.* subjunxerat hoc suum iudicium: *Hoc est meo iudicio CONSUETUDO DESPERANDI ET ODIENDI DEUM, si excludatur gratia*. Quod quidem dictum Lutheri à Parisiensibus tamquam falsum, temerarium, & impium reprobatum est. Docuit ergo Lutherus timorem in sua substantia malum esse, sicut est consuetudo desperandi & odiendi Deum.

SECUNDÒ. Docet Lutherus articulo 8. quod *imperfecta Charitas moritur: secum fert necessariò magnum TIMOREM, qui se solo satis est facere penam Purgatori, & IMPEDIT introitum regni*. Quem timorem in assertione ejusdem articuli apud Roffensem vocat *VITIUM CHARITATIS*. Hoc autem vitium charitatis, inquit, quid est aliud, quàm *FOMES & residuum originalis peccati, quod hominem privavit à recta, sententia, & perfecta charitate?* Si timor sit fomes peccati, ergo peccatum, ut in confutatione sua objicit illi Roffensis: *Fomes autem per se peccatū*.

Et ipse Lutherus in eadem assertione: *Fomes est virgo vivacissima & inquietissima actualium peccatorum*. Et infra: *Ideo fomes verè est actuale PECCATUM, actualis privatio, sive defectus eius rei, qua adesse debet*. Et inter propositiones de vera pœnitentia, quas statuit contra Antipomus & Papistas, Sophista, inquit, *originale post Baptismum, ne PECCATUM quidem esse cogitaverunt*. Ubi manifestè agit de fomite post Baptismum manente, quem vult esse peccatum. Vide Robertum Bellarminum l. 5. de amiss. gratiæ cap 4 & 5.

TERTIÒ. Lutherus in assertione articuli 6. intuitu pœnarum pœnitere vocat *affectum capitalem, PESSIMUM &c.* & generaliter, quod fitante amorem legis vocat hypocritism. Ergo ex ejus mente timor servilis in se peccatum est.

Apud Eckium de pœnit. c. 6. p. 138.

Pag. 86.

Apud Kirchn. p. 552.

QUARTO. Canon 8. sess. 6. Tridentini sic habet: *Si quis dixerit gehennam metum per quem ad misericordiam Dei de peccatis dolendo confingimur, vel à peccato abstinemus, peccatum esse, aut PECCATORES PEIORES facere, anathema sit.* Ubi cum postrema istius Canonis verba peccatores peiores facere, sint Luthero familiarissima, omnino verisimile est, quod Canon ille feriat Lutherum, ac proinde quod docuerit metum gehennae peccatum esse, aut peccatores peiores facere.

L. I. de poen.  
tit. c. II.

QUINTO. Catholici omnes, qui Luthero sese opposuerunt, ita mentem & verba Lutheri hactenus interpretati sunt, ut non dubitarent Lutherum docuisse, timorem servilem in sua substantia malum esse. Hinc Joannes Ekius: *Luther negat timorem esse initium poenitentiae, sed HYPOCRISIS augmentum.* Et cap. 13. *Destruere nititur hanc Catholicam instructionem Luther: quod poena non sint tenenda: quia TIMOR iste faciat MAGIS PECCATOREM & hypocritam.* Et cap. 19. *Existimat Luther omnem infidelium vitam esse peccatum, & quidquid liberum arbitrium agat sine charitate, peccatum sit: itaque TIMOR ille, praeveniens charitatem, PECCATUM sit.*

L. I. de poen.  
tit. c. II.

Item Bellarminus: *De hoc igitur timore (servili) tota controversia est: hunc enim Lutherum damnabat, ut qui faceret homines hypocritas, MAGISQUE PECCATORES.*

Videri potest à Castro, Valentia, aliisque Theologi, quorum testimonia hic referre superfluum judico, propterea quod obvia sint.

Ex dictis evidentissimum habetur discrimen inter nostram Lutherique sententiam, nimirum quod Lutherus docuerit timorem servilem in substantia peccatum esse, quod nos execramur.

§. III. *Explicatur aliud discrimen inter nostram, Lutherique, sententiam, quod Lutherus docuerit solo amore concipi poenitentiam: quod negamus.*

**N** Ecce tantum nomine à nobis discrepat Lutherus, sed & insuper quod negaret, timorem esse initium poenitentiae, vellerque solo amore concipi poenitentiam. Quem errorem damnamus cum Tridentino sess. 6. cap. 6. & sess. 14. cap. 4.

Quod autem Lutherus ita docuerit, probatur

PRIMO. Quia in Concilio Senonensi celebrato circa Annum 1528. inter errores repullulantes (utique Lutheri) damnatur hæc propositio: *Non licet homines inducere ad poenitentiam per timorem gehennae.*

Apud Beck.  
li. de poen.  
c. x. p. 138.

SECUNDO. Inter cæteras propositiones Lutheri damnatas ab Academia Parisiensi continetur hæc: *Christus nunquam peccatores, timore corripit ad poenitentiam.* Quam propositionem Academia Parisiensis ita cen-

cen-

cenſuerat: *Hæc propoſitio capiendò cogere pro inducere, ſicut capitur frequenter in Scriptura ſacra, eſt baretica.* Similiter hanc Lutheri propoſitionem: *S. Ioannes, ſcilicet Baptiſta, timorem docuiſſet eſſe initium Pœnitentia, non idè ſequitur pœnitentiam incipere à timore, hæc cenſurâ perſtringit Academia Pariſienſis: Hæc propoſitio eſt manifeſtè erronea, in Chriſtum & inſpiratam Præcurſorū eius doctrinam contumelioſa.* Ex quibus duabus propoſitionibus Lutheri ſatis elucet, quod voluerit pœnitentiam non poſſe timore concipi, ſed ſolo amore.

**TERTIO.** Ioannes Eckius, ſuis de Luthero & Carollſtadio victorij clarus libro 1. de Pœnitentia capite 2.3. & ſequentibus per multa argumenta oſtendit contra Lutherum pœnitentiam timore concipi, non ſolo amore. Et capite primo exponens ſtatum totius controverſiæ cum Luthero: *SUMMA ergo, inquit, diſputationis noſtræ eſt: contendit Ludder impugnando veritatem cum confidentia clamoris: CONTRITIONEM SOLO AMORE CONCIPI.* Si quĩ autem eam parate velit recogitando omnes annos in amaritudine anima ſua &c. hanc Contritionem aſſerit facere hypocriſim, ac magis peccatorem: pœnitentiam NONNISI AMORE CONCIPI.

**QUARTO.** Ioannes Roſſenſis, alterum Lutheri flagellum, ad articulum 6. Lutherum ſic alloquitur: *Quum Contritio poteſt duobus parari modis, hoc eſt vel per timoris, vel amoris viam, tu timore poſtpoſito, SOLO VIS AMORE Contritionem à peccatoribus quarti.*

Quapropter nos qui exiſtimamus non ſolo amore, verum etiam timore pœnitentiam concipi, non tantum à Lutheri doctrina diſcrepamus, verum etiam eidem doctrinæ è diametro repugnamus.

Dixi autem ſuprà, quod Lutherus inſitio ſua bareſis docuerit pœnitentiam ſolo amore concipi, quia in illa ſententia non conſtitit, ſed in oppoſitam poſtmodum lapſus eſt ſententiã nolens charitatem requiri ad juſtificationem, ſed timorem, tamen ſi mutato in terrores nomine.

Cujus rei aperta extat declaratio apud Alphonſum Virveſum in ſua Philippica nona adverſus Melanchtonem. Cum enim dixiſſet, quod Philippus Melanchton, ſi non fuiſſet ſtudio mentitus, ſaltem memoriã lapſus fuiſſet in commemorando primam Lutheri doctrinam de Pœnitentia. Subjungit: *PRIMAM dixi, quia variè hac de re ſicut & de cæteris, quas novo dogmate convulſit, loquutus eſt aliquoties.* Primò namque non fidei, ſed CHARITATI Pœnitentia ſummam, vimq, tribuerat, Theologorum Contritiones explodebat, irridebat Attritiones, TIMORES damnabat, nec à TERROREBUS iſtis, quos modo incutit, ſed à dilectione exiſtimabat inchoandam eſſe pœnitentiam. Vide Lutherum ſepticipitem Cochlezi, de timore Dei, ubi pulchrè hoc declaratur.

*non confundit, quia Caritas Dei diffusa est in cordibus nostris, per Spiritum sanctum, qui datur est nobis.*

Alio sensu voluntas aliqua dicitur efficax, quia non est simplex rei complacentia, seu velleitas, sed insuper est quædam inclinatio potentia ad conatum, seu executionem faciendam circa consecutionem rei volitæ.

Declaratur. Infirmus, qui nullam prorsus habet spem sanitatis, habet simplicem complacentiam in sanitate, quia complacentia illa non inclinat ipsum, ut conetur obtinere sanitatem.

At verò infirmus, qui putat sanitatem sibi possibilem habet voluntatem efficacem sanitatis, quia in vim istius voluntatis conatur sanitatem consequi, & executioni mandare.

In hac postrema significatione omnis illa voluntas dicitur efficax, quæ non est simplex rei complacentia, siue assequatur id quod desiderat, siue non, potestque dici voluntas *efficax quoad conatum*: quia etsi rem intentam non efficiat, saltem conatur (quamvis subinde nimis languidè) & cogitat rem illam efficere, & executioni mandare.

1. 2. disp.  
42. c. 3 p.  
346.

Hæc acceptio vocis, voluntas efficax, traditur eleganter à P. Gabriele Vasquez his verbis: *Observandum est duplicem esse affectum voluntatis, unus est qui tendit in rem non tantum secundum se, sed prout acquirendam & executioni mandandam, & hic affectus dicitur EFFICAX VOLUNTAS, eo quod feratur in rem efficiendam & effectu ipso consequendam: quod si quis interdum non exequatur id quod desiderat, satis est ad id CONARI ex parte sua, ut dicatur id desiderare. Alter affectus voluntatis est cuiusdam solius complacentia de re cogitata secundum se, & hic dicitur inefficax voluntas: neque enim omnia, quæ nobis secundum se considerata placent opere ipso exequi desideramus & contendimus. Dicitur etiam hac voluntas solius complacentia, simplex affectus, quia fertur in rem simpliciter, hoc est secundum se, non in executione consideratam.*

Et infra: *Nam voluntas simplex est, quæ nascitur ex re absque ulla cogitatione faciendi illam, vel consequendi: efficax verò illa est, quæ ex consideratione ita tendit in rem, ut opere velit exequi: debet etiam censerì EFFICAX illa, quæ reverà tendit in rem cum affectu, etiamsi ratione alicuius periculi, aut circumstantia ab ea RETRAHATUR.*

Disp. 111.  
c. 3. n. 12.  
p. 370.

Hunc modum distinguendi inter voluntatem efficacem & inefficacem plerique Interpretes D. Thomæ ad articulum 5. quæstionis 13. in prima secundæ postea secuti sunt, inter quos Puteanus noster, *Actus ille, inquit, dicitur inefficax, qui elicitur à potentia tendendo in obiectum, non cogitando de assecutione huiusmodi obiecti: efficax verò qui cogitat de obiecto consequendo.*

## §. VI. Respondetur difficultati proposita.

**N**on erit difficile, beneficio ac luce distinctionis jam explicatz, argumento proposito respondere. Quando enim dicitur, quod *actum proprium Spei sit voluntas efficax beatitudinis*, distinguendum est: vel enim sermo est de voluntate efficaci quoad effectum: & negandum est (plurimi enim sperant, qui non assumunt media, ad beatitudinem efficiendam omnino efficacia) vel sermo est de voluntate efficaci quoad aliquem conatum, seu, ut loquitur D. Thomas quoad aliquem *motum* in beatitudinem: & concedendum est. Verum constanter negari debet inde consequens esse, quod ille qui hoc sensu vult efficaciter beatitudinem, non possit ex infirmitate, vel conatu non satis pleno velle illud committere, quo scit se beatitudinem amittere.

2. 1. q. 17.  
2. 3.

Me silente veritatem illam loquuntur peccatores, qui non simplici nec merè otiosâ velleitate per actum spei moventur in beatitudinem, quamvis versentur in affectu peccati mortalis.

Juabit hac de re Patrem Coninck audire, qui in suo tractatu de virtute spei pulchrè ostendit, non esse necessarium ad Spem, ut voluntas modo INFALLIBILI prosequatur finem, assumendo ad hunc obtinendum MEDIA EX SE OMNINO EFFICACIA, *usq; modo infallibit de facto utendo*. Quod ità declarat: Nam multi Catholici incidunt in gravia peccata & in ijs quandoque vitam finiunt, qui tamen usque ad extremum retinent veram spem, saltem habitualement, & sapè eliciunt ACTUALEM, quia SPERANT per gratiam Dei, qua ijs non deest, à peccatu conversi, & ità beatitudinem obtinere, per media ad hoc ordinata, & quidem cum VERO sapè ac SERIO PROPOSITO amplectendi ea media: sed cuius effectus propter mutabilitatem voluntatis, exurgentes tentationes, ac secularia desideria impeditur, atque ità medijs ad salutem necessarijs malè utuntur, eaq; ex parte omnino negligunt.

Disp. 19.  
dub. 7. n. 96

Constat ergo ex hoc discursu, quod actus Spei, non dicatur voluntas efficax, quod excludat peccatū mortale, per quod beatitudo amittitur: sed longè diverso sensu, quia continet verum conatum & sapè verum ac serium propositum amplectendi media ad beatitudinem obtinendam efficacia, quamvis non semper amplectatur.

At numquid subindè saltem amplectitur istiusmodi media? Fateor, sed tū demum, quando peccator non tantum ad considerandam Dei misericordiam in spem erigitur, sed insuper Deum tamquam omnis Iustitiæ fontem benevolò affectu diligere incipit. Cū enim inter

media ad beatitudinem obtinendam efficacia, sit ipsa Dei propter se dilectio, quandoque contingit, ut Spes medium illud assumat, & voluntatem peccandi hâc ratione excludat. Verùm nunquam probabitur, quod Spes non accersito benevolæ dilectionis subsidio possit se solâ præexistentem peccandi voluntatem excludere.

At inquires & ad ravim usque repetes: quomodò ergo Spes dicitur voluntas efficax?

Disp. 1. de  
Spe sect. 3.

Respondebo ex R. P. Francisco Suarez, quia non habet se per modum actus imperfecti, sive per modum velleitatis & simplicis complacentiæ. In hoc enim desiderium differt à Spe, quod *desiderium dicitur omni appetitus boni absentis, sive sit per modum actus perfecti & efficaci, sive IMPERFECTI per modum VELLEITATIS* --- Spes verò imprimis significat actum perfectum per modum voluntatis efficaci. Quare vocabulum *efficax* non excludit nisi simplicem & otiosam velleitatem, quæ nullum conatum vel motum in beatitudinem continet.

Quæ autem dicta sunt de Spe, ejusque efficacia, debent etiam cum proportionem intelligi de timore servili, qui dicitur *efficax detestatio gehennæ*, quoad conatum, non tamen quoad effectum, ità ut tantum excludatur simplex displicentia gehennæ, quæ destituitur omni conatu vitandi gehennam, nullumque adhibet motum ad executionem mediorum.

Erit tamen, qui nondum acquiescat, sed dicat: actus Spei, ut fate-mur, movet ad executionem mediorum: ergo poterit impetrare, ut voluntas absteineat ab omni peccato, quia hoc medium est necessarium ad consecutionem finis, scilicet beatitudinis.

In 3. dist.  
26.

Respondeo: esto, imperet, si tamen nullus accedat benevolus in Deum affectus, nego quod voluntas parebit. Rationem petimus ex D. Bonaventura, qui observat, quod tendentia spei informis, est tantum *semiplena*. Unde si destituatur omni auxilio extrinseco non plenè exequitur, quod non plenè imperat.

Adverte itaque, quod animus frequenter sibi ipsi imperet, sed non ex toto, seu plenè, propterea quod non imperet ex affectu plenè & positivè contrario malæ voluntati in anima existenti: unde animâ sibi ipsi resistente non excluditur mala voluntas peccandi.

Pulcherrimè hoc describit in seipso Augustinus lib. 8. conf. cap. 9. *Imperat animus, inquit, corpori & paretur statim, imperat animus sibi & resistitur. Imperat animus, ut moveatur manus, & tanta est facilitas, ut vix à servitio discernatur imperium: & animus, animus est, manus autem corpus est. Imperat animus, ut velit animus, nec alter est, nec facit tamen. Unde hoc monstrum, & quare istud? Imperat, inquam, ut velit, qui non im-*

*imperaret nisi vellet, & non fit quod imperas. Sed non ex toto vult, non ergo EX TOTO IMPERAT. Nam in tantum imperat, in quantum vult, & in tantum non fit, quod imperat, in quantum non vult. Quoniam voluntas imperat, ut fit voluntas, nec alia, sed ipsa. Non utique PLENA imperat, idè non est, quod imperat.*

Dico ergo, quod ille, qui solius amoris concupiscentiæ intuitu sibi ipsi imperat à peccatis abstinentioniam, non plenè imperet, & idè non fiat quod imperat: sicuti contingit illi, qui ex solius naturalis amoris intuitu sibi ipsi imperat abstinentioniam ab omni peccato, quam tamen sine gratiæ auxilio non potest obtinere. Cujus rei ratio est, quod non imperet ex motivo quod habeat positivam cum peccato contrarietatem.

Simile quid ostendi potest in ægroto præ melancholia oppresso, imò jam, nisi resisterit, morituro, qui vult efficaciter quoad conatum pellere ex animo tristitiam, sibi què ipsi imperat, ut à tristitiæ malo abstineat: nunquam tamen hoc à seipso impetrabit, nisi imperet ex contrario motivo, gaudij & lætitiæ.

Quod si dicas actum unius virtutis, v. g. spei, posse imperare actum alterius virtutis v. g. charitatis, & per consequens posse præcipere abstinentioniam à peccato, quamvis non accedat actus alterius virtutis.

Respondebo quod voluntas non possit imperare actum alterius virtutis, nisi in executione accedat motivum alterius virtutis, ità etiam non potest imperare abstinentioniam à peccato virtuti opposito, nisi accedat motivum alicujus virtutis, peccato contrariæ: ejusdem enim naturæ est recessus à malo, & accessus ad bonum oppositum.

Sicut ergo in ægroto jam memorato, non potest amor vitæ plenè imperare actum gaudij nisi accedat motivum gaudij, nec abstinentioniam à tristitia, nisi accedat contrarium motivum istius abstinentioniæ: ità in præsentī non potest amor concupiscentiæ plenè imperare actum charitatis sine motivo charitatis, neque abstinentioniam à peccatis sine motivo peccatis contrario.

Neque refert quod peccator videat se non esse consecuturum beatitudinem nisi abstineat ab omni peccato, quia similiter æger videt se non obtenturum sanitatem, nisi abstineat à tristitia, & tamen si non accesserit motivum gaudij nunquam abstinerebit à tristitia. Sic etiam peccator videt lumine naturali se non esse consecuturum beatitudinem, nisi abstineat à peccato, & tamen solius naturalis luminis auxilio nunquam excludet positivè voluntatem peccandi. Quare in similibus veritatem obtinet, quod dicit Poëta: *Vide meliora, probosq;*  
*Detiora sequor.*

§. VII. *Alia quadam responsio.*

**A** Liter dici potest, quod spes dicatur esse voluntas efficax, non ratione sui præcisè, sed quia innititur meritis per auxilium habendis, in quibus si perseverantes fuerimus efficaciter perducemur ad beatitudinem. Ità ferè explicat Gabriel in 3. d. 26. post diffinitionem spei.

Quando ergo quaeritur, quomodo voluntas beatitudinis sit efficax, si homo committat illud per quod excidit à beatitudine? In promptu responsio est, quod efficacia illa non sit nisi conditionata, si homo perseveret in merito: & quia homo non perseverat in merito, hinc committit illud per quod excidit à beatitudine.

Atque hæc de sensu verborum Tridentini circa exclusionem peccati, quæ fusiùs deduximus propterea, quod res ea non satis à quibusdam examinetur.

Unum tamen addo, quod plerique antiqui Scholastici Tridentino viciniore existimaverint, quod verba illa Tridentini *ad Dei gratiam in Sacramento Pœnitentiæ impetrandam disponit*, non deberent intelligi nisi de dispositione remota, ità ut Tridentinum isto modo loquendi nihil aliud voluerit, quàm, quod ante Tridentinum docuerat Academia Lovaniensis in sua Confessione Catholica Anno 1542. articulo 4. his verbis: *Contritio est dolor de peccatù propter Dei offensam susceptum, cum proposito confitendi & satisfaciendi: non autem (ut quidam hoc sæculo permissè docent) terror conscientia propter apprehensum gehenna supplicium peccatù debitum. PRAEPARAT tamen hic terror, & gehenna metus ad veram animi Contritionem.* Multi ergo existimarunt, quod Attritio dicatur in Tridentino ad gratiam Dei impetrandam disponere, quia præparat ad gratiam veræ Contritionis in Sacramento impetrandam.

Ità Tridentinum explicat Alfonso Vivaldus: *Notandum, inquit, quod Concilium non dixit, quod ille sic attritus cum Sacramento gratiam ACQUIRET, vel IMPETRABIT, sed dicit: & quamvis sine Sacramento pœnitentia per se ad iustificacionem perducere peccatorem nequeat: tamen cum ad Dei gratiam in Sacramento Pœnitentiæ IMPETRANDAM DISPONIT.* Quod mihi videtur clarè dicere, quod in ipsa Confessione præparabitur ad susceptionem Sacramenti d. gnè. Hoc est ut ipse postea explicat: *Quum ex timore per fiduciam misericordia ad timorem gradum fecerit.*

Cæterùm, quia nobis nihil necesse est eò recurrere, responsionem illam missam facimus: ne quid tamen desideraretur, voluimus illam, Lectori curioso subindicare.

ARGU-



## ARGUMENTUM NONUM.

*Attritio Salutaris debet concipi ex illo timore, Quo UTILITER CONCUS-  
SIT NINIVITÆ PLENAM TERROREBUS POENITENTIAM ROBURUNT,  
ET MISERICORDIAM A DOMINO IMPETRABUNT: atqui timor ille  
Ninivitarum non fuit defisus omni benevolo in Deum affectu. Ergo.*

Trident.  
sess. 14. c. 4.

**A**liji tractatum est hoc ipsum argumentum, neque scio ali-  
quid responsum esse hactenus, quod Lectori curioso vel appa-  
renter satisfaceret. Nam neque ipsi illi, qui à nobis dissen-  
tiunt Theologi, audèbunt asserere Ninivitas solius timoris servilis  
beneficio pœnitentiam egisse, & misericordiam à Domino impetra-  
se. Quare cùm non videam quænam propositio in præsentì argu-  
mento vocari possit in controversiam, non est quod pluribus huic argu-  
mento comprobando insistam. Tantùm moneo ut prudens Lector  
maturè expendat in Tridentino particulam *enim*, quæ causam reddit  
doctrinæ præcedentis de Attritione.

*Argumenta quadam ex Tridentino conglobata.*

**Q**Uò attentius Tridentinum revolvam, eò magis confirmor in tra-  
dita hactenus doctrina. Quare, quæ ulterius occurrunt, sum-  
matim accipe.

Sessio 6. capite 6. & sessione 14. capite 1. inter præparationes  
ad justificationem requisitas Tridentinum illam recenset, quæ conti-  
netur verbis D. Petri Act. 2. *Pœnitentiam agite & baptizetur unus-  
quisque vestrum in nomine JESU CHRISTI &c.* atqui verbis D. Petri  
non continetur sola præparatio per motum timoris, nam ut benè ob-  
servat D. Nicolaus du Boys in hunc locum Actuum, Israëlitarum, quos  
Petrus alloquitur, erant compuncti spiritu timoris, proposito sibi  
v. 2. *Die Domini magno & manifesto*, & nihilominus D. Petrus  
requirit ab illis pœnitentiam ab illo spiritu timoris diversam:  
*Pœnitentiam agite* inquit. Et ne quis fortè diceret sermonem esse de  
pœnitentia extra Sacramentum, subiungit: & *BAPTIZETUR unus-  
quisque vestrum &c. & accipietis donum Spiritus sancti*. Undè etiam ex  
hoc loco Actuum fatetur prædictus Author ad justificationem cum  
Sacramento requiri saltem initialem Christi amorem.

Item ex sessione 6. cap. 7. cum Sacramento requiritur *fides*, quæ  
per charitatem seu dilectionem operatur ad Galatas 5. Atqui fides, quæ  
per charitatem operatur, requirit aliquam Dei propter se dilectio-  
nem:

nem: quomodo enim potest per charitatem operari, quod destituitur omni charitate? Apparebit autem magis vis hujus argumenti si cum Estio, aliisque verba Apostoli passivè exponamus, ut sensus sit: *Fides per charitatem animata, acta, mota, incitata ad opus*. Non enim potest fieri, ut sine charitate fides per charitatem animetur, agatur, moveatur, & incitetur ad opus.

Item capite 10. *Iustitia incrementum petit sancta Ecclesia, cum orat: Da nobis fides, spes, & CHARITATIS augmentum*. Ergo in homine iustificato præcessit non tantum fides & ipes, verum etiam charitas, utique actualis, quia Tridentinum agit de operibus, præmiserat enim ex D. Jacobo capite 2. *Videtur quoniam ex OPERIBUS iustificatur homo, & non ex fide tantum*.

Item capite 11. *Qui sunt filij Dei, Christum diligunt*: sed qui suscipit Sacramentum Pœnitentiæ sit filius Dei. Ergo Christum diligit.

Item ibidem: qui operando mercedem intuentur æternam, illud debent spectare, ut imprimè glorificetur Deus. Ergo etiam, qui fugiunt gehennam illud debent spectare ut in primis glorificetur Deus: atqui non spectat, ut in primis glorificetur Deus, qui Deum propter Deum non diligit, sed tantum spectat proprium commodum, & ut ita dicam glorificationem propriam. Ergo.

Item Canone 8. *Si quis dixerit gehenna metum PER QUEM ad misericordiam Dei de peccatis dolendo confugimus, vel à peccando abstinemus peccatum esse, aut peccatores salvos facere, anathema sit*. Ubi Tridentinum nominatim dicit *per quem*, non *propter quem*, ut significet gehennæ metum esse quidem principium extrinsecum de peccatis dolendi &c. non tamen causam finalem. Nam particula *propter* in rigore dicit causam finalem, particula autem *per* plura comprehendit, prout observat P. Suarez.

Et licet prædictus Pater aliquid ampliùs requirat, tamen non video quo fundamento, cum Tridentinum non plus requirat.

Et sanè Angelicus Doctor disertè docet, quod *timor servilis est sicut principium* EXTRA disponens ad sapientiam, & Seraphicus Doctor in 3. dist. 34. n. 58. *Servilis timor habet rationem principij* EXTRA, scilicet respectu sapientiæ.

Item sessione 14. cap. 2. Ad effectum pœnitentiæ salutaris pervenire nequaquam possumus *sine magnis nostris fletibus, ut meritis pœnitentiæ, laboriosus quidam Baptismus à sanctis Patribus dictus fuerit*. Quid autem opus magnis illis fletibus, si sufficit dolor ex timore gehennæ proveniens? Siquidem ut benè Augustinus tractatu 43. in Joannem: *Non est magnum timere pœnam*. Quis enim sur, quis latro non timet?

Ex

3.p.q. 85.  
disp. 5. 2.2.  
n. 5. p. 66.

2.2.q. 19.  
2.7.

Ex quibus omnibus manifestum esse existimo, quod Tridentinum passim supponat pœnitentiam salutarem non posse destitui omni benevolo in Deum offensum affectu.

## S C R U P U L U S.

*Adversus ea qua bætenus dicta sunt moveri potest scrupulus, quod ea quam tradidimus doctrinam, recidat in doctrinam Lutheri. Item, quod commisceantur & confundantur omnia: Contritio cum Attritione, novum Testamentum cum veteri, dum charitatem generatim requirimus ad justificationem cum Sacramento.*

## R E S P O N S I O.

§. I. *Declaratur, quod non omnia, qua ab hæreticis traduntur, sunt condemnanda.*

**N**on est novum, Erud. me D. Præses, quod ad effugiendam vim veritatis, obijciatur nomen hæretici. Ità Pelagiani obijciebant Augustino, quod Manichæis consentiret. Putant, inquit, hæretici novi Manichæorum nomine obiectio vim subterfugere veritatis, sed non subterfugunt. L. V. Bo. nif. c. 9.

Sic etiam Cyrillus Alexandrinus in commentario scripto ad Eulogium Presbyterum Constantinopoli agentem scribit, quod ab Orientalibus omnibus accusaretur Apollinarij opiniones sequi, sentireq; naturatum confusionem factam esse: imò, ut constat ex eodem commonitorio, accusatus fuit à nonnullis, quod cum Nestorio Antagonista suo sentiret. Quibus ità respondet: *Is qui hoc nomine nos accusant, respondendum est, non omnia, qua hæretici dicunt statim fugienda ac REPUDIANDA esse. Multa enim consentiunt ex his, qua nos quoque asserimus. Exempli causâ cum Ariani Deum Patrem omnium ac Dominum esse dicunt, num idè consequens est, ut eiusmodi confessiones aversemur?* Sic etiam respondet Augustinus: *Numquid propterea dicere non debemus, quod bonus Deus fecerit mundum, quia hoc etiam dicit Manichæus?* L. 5. op. post. cent. Jul. c. 10.

Sic ergo possemus respondere: numquid propterea dicere non debemus, quod ad justificationem, etiam cum Sacramento, Deus dilectionem suam requisiverit, quia hoc etiam dicit Lutherus?

Et finè, ut observat S. Cyrillus scribens ad Valerianum Episcopum, hæretici sunt humanorum corporum Medicum non absimiles: si enim phar-

*pharmacis insuavis mel immiscere soleus, ut dulcedine qualitate eorum fallant perceptionem, quae suapte naturâ tristitiam, nauseamq, inducunt.*

Et in sacrosyllabo Concilij Francofordienlis legimus, quod *mos est haereticis tristia laeti, dulcia permiscere amari, veneni poculum mellis sapore temperare.* Quare D. Hieronymus Epistolâ ad Ctesiphontem applicat haereticis verba illa Lucretij.

*Ac veluti pueris absinthia setra, medentes  
Cum dare conamur, prius oras pocula circum  
Contingunt, dulci mellis, flavoq, liquore.*

Quia nimirum haeretici, solent noxijs suis dogmatibus, quædam admiscere verissima, ut hætelis venenum incauti & simplices cum securitate sorbeant.

Propius autem veniendo ad propositum nostrum Joannes Eckius libro 3. de pœnitentia cap. 12. multis probat, & ostendit, quod hæretici, & nominatim Lutherus, multa bona permiscuerit malis, applicatque Luthero illud Plautini Euclionis: *Vnâ manu fert Lapidem, alia panem ostendit.* Hinc subiungit: *Non patiatúr simplex se decipi sub charitatis specie, sub illice aliquando bona doctrina intermixta: Semper enim latet anguis in herba.*

Et Cochleus in vita Lutheri alicubi testatur, quod multa bona, tum exponendo scripturas, tum adhortando & corripiendo homines pessimis machinationibus suis admiscebat: adeo, ut plerique etiam magna auctoritatis viri crederent illum vero agi zelo virtutis, & spiritu Dei.

Quamvis ergo Lutherus eandem nobiscum Dei dilectionem ad salutarem pœnitentiam requisivisset, non tamen idcirco credendum foret doctrinam illam esse damnatam: quid si enim sit ex illis bonis dogmatibus, quæ suis pessimis machinationibus admiscuit?

L. 6. c. 15.

Quare non deberemus propterea ab illa doctrina abstinere, quia ut benè Origenes apud Eusebium: *Non idcirco deberet veritas partes suas omittere, quia eas sibi praveniens falsitas vendicasset.* Verùm non est opus istiusmodi responsione, prout ex sequentibus clarissimè patebit.

§ II. *exponitur differentia inter nostram & Lutheri sententiam. Quod Lutherum docuerit timorem gehenna in substantia esse malum, quem nos bonum, & utilem esse profiteamur.*

**Q**Uò non mortalia pectora cogit præconceptam sententiam propugnandi ardens libido? Quidam Professor (aliàs doctus) ut Attritionem suam servilem efficaciter stabiliret, negavit Lutherum do-

docuisse, quod timor gehennæ sit in substantia sua malus, sperans hæc ratione nos, vel invitos, in eandem cum Luthero navim pertrahere. Voluit ergo Lutherum ab errore excusare, ut ejusdem communionis Catholicos posset erroris accusare.

Similem excusationem Lutheri videre est apud Bellarminum libro 1. de pœnit. c. 6. ubi Kemnitius contendit, quod nequidem Lutherus docuerit Attritionem facere hominem hypocritam, & magis peccatorem. Sed eum Bellarminus efficaciter convincit ex ipso Luthero.

In præsentem autem, quod Lutherus (saltem initio suæ hæresis) docuerit timorem servilem in substantia sua malum esse.

PRIMÒ probatur. Quia Lutherus timorem servilem vocat *consuetudinem desperandi, & odiendi Deum*. Ergo ex ejus mente timor, docuerit timorem servilem in substantia sua malum esse.

Antecedens constat ex censura Parisiensi in causa Lutheri cum Eckio. Siquidem Lutherus ad illa verba Augustini, *bonum est timor* &c. subjunxerat hoc suum iudicium: *Hoc est meo iudicio CONSUETUDO DESPERANDI ET ODIENDI DEUM, si excludatur gratia*. Quod quidem dictum Lutheri à Parisiensibus tamquam falsum, temerarium, & impium reprobatum est. Docuit ergo Lutherus timorem in sua substantia malum esse, sicut est consuetudo desperandi & odiendi Deum.

SECUNDÒ. Docet Lutherus articulo 8. quod *imperfecta Charitas moritur secum feri necessitas magnum TIMOREM, qui se solo satis est facere penam Purgatori, & IMPEDIT introitum regni*. Quem timorem in assertionem ejusdem articuli apud Rossensem vocat *VITIUM CHARITATIS*. Hoc autem vitium charitatis, inquit, *quid est aliud, quam FOMES & residuum originalis peccati, quod hominem privavit à recta, securâ, & perfecta charitate?* Si timor sit fomes peccati, ergo peccatum, ut in confutatione sua objicit illi Rossensis: *Fomes autem per se peccat.*

Et ipse Lutherus in eadem assertionem: *Fomes est origo vivacissima & inquietissima actualium peccatorum*. Et infrà: *Idè fomes verè est actuale PECCATUM, actualis privatio, sive defectus eius rei, qua adesse debet*. Et inter propositiones de vera pœnitentia, quas statuit contra Antinomos & Papistas, *Sophistas*, inquit, *originale post Baptismum, ne PECCATUM quidem esse cogitaverunt*. Ubi manifestè agit de fomite post Baptismum manente, quem vult esse peccatum. Vide Robertum Bellarminum l. 5. de amiss. gratiæ cap. 4 & 5.

TERTIÒ. Lutherus in assertionem articuli 6. intuitu pœnarum pœnitere vocat *affectum capitale, PESSIMUM* &c. & generaliter, quod sit ante amorem legis vocat hypocritism. Ergo ex ejus mente timor servilis in se peccatum est.

Apud Eckium de pœnit. c. 6. p. 138.

Pag. 86.

Apud Kirchp. p. 552.

QUARTO. Canon 8. sess. 6. Tridentini sic habet: *Si quis dixerit gehennam metum per quem ad misericordiam Dei de peccatis dolendo confugimus, vel à peccato abstinemus, peccatum esse, aut PECCATORES PEIORES facere, anathema sit.* Ubi cum postrema istius Canonis verba peccatores peiores facere, sint Luthero familiarissima, omnino verisimile est, quod Canon ille feriat Lutherum, ac proinde quod docuerit metum gehennae peccatum esse, aut peccatores peiores facere.

QUINTO. Catholici omnes, qui Luthero sese opposuerunt, ita mentem & verba Lutheri hactenus interpretati sunt, ut non dubitarent Lutherum docuisse, timorem servilem in sua substantia malum esse. Hinc Joannes Ekius: *Ludder negat timorem esse initium poenitentiae, sed HYPOCRISIS augmentum.* Et cap. 13. *Destruere nititur hanc Catholicam instructionem Ludder: quod poena non sint tenenda: quia TIMOR iste faciat MAGIS PECCATOREM & hypocritam.* Et cap. 19. *Existimat Ludder omnem infidelium vitam esse peccatum, & quidquid liberum arbitrium agat sine charitate, peccatum sit: itaque TIMOR ille, praeveniens charitatem, PECCATUM sit.*

L. I. de poenit. c. 11.

L. I. de poenit. c. 17.

Item Bellarminus: *De hoc igitur timore (servili) tota controversia est: hunc enim Lutherum damnabat, ut qui faceret homines hypocritas, MAGISQUE PECCATORES.*

Videri potest à Castro, Valentia, aliisque Theologi, quorum testimonia hic referre superfluum judico, propterea quod obvia sint.

Ex dictis evidentissimum habetur discrimen inter nostram Lutherique sententiam, nimirum quod Lutherus docuerit timorem servilem in substantia peccatum esse, quod nos execramur.

§. III. *Explicatur aliud discrimen inter nostram, Lutherique, sententiam, quod Lutherum docuerit solo amore concipi poenitentiam: quod negamus.*

**N**Ec eo tantum nomine à nobis discrepat Lutherus, sed & insuper quod negaret, timorem esse initium poenitentiae, velleque solo amore concipi poenitentiam. Quem errorem damnamus cum Tridentino sess. 6, cap. 6. & sess. 14, cap. 4.

Quod autem Lutherus ita docuerit, probatur

PRIMO. Quia in Concilio Senonensi celebrato circa Annum 1528. inter errores repullulantes (utique Lutheri) damnatur haec propositio: *Non licet homines inducere ad poenitentiam per timorem gehennae.*

Apud Beck.  
lib. de poenit.  
c. 1. p. 138.

SECUNDO. Inter ceteras propositiones Lutheri damnatas ab Academia Parisiensi continetur haec: *Christus nunquam peccatores timore corripit ad poenitentiam.* Quam propositionem Academia Parisiensis ita cen-

cenſuerat: *Hac propoſitio capiendò cogere pro inducere, ſicut capitur frequenter in Scriptura ſacta, eſt hæretica.* Similiter hanc Lutheri propoſitionem: *S. Ioannes, ſcilicet Baptiſta, timorem docuiſſet eſſe initium Pœnitentia, non ided ſequitur pœnitentiam incipere à timore,* hâc cenſurâ perſtringit Academia Pariſienſis: *Hac propoſita eſt manifeſtè erronea, in Chriſtum & inſpiratam Præcurſorũ eiuſ doctrinam contumelioſa.* Ex quibus duabus propoſitionibus Lutheri ſatis elucet, quod voluerit pœnitentiam non poſſe timore concipi, ſed ſolo amore.

**TERTIO.** Ioannes Eckius, ſuis de Luthero & Carolſtadio victorijſ clarus libro 1. de Pœnitentia capite 2. 3. & ſequentibus per multa argumenta oſtendit contra Lutherum pœnitentiam timore concipi, non ſolo amore. Et capite primo exponens ſtatim totius controuerſiæ cum Luthero: *SUMMA ergo, inquit, diſputationis noſtra eſt: contendit Ludder impugnando veritatem cum confidentia clamoris: CONTRITIONEM SOLO AMORE CONCIPI.* Si quis autem eam parare velit recogitando omnes annos in amaritudine anima ſua &c. hanc Contritionem aſſerit facere hypocritam, ac magis peccatorem: pœnitentiam NONNISI AMORE concipi.

**QUARTO.** Ioannes Roſſenſis, alterum Lutheri flagellum, ad articulum 6. Lutherum ſic alloquitur: *Quum Contritio poteſt duobus parari modis, hoc eſt vel per timorem, vel amoris viam, tu timore poſſoſito, SOLO VIS AMORE Contritionem à peccatoribus quari.*

Quapropter nos qui exiſtimamus non ſolo amore, verum etiam timore pœnitentiam concipi, non tantum à Lutheri doctrina diſcrepamus, verum etiam eidem doctrinæ è diametro repugnamus.

Dixi autem ſuprà, quod Lutherus initio ſua hæreſis docuerit pœnitentiam ſolo amore concipi, quia in illa ſententia non conſtitit, ſed in oppoſitam poſtmodum lapſus eſt ſententiã nolens charitatem requiri ad iuſtificationem, ſed timorem, tamen li mutato in terrores nomine.

Cujus rei aperta extat declaratio apud Alſonſum Virveſium in ſua Philippica nona adverſus Melanchtonem. Cum enim dixiſſet, quod Philippus Melanchton, ſi non fuiſſet ſtudio mentitus, ſaltem memoriã lapſus fuiſſet in commemorando primam Lutheri doctrinam de Pœnitentia. Subjungit: *PRIMAM dixi, quia variè hac de re ſicut & de cæteris, quæ novo dogmate convulſit, loquutus eſt aliquoties. Primò namque non fidei, ſed CHARITATI Pœnitentia ſummam, vimq; tribuerat, Theologorum Contritiones explodebat, irridebat Attritiones, TIMORES damnabat, nec à TERROREBUS iſtis, quos modo incutit, ſed à dilectione exiſtimabat inchoandam eſſe pœnitentiam.* Vide Lutherum ſepticipitem Cochleæ, de timore Dei, ubi pulchrè hoc declaratur.

Quare si velimus candidè fateri quod res est, & nos & Adversarij docemus aliquid commune, & oppositum doctrinæ Lutheri pro diversa ratione temporum. Nobis commune est, quod initio suæ hæresis docuerit, pœnitentiam debere ex amore concipi: Adversarijs commune est, quod postea docuerit pœnitentiam timore, seu terrore concipi. Nobis oppositum est, quod initio suæ hæresis docuerit solo amore pœnitentiam concipi: Adversarijs oppositum est, quod postea docuerit solo timore, seu terrore pœnitentiam concipi. Quare omnibus attentis, posset quis fortassis dicere, quod comparatione Lutheri habeamus nos, juxta phrasim Philosophorum, *ut excedentia & excessa*.

§. IV. Respondetur argumento cuiusdam Recentioris.

**Q**uidam Recentior Theologus existimat se rem conficere, dum ita argumentatur:

*Lutherus graviter redarguit Catholicos, quod docerent Attritionem ex timore solo gehenna conceptam sufficere cum Sacramento: Luthero eiusq; sequacibus anathema dicit Tridentinum, & declarat huiusmodi Attritionem sufficere cum Sacramento Pœnitentiae. Quod si quæras ubi, & quo loco Tridentinum hoc declaret? Respondet Tridentinum illic declarare, ubi condemnat Lutherum, & approbat doctrinam Catholicorum de Attritione. Nam Tridentinum loquitur eo sensu, quem Catholicis attribuit Lutherus, sed Lutherus attribuit Catholicis, quod doceant Attritionem ex solo timore pœnae conceptam sufficere cum Sacramento Pœnitentiae. Ergo Attritio ex solo timore pœnae concepta approbatur à Tridentino. Hæc est summa & vis huius (si superis placet) invincibilis argumenti.*

Verùm ut appareat, quàm inane sit hoc argumenti genus, oppono ejusdem tenoris & formæ argumentum: *Lutherus graviter redarguit Catholicos, quod docerent Attritionem naturalem sufficere cum Sacramento Pœnitentiae (constat hoc ex assertionem articuli sexti) Luthero, eiusq; sequacibus anathema dicit Tridentinum, & declarat huiusmodi Attritionem sufficere cum Sacramento Pœnitentiae. Quod si quæras, ubi & quo loco Tridentinum hoc declaret? Illic, inquam, ubi condemnat Lutherum, & approbat doctrinam Catholicorum de Attritione: nam Tridentinum loquitur eo sensu, quem Catholicis attribuit Lutherus, sed Lutherus attribuit Catholicis, quod doceant Attritionem naturalem sufficere, cum Sacramento. Ergo &c.*

Quid ad hæc respondebis? Quid obsecro nisi, vel Tridentinum de mente Lutheri sollicitum non fuisse, vel (quod verissimum est) mentitum fuisse Lutherum, dum ausus est dicere, quod Catholici doceant Attritionem naturalem sufficere cum Sacramento Pœnitentiae.

Illud



Illud ipsum ergo responde argumento jam proposito, nimirum, quod vel Tridentinum de mente Lutheri sollicitum non fuerit, vel mentitum fuisse Lutherum, dum ausus est dicere, quod Catholici doceant Attritionem ex solo timore gehennæ conceptam sufficere cum Sacramento Pœnitentiæ, maxime si sermo sit de Attritione ex solo metu gehennæ concepta & cognita: vel certè, si quis ita docuerit (quod nullatenus existimo) non fuisse sufficientis autoritatis, ut ejus sensus faciat sensum Ecclesiæ à Tridentino approbandum.

Quocirca sciendum est, quod in materia de pœnitentia Lutherus ejusque affecte multa affinxerint Catholicis, quæ nequaquam docebant. Quod Albertus Pighius controversiâ 9. ita declarat: *In Pœnitentia more suo plurima nobis affingentes, quæ cum doctrina nostra planè pugnant è diametro, & eandem confusissimam, obscurissimam --- odiosissimè criminantes --- plurimumq; lucu per Lutheri scripta investum in banc doctrinam Pœnitentiæ gloriantur & iactant. Et insità: Nostram doctrinam impugnare cum videri volunt, Andabatarum more in tenebris dimicant, imò doctrinam nostrā non intelligentes, sua ipsorum somnia, quæ nobis impudenter affingunt, impugnant, aiunt nos affirmare ita remitti peccatum, quia contritus intelligit actum dilectionis, per quem remissionem peccatorum mereatur accipere, In quo confutando se frustra fatigant, cum nos nihil asseramus minus. Neque enim dilectionem ex Contritione, sed contra Contritionem ex amore ac dilectione procedere dicimus. Quamdiu peccator non diligit, manet in morte.*

Eleganter illud ipsum declarat Alfonso Virvesius in Phillippica nona: *Doctores vestri, inquit, ut ingenuè dicam, in hoc & alijs huiusmodi vobis imponunt, falsa dogmata ex vera Theologorum doctrina confingentes, quo nos vobis reddant suspectos, & invidiosos, & ipsi habeant, adversus quos insurrexisse videantur, dum in FICTAS OPINIONES maximo conatu, uti somniantes in propria simulacra invehuntur & FINGENTES SIBI MONSTRA, quæ vincant, meras umbras ducunt in triumphum.*

Quare dico, quod Lutherus fictam opinionem impugnaverit, & meram umbram duxerit in triumphum, quando asseruit Catholicos docere, quod solus timor sufficeret legitime pœnitentiæ comparandæ.

Ita ipsi Luthero respondit Joannes Eckius. Cum enim Lutherus dixisset *timorem anse charitatem esse infructuosum*: non respondet (quod forè multi hoc tempore responderent) quod timor iste seclusa charitate proximè disponat ad justificationem cum Sacramento, sed, inquit, *vel fallitur Lutherus, aut fallere vult Catholicos --- FATENTUR enim & hoc CATHOLICI cum sancto Paulo, si quis charitatem non habuerit &c. fatentur si quis vellet STARE IN TIMORE SERVILI dum-*

L. I. de pœ-  
nit. c. 5. p.  
141.

taxat, sicut Iudas, quod veram poenitentiam nunquam adipisceretur: sed per hoc non improbat Ludder, quin timor sit initium poenitentiae: quin per timorem paretur & acquiratur poenitentia. Is est scopus negotij, quem Ludder non tangit.

Et infra: Volumus solum impetrare, quod timor poenae valeat ad parandam Poenitentiam: quia timore concipitur, & ita timor sit initium Poenitentiae. NEMO CATHOLICUS VULT TIMOREM ESSE POENITENTIAM.

Admittit ibidem Luthero Eckius, quod recordatio legis, & intuitus poenarum non faciant POENITENTEM, nam ab hu, quis non dicitur poenitens. Addit: Tamen illa faciunt plerumque ut succedat amor filialis, & ad hoc conducunt & adjuvant & pro tanto valent ad Poenitentiam parandam.

Solis radijs clarius est, quod Eckius admittat Luthero poenitentiam non sufficere si procedat ex solo timore, nec perveniat ad filialem: dicit tamen se conclusionem Lutheri in parte rejicere: quia ex illo assumpto inferebat Lutherus Poenitentiam non incipere à timore, ut ibidem disertè explicat Eckius & improperat Luthero.

Mentitus est ergo Lutherus dicens, quod Catholici docerent poenitentiam ex solo timore gehennae conceptam sufficere cum Sacramento poenitentiae, fatebantur enim Catholici, ut audivimus ex Eckio, quod si quis vellet stare in timore servili dumtaxat, quod veram Poenitentiam nunquam adipisceretur.

Ex quo Joannis Eckij responsio patet meram fuisse Lutheri calumniam, quando dixit, quod Catholici docerent Attritionem servilem cum Sacramento sufficere.

Ut autem efficacius illud ipsum probem, profero Joannis Morini viri doctissimi luculentam attestationem. Scribit ille lib. 8 de poenit. c. 4. Quod Attritio ex sola formidine concepta, talisq; à Poenite COGNITA, & immutata sese habens, legitima & sufficiens sit preparatio ad gratiam in Sacramento suscipiendam, Auctores fuerunt Melchior Canus Francisci Victoria discipulus, & Henricus quidam Salmanticensis Doctor. Amè hoc (inquit ille solertissimus indagator) neminem legi qui sic doceret, aut docere perhiberetur. Hac quaestio planè nova est, & omnibus Scholasticis ante hoc saeculum incognita, ut rectè adnotavit Alexander Pessanus &c.

Ex quibus verbis propono illi recentiori tale dilemma. Alteruter mentitus est, vel Morinus, quando negavit Scholasticos ante tempora Lutheri docuisse Attritionem servilem cum Sacramento sufficere, vel Lutherus, quando affirmavit. Mentitum fuisse Morinum nullo fundamento, mentitum fuisse Lutherum, propter innumera alia ejusdem mendacia, summo fundamento asseritur. Ergo.

Rectè

Rectè autem Morinus in suo testimonio addidit: *Talisq; à Penitente cognita*. Quia ante Lutheri tempora nonnulli Scholaſtici, quamvis pauciores, docuiſſe videntur Attritionem ex ſola formidine pœnæ conceptam ſufficere cum Sacramento, dummodò bonâ fide exiſtimaretur provenire ex amore Dei.

Sed illi nullâ ratione favent Adverſarij, exiſtimarunt enim (quod Florentino & Tridentino non ſatis conforme eſt) quod Sacramentum Pœnitentiæ propter bonam fidem ſuſcipientis ſuppleret defectum doloris, vel ſaltem quod in ipſo Sacramento infunderetur verus dolor & vera Contritio.

Quam ſententiam amplexus videtur Joannes Roſſenſis, ne quis illum Adverſarij patrocinarî ſibi perſuadeat. Colligo hoc evidenter (niſi me fallit conjectura) ex verbis, quæ habet in confutatione articuli 5. ubi ſcribit: *Ego certè tam fidem quàm DOLOREM VOTO ſaltem AFFECTATUM exigi non dubito*. Agit de eo, qui accedit ad abſolutionis Sacramentum, & docet, quod ſufficiat *ſi habeas dolorem affectatum*, hoc eſt ſi bonâ fide conetur & putet ſe habere dolorem ex charitate proveniente. Undè quæcumque ſcribit de ſufficientia timoris in Sacramento Pœnitentiæ, ex hoc loco explicanda ſunt, quod ſcilicet putet Attritionem ex timore proveniente cum Sacramento ſufficere, dummodò exiſtimetur & ſit affectata, ut ſic dicam, Contritio.

§. IV. *Expenditur, quæ ſit Contritionem inter & Attritionem differentia.*

**S**I quis velit hanc eſſe differentiam, quod Attritio ſalutaris non ſit vera & realis Contritio (prout quidam docere videntur) dicendum eſt, quod illa differentia ſit fictitia, & imaginaria: conſtat enim ex argumento ſeptimo, ejulq; probationibus, quod omnis Attritio ſalutaris, ſit vera & realis Contritio.

Quia tamen per antonomasiam Contritio ſolet diſtingui ab Attritione, ſeu Contritione imperfecta, operæ pretium erit expendere, quâ ratione Theologi utrumque diſtinxerint.

Sunt autem hac in parte diverſiſſimi, ut propterea D. Caramuel in ſua Theologia fundamentali ſcribat: *Quo differant modo (Contritio & Attritio) conantur explicare Theologi, nec unquam ita clare poſſunt, ut animus ſcrupuloſus conquieſcat.*

Patebit hoc legenti antiquos Scholaſticos, quorum aliqui docent Attritionem eſſe Contritionem eſſentialiter imperfectam, ſicut ſœtus non animatus imperfectè eſt homo: alij docent nonnili acciden-

taliter imperfectam, sicut puer imperfectè est homo, & gradus remissus albedinis imperfectè est albedo. Undè Joannes Major in 4. *Multi famigerati viri de discrimine inter Attritionem & Contritionem superficialiter loquuntur.* Quia nimirum non satis illas imperfectiones Attritionis distinguunt. Nos interim aliquas Attritionis & Contritionis differentias proponemus.

- PRIMÒ itaque multi antiqui Scholastici Contritionem vocabant displicentiam de omnibus peccatis: Attritionem verò, displicentiam de aliquibus sed non de omnibus peccatis. Ità rem illam explicat Thomas ab Argentina in 4. dist. 17. art. 2. *Hinc est, inquit, quod Doctores quandoque dicunt, quod Attritio semper est infirmus, hoc est sine charitate: quia quamdiu isto modo teritur de aliquibus, & non de omnibus, tandem caret virtute Despicæ charitativæ.*

Sess. 14.  
c. 4.

Et secundum hanc notionem actus Attritionis est essentialiter imperfectus, nec potest fieri vera Contritio, differtque essentialiter à Contritione, neque sufficit cum Sacramento, ut constat ex Tridentino.

Suprà.

SECUNDÒ. Attritio differt à Contritione, quod ille habeat Contritionem qui dolet se patrasse peccatum, ille Attritionem, aut Contritionem imperfectam, qui dolet se dolere non posse. Ità Caramuel.

Suprà.

Etià secundum hanc notionem actus Attritionis est essentialiter imperfectus, nec potest fieri vera Contritio, differtque essentialiter à Contritione, neque reconciliatur cum Sacramento, ut constat ex eodem Tridentino.

TERTIÒ. Aliqui distinguunt Contritionem ab Attritione, quod Contritio proveniat ex affectu benevolentiae in Deum, Attritio verò ex timore solius poenae, v. g. gehennae &c.

Sed & hujusmodi Attritio essentialiter imperfecta est, neque potest fieri vera Contritio, aut reconciliare cum Sacramento, ut constat ex suprà dictis.

QUARTÒ. Nonnulli distinguunt Contritionem ab Attritione, sicut timorem filialem ab initiali: quod scilicet Contritio proveniat merè ex amore benevolentiae, quo poenitens Deum perfectà Charitate complectitur: Attritio autem proveniat partim ex amore benevolentiae, quo poenitens Deum complectitur, partim ex formidine poenae: ità ut Attritio habeat quodammodò duos oculos, unum ad culpam, seu offensam Dei dilecti, alterum ad poenam, & commodum proprium.

De timore  
c. 5. p. 4.

Sicut ergo D. Laurentius Justinianus scribit de timore initiali, *quod quasi habet duos oculos, unum ad poenam, & alterum ad Dei offensam.* Ità ferè

ferè loquuntur de Attritione. Videatur Albertus Pighius controuersia nona.

Et hæc Attritio, quam initialem possumus dicere, non est essentialiter imperfecta, neque differt essentialiter à contritione, sicut timor initialis non distinguitur in substantia à filiali juxta D. Thomam 2. 2. q. 19. a. 8.

Vide Suar.  
de spe.  
disp. 4. 4.

Reconciliat autem cum Sacramento, si cum fiducia Divinæ misericordiæ, & voto præstandi reliqua conjuncta sit, quæ ad ritè suscipiendum hoc Sacramentum requiruntur.

QUINTO. Contritio differt ab Attritione præcedente, quod conjuncta sit cum gratia sanctificante, Attritio non. Ità distinguit D. Thomas quæstione 28. de veritate art. 8. ad 3. Dicendum, inquit, quod *Contritio ab Attritione præcedente non differt solum secundum intentionem doloris, sed etiam INFORMATIONEM GRATIÆ. Et ita Contritio habet aliquem ordinem posterioritatis ad gratiam, quam non habet Attritio.*

Quæ doctrina communis erat tempore Alberti M. Cum enim quæreret, utrùm Attritio fieri queat Contritio? Respondet, *quemadmodum communiter dicitur Attritio est dolor de peccatis non procedens ex charitate & gratia. Contritio verò dolor de peccatis ex charitate, & gratia profluens.*

Dist. 16.  
8. apud  
Dion.

Et Attritio in hac significatione, neque est actus essentialiter imperfectus, neque differt essentialiter à Contritione. Meo quoque iudicio, inquit idem Author, *unus & idem dolor in SUBSTANTIA potest esse Attritio & Contritio, sicut idem in re est fides informis & fides formata.*

Cui doctrinæ consentaneum est, quod legimus apud Doctorem subtilem, quod *Attritio fiat Contritio sine omni mutatione reali ipsius actus.* Undè memini me legisse in conclusionibus decerptis ex Scoto Duaci impressis Anno 1647. *Quod idem omnino motus contra peccatum, qui fuit Attritio, sine omni prorsus mutatione, adveniente charitate, seu gratiâ ex qua fit actus formatus, sit etiam Contritio.* Vide etiam Tatartum in 4. dist. 14. q. 1.

In 4. d. 14.  
q. 2. n. 15.

D. autem Bonaventura in 4. dist. 17. explicat, quomodo id fieri possit, *Concedo, inquit, quod actus qui in principio sui est Attritio, antequam interrumpatur fiat Contritio, ut patet de motu quo quis vadit ad Ecclesiam, si ei in via gratia infundatur.*

Quapropter secundum hanc significationem Contritio & Attritio sunt idem actus, differunt tamen extrinsecè penes adjunctum, vel non adjunctum gratiæ sanctificantis consortium.

SEXTO. Multorum Doctorum de re Theologica optimè meritorum

rum sententia est, quod Contritio & Attritio tantum differant penes intentum & remissum, sive secundum maiorem & minorem ejusdem speciei perfectionem. Hinc Cajetanus vocat commune dictum, quod Contritio & Attritio differant secundum magis & minus.

N. 4. de  
Attritt.

De Sacra.

Poenit. p. 31

Et sanè Guilielmus Parientis, qui inter primos Attritionis meminit, disertè docet & probat, quod amor Attritionis & Contritionis, sint secundum idem, & PROPTER IDEM. Sunt, inquit, unius & ejusdem speciei, & ita non differunt nisi secundum magis & minus. Et infrà: Erunt ejusdem speciei amor preparatorius (id est Attritio) & amor, qui charitas dicitur.

De Contri.

p. 204.

Eandem fuisse sententiam D. Thomæ, Scoti, & aliorum, testatur P. Josephus Angles Valentinus Ordinis Minorum in floribus Theologicarum quaestionum.

Possem Adriani, aliorumque, qui ante Tridentinum scripserunt, testimonia proferre: sed quorsum, cum res sit satis manifesta? Quare sufficit ostendere, quod etiam post Tridentinum eadem doctrina placuerit non exigua notæ Theologis.

Eminentissimus Cardinalis Constantius Sarnanus Anno 1592. scripsit summam Theologicam Clementi octavo nuncupatam: de qua cecinit noster Angelus Rocca à Camerino:

*Ordine, qua longo sacri scripsere Magistri,  
Parvulus hic facili continet arte liber.*

Pag. 152.

In hujus Summæ loco sexto inter cætera scribit: *Attritio virtute Sacramenti fit Contritio. Proinde non videntur ab invicem distare, NISI PENES INTENSIONEM ET REMISSIONEM: idedq, quemadmodum eadem albedo numero, potest fieri intensior; ita planè idem actus remissus potest fieri intensus, Materialiter ergo idem sunt, sicut domus opaca & lucida: est enim Attritio velut lux Aurora, qua sensim incrementa lucis suscipiens efficitur merides. Comparatio autem illa inter auroram, & meridiem ex una parte, & Attritionem & Contritionem ex alia parte familiarissima fuit antiquis, prout videri potest apud Sylvestrum verbo Contritio.*

Ad act. 3.

p. 141.

Ruardus etiam Tapperus tacitè approbat doctrinam doctissimi viri (ut loquitur) Præceptoris sui sanctissimi Domini Adriani, quod non quilibet dolor ob Dei super omnia dilecti offensam, sit Contritio, sed ille solum; qui est vehemens & intensus, non tepidus & remissus.

Similiter Petrus Binsfeldius in suo Enchiridio Theologorum manibus tritissi no. probat illorum Doctorem sententiam, qui tradunt Attritionem, & Contritionem non differre nisi penes intensum & remissum, ita

ut

ut idem actus numero remissus sit Attritio, intensior factus Contritio reddatur. Neque dubitat, quin huic sententiæ applaudat Tridentinum, cum Attritionem vocat Contritionem imperfectam.

In hac itaque sententiâ, quæ multorum doctorum virorum calculo probatur, Attritio non differe essentialiter à Contritione, potestque hominem reconciliare cum Sacramento, quamvis non possit sine Sacramento.

SEPTIMO. Nonnulli distinguunt inter Contritionem perfectam, & imperfectam, sicut inter charitatem perfectam, & imperfectam. Quemadmodum ergo inchoata charitas, inchoata Iustitia est, & perfecta charitas, perfecta iustitia est: ita etiam juxta illos inchoata charitas, inchoata seu imperfecta Contritio est, & perfecta charitas, perfecta Contritio est.

Aug. de  
nat. & gra.

Quæ autem in illa sententiâ dicenda sit, perfecta charitas, alterius indaginis est. D. Joannes 1. cap. 4 scribit, quod in hoc perfecta est Charitas Dei nobiscum, ut fiduciam habeamus in die iudicii. Et infra: Perfecta Charitas foras mittit timorem. Qualem Charitatem teste B. Dorotheo, habebat beatus Antonius solus dicere: Ego nusquam Deum timeo.

De divino  
timore  
doct. 4.

Augustinus tractatu 5. in Epistolam Joannis Charitatis perfectionem in eo sitam esse existimat, quod quis possit dicere cum Apostolo: Mihi vivere Christus est & mori lucrum. Joannes Climacus gradu 30. de vinculo fidei & Charitatis, perfectam Charitatem ita describit: Charitas denique perfecta est, cuiusque adverse, praveque intentionis, cogitationisque depositio. Charitas enim non cogitat malum. Charitas & tranquillitas, & filiorum adeptio solum nominibus distincta sunt.

Ad Philip.  
1.

B. Dorotheus supra, Charitatem perfectam intelligit in illis verbis Apostoli: Quis nos separabit à Charitate Christi? Cum enim dixisset, quod ille, qui malum fugit ob metum servus est; & qui rursus ob spem præmij, mercenarius, describens perfectam Charitatem hominis Deo adhærentis: Degustat, inquit, & pervenit in sensum quemdam veri ipsius boni, nec ab eo divelli amodo aut vult, aut potest. Quid enim iam ipsum potest (ut ait Apostolus) à Charitate Christi divellere? Tuncque in PERFECTAM filij mensuram & statum pervenit, & diligit bonum propter seipsum, timesque cum diligit, atque hic perfectus est timor.

Ad Rom. 8

Alij aliter Charitatis perfectionem explicant: ut, ut sit, clarum est, quod juxta modum illum explicandi, Attritio differat à Contritione, quod in præsentī nobis sufficit. In qua tamen explicatione fatendum est, cum Gregorio de Valentia quod vera, seu perfecta Contritio difficillimè habetur.

Disp. 7. q. 8.  
de Contr.  
puncto 3.  
col. 160x.

Ex dictis hoc parographo constat, Contritionem & Attritionem non confundi, quandoquidem juxta diversas Authorum sententias, (de quarum veritate aliàs) amplum discrimen assignetur inter Contritionem perfectam & Attritionem, seu imperfectam Contritionem.

§. VI. *Expenditur Philippi Melanchtonis, aliorumq; doctrina, quod Dei dilectio non possit esse in peccatore non iustificato, ostenditurq;, quod aliqua Dei propter se dilectio, seu charitas generaliter dicta possit precedere iustificationem, quamvis non item habitus charitatis, vel actus ab illo elicitus.*

**I**stant tamen nonnulli, & contendunt nos Attritionem à Contritione non discernere, propterea quod hujusmodi Attritionem cum Sacramento exigamus, quæ ante susceptionem Sacramenti peccatorem iustificet, Deoque reconciliet. Quid ita? Quoniam, inquit, ad Attritionem saluarem cum Sacramento exigimus charitatem, non potest autem charitas esse in homine non iustificato, neque potest precedere peccatoris cum Deo reconciliationem.

Verùm huic argumento pro parte responsum est sub initium propositæ quæstionis, quando §. 2. distinximus charitatem generaliter & specialiter dictam. Quamvis enim neque habitus charitatis, qui per antonomasiam dicitur charitas, neque actus charitatis, qui ab illa profluit, possint, esse in homine non iustificato, vel precedere peccatoris cum Deo reconciliationem: potest tamen motus charitatis generaliter dictæ, etiam in peccatoribus reperiri, & separari à justificatione, seu hominis cum Deo reconciliatione. Quod quidem possem varijs argumentis comprobare, nisi res illa ab alijs tractata & discussa fuisset. Quare unicum tantum, ab alijs non propositum, sed efficax proferam argumentum. Itaque sic disputo:

Philippus Melanchton, alijsque Lutherani Confessionis Augustanæ negarunt in peccatoribus posse reperiri charitatem seu Dei propter se dilectionem, volueruntque illam non posse separari à reconciliatione hominis cum Deo: atqui Catholici Scriptores doctrinam illam reprobaverunt. Quidni ergo nos etiam reprobemus?

Utramque præmissam propositionem probant, quæ adversus Apologiam Philippi Melanchtonis scribit Albertus Pighius, alijsque Catholici.

Scripserat enim Philippus Melanchton in sua Apologia: *Non potest prius adesse dilectio, quam fide facta sit RECONCILIATIO: nec potest eum diligere, quem iratum videt, & precipitare velle in gehennam.*

Ad-



Adversus hanc doctrinam ita scribit Albertus Pighius controversiâ nonâ: *Nec est verum, quod subinde recurrit apud Adversarios, non prius nos posse DILIGERE Deum, quam fide iam facta sit RECONCILIATIO, & remissionem peccatorum acceperimus.* Subdit hanc dicti sui causam: *Quid probet, quominus illum possimus diligere, quem omni nobis boni Authoris ceris credimus? A quo nos conditos, cum nihil essemus, ut sua beatitudinis in æternum participes & consortes faceret &c. Hunc talem, ita à nobis apprehensum, in hoc ipso actu, in hoc ipso ad illum reditu, quamvis peccati nostri adhuc meritis offensum, nos diligere impossibile est &c? Sunt hæc impia impiorum hominum commenta & mendacia.* Nec se continet, quin hæc vehementi oratione sermonem claudat? *An non debemus ante converti ad Deum, quò ipse vicissim convertatur ad nos? An accedemus ad illum quem non DILIGIMUS?*

Similia scribit Joannes à Daventria ad articulum 12. Confessionis Augustanæ. *Adversarij, inquit, sine CHARITATE asserunt peccatorem iustificari, imò iustum esse, quia dilectio (ut eorum verbum dicamus) non adest nisi prius fuerit fide facta reconciliatio.* Non video an quidquam dici posset ineptius. Et insit: *Si Deo placet, non bene dixit Ioannes: qui non diligit manet in morte.* Et iterum: *Stat irrefragabilis illa Ioannis sententia: Deus Caritas est, & qui manet in Charitate, in Deo manet, & Deus in eo.* Quod si Deus Caritas est, compertum est, alienum esse à Deo, qui CHARITATE vacat, neque cum Deo habere commercium nisi PRIUS DEUM DILIGAT.

1 Joan. 3.

1 Joan. 4.

Cumque Adversarij objecissent, quod per fidem habemus accessum ad Deum, atque idcirco non requiri charitatem, respondet, *Habemus igitur accessum ad Deum, ut inquit Apostolus per fidem: non illam simplicem, sed per fidem, qua per CHARITATEM operatur.*

Ad Rom. 5

Item Matthias Bredembachius in cap. 3. Matthæi: *Quod Adversarij nostri hic ingerunt, non posse prius nos diligere Deum, quam reconciliatio per fidem & remissio peccatorum sit perfecta: falsum est, & tam Scriptura, quam rationi contrarium.* Rationi, quis enim non videt, quam sit omni humanitati consentaneum, ut eum amemus, quem nostrâ iniustitiâ graviter offensum, tamen sciamus paratum esse ad veniam, ad recipiendum nos in gratiam? Quis inquam tam inhumanus, ut talem non amet, etiam ante reconciliationem factam? Scriptura, qua expresse testatur, Mariam Magdalenam dilexisse multum, an: equam audiret, remittuntur tibi peccata tua Luca 7.

Pag. 12.

Videri potest Ruardus Tapperus ad articulum 4. pagina 183. & Robertus Bellarminus lib. 1. de iustificatione cap. 13. ubi probant, Deum, etiam iratum posse diligi ante reconciliationem.

Quin & ipse Lutherus, qui initio suae defectionis docuerat poenitentiam solo amore concipi, postmodum tamen docuit, quod charitas non posset præcedere justificationem, uti constare potest ex ijs, quæ suprà argumento 3. §. 1. dicta sunt.

Pag 123

Oecolampadius etiam videtur quid simile docuisse, prout colligitur ex hac responsione Jacobi Latomi: *Prætereo item, quod negat Oecolampadius, qualemcumque CHARITATEM, & erga Deum amorem remanere in homine peccatore, contra eundem Augustinum & adversus Iulianum dicentem: non omnis charitas, sed charitas de corde puro.*

Atque ex his omnibus imprimis manifestè apparet, quod Lutherani docuerint dilectionem Dei, seu charitatem non posse reperiri in homine peccatore, cui Deus iratus est, sive qui Deo nondum reconciliatus est per fidem justificationem. Item, quod Catholici Scriptores doctrinam illam impugnaverint, tamquam rationi & Scripturæ contrariam. Quorum Catholicorum Doctorum veltigijs insittendo dicimus: ad Attritionem salutarem requiri charitatem generaliter dictam, quæ possit esse in homine peccatore, priusquam in Sacramento facta sit reconciliatio, nequaquam tamen habitum charitatis, vel actum ex illa proveniente.

Non ignoro doctrinam Lutheranorum plurimum differre à doctrina Scriptorum Catholicorum, qui omni charitati etiam generaliter dictæ, vim justificandi attribuunt.

Siquidem Lutherani docent reconciliationem, saltem causalitate præcedere Dei dilectionem, illi autem Catholici Scriptores, è contrà Dei dilectionem causalitate priorem esse reconciliationem. Illi docent reconciliationem fieri ratione solius fidei: Hi ratione charitatis & iustitiæ inhærentis. Utrisque tamen communis est doctrina, à Majoribus nostris confutata, quod dilectio, seu charitas non possit reperiri in homine peccatore & nondum justificato.

§. VII. Respondetur quorundam querimonia, qui clamant nimis grave onus futurum, si Poenitens debeat Deum propter se diligere in Sacramento, proponiturq; discrimen inter vetus & novum Testamentum: TIMOR & AMOR.

**V**ulgari est querimonia, nimis grave, imò intolerabile onus futurum, si etiam in novo Testamento amor Dei præcipiatur ad justificationem cum Sacramento.

Sed responderetur ex Augustino: *Quomodò est grave, cum sit dilectionis mandatum?* Quomodò est grave, cum sit onus illud, de quo Christus ipse

Li. de nat.  
& grat.  
c. ult.

ipse pronuntiat: *Iugum meum suave est, & onus meum leve?* Quomodo est grave, cum sit onus illud de quo scribit Augustinus: quod non sit pondus onerati, sed ala volaturi? Quomodo est grave, cum non sit sarcina premens & aggravans, sed erigens & fursum sublevans?

Matth. II.  
Serm. 23.  
de verb.  
Apost.  
In Ps. 69.

*Alia sarcina*, inquit idem Augustinus, *Premis & aggravat te: Christi autem sarcina sublevat te. Alia sarcina pondus habet: Christi sarcina pen- nas habet. Quod pulcherrimam comparatione declarat: Nam & avi si pennas detraha, quasi onus tollis: & quod magis onus abstulisti, eo magis in terra remanebit. Quam exonerare voluisti, iacet. Non volat, quia tulisti onus: redeat onus & volat. Talis est Christi sarcina &c.*

Eodem modo querentibus de obligatione confitendi in novo Testamento ex Seraphico Doctore respondet alicubi Toletus: *Posses quis obijcere*, inquit: *nos ergo maius onus accepimus, quam Iudei, quia obligamur confiteri. Ecce vulgarem querimoniam. Respondet*, inquit, *Bonaventura, duplex esse onus, onerans & levans. Sacramenta sunt ONERA LEVANTIA, quia dant gratiam, & nos CERTOS reddunt peccata nobis esse remissa.*

L. 3. p. 178.

Unde non est consequens, quod propterea sumus deterioris conditionis, quam fuerint in veteri Testamento, quamvis teneamur & Deum diligere, & peccata confiteri: Siquidem onus Confessionis nos sublevat, in quantum nos erigit ad certam de reconciliatione cum Deo obtenta fiduciam,

Præterquam, quod sicut non sequitur, deterioris conditionis esse adultum, quam sit infans, licet ab adulto, utpote fortiore, plus obsequij exigatur: ita etiam non sequeretur deterioris conditionis esse Christianum, quam fuerit Judæus; si à Christiano, utpote perfectiore, & longè amplioribus Evangelicæ gratiæ beneficijs cumulato, plus etiam Christiani obsequij exigeretur.

Neque verò existimandum est, quod illa sit novi Testamenti præ antiquo prærogativa, quod lex nova, seu Evangelium charitatem non requirat. Optimè enim Confessionistis negantibus, quod Evangelium dilectionem exigeret, respondet Joannes à Daventria: *Dicant isti Sophista, utra lex charitatem exigit, Moysi, an Christi, an etiam utraque? Certe utraque dilectionem exigit. Et absolutior quidem in lege Christi requiritur charitas, quam in lege Moysi.*

Ad art. 22.  
P. 243.

Deinde eleganter ostendit, quod lex nova esset imperfectior veteri si charitatem non requireret. *Si Moses*, inquit, *requireret charitatem, quam Christus non requireret, ille certe (Moses) hoc (Christo) esset maior, hinc esset illo inferior; utpote, qui potissimam, & quam Paulus maximam vocat, virtutem ignorasset.*

Et

Et sanè mirum est, quod nonnulli velint Pœnitentes eximere à lege amoris Divini, cùm tota lex Evangelica sit lex amoris. Neque juxta sanctum Augustinum sit alia differentia veteris & novi Testamenti, quàm *timor & amor*. Undè contra Adimantum cap. 17. *Hæc est, inquit, brevissima, & apertissima differentia duorum Testamentorum: TIMOR & AMOR: illud ad veterem, hoc ad novum hominem pertinet.*

Ac propterea potiori ratione dicerentur vetus & novum Testamentum confundere, qui solum timorem seposito amore (qui est velut character novi Testamenti) sufficere arbitrantur ad justificationem.

L. I. de poe-  
nit c. 31.

Quid? Quod ipsi Judæi pœnitentiam propter Dei dilectionem tantum esse concipiendam tandem affirmant? Est apud eos axioma celeberrimum, inquit Morinus, omnes actiones nostras AMORIS DIVINI causâ esse faciendas, & pro cæteris POENITENTIAM aliter factam non valere. Hominem, ut apud Deum mereatur, nec pœna timore, nec mercedis spe commoveri debere, sed dilectionem Dei oportere illi esse unicum motivum, quo persuasus, qua in lege sunt mandata perficiat. Quid igitur? An non metuendum est, ne utriusque Testamenti confusio quædam & permixtio fiat, dum Judæi ad amorem, Christiani ad timorem transeunt? Et quidem nobis gratulandum est, quod ad amorem Divinum relicto spiritu servitutis in timore, confugiunt Judæi: verùm quod ad solum spiritum timoris, relicto spiritu amoris, confugere velimus Christiani: quis non puret vitio vertendum?

Atque hæc sunt, Erud. me D. Præses, quæ quæstioni mihi propositæ respondere volui: quæ omnia S. Romanæ Ecclesiæ judicio lubeus submitto, & configno hæc S. IGNATII geminâ: Omnes RECTAM habere INTENTIONEM studeant, non solum circa vitæ suæ statum, verùm etiam circa res particulares (cujusmodi est Confessio peccatorum) omnes id semper in eis sincerè spectantes, ut serviant, & placeant Divina bonitati PROPTER SEIPSAM, & propter CHARITATEM, & eximia beneficia, quibus prævenit nos potius, quàm ob TIMOREM POENARUM, vel SPEM præmiorum, quamvis hinc etiam iuvati debeant. AMEN, AMEN.

